

Papa A'kwaru Nukupu'pu

Sises Nennoko'san Itekare Ekamai' Yawiri

Ekamanin

Papa A'kwaru Nukupu'pu Sises Nennoko'san Itekare Ekamai' Yawiri esi itekare *Uru'* nūmenuka'pu pu'ku pe ri. Inkupunu kuru esi, wapiyaro' kon Sises pikiron kon uya iku'to' pe Waku A'kwaru uya to' kupu'pu Waku Itekare ato' pe to' uya Sises pi', “Surusiran awiri, miri awonsi'ki Isutiya, Sameriya awiri'ne ri, siya ri non u'matu pu'ku pona ri” (1:8). Sises pikiron kon pantomu pe iyesi Esuweru amu' koro'tau iye'sara'ti'pu tanporon kon pata emu' kaisaron kon uya apurito' pe. Imenukanin esi'pu tunmenuka'pu ennin nan uya i'tuto' pe Sises pikiron kon esi Roman amu' esi pata epuru pe enari'panin pe pen, Sises pikiron kon napurinu esi Esuweru amu' enuriku'pu ipi' a'ku'tinin pe.

Inkupu'pu ekanpai iyesi osorawau eke ton ite'ma yau, enei'ma nai awiri Sises pi', Waku Itekare usekama'pu so'si e'sara'ti'pu utin pi' mi awiri: 1) Sises pikiron kon nukupunu e'sara'ti'pu Surusiran po Sises enuku'pu e'ma'pu pe; 2) Parestin pu'ku ton ni ti'ma'kapi'se iyepamu'pu; 3) miyari ri iyepamu'pu Mete'teriyān nono poro ri Ron ni tepose.

Usennakan pari pen esi miri *Inkupu'pu* iye'sa' ru'pu tumeruntiru ke Sises apurinin nan pona Surusiran po Penti'kas weyu a'tai, miripan ni esi miyari ri so'si esa' pe imeruntitānuku pi' ri miri awonsi'ki itepuru ton ni, iye'ku'pi'sa' usekamasa' na'ne' awiri kareta yau. Iye'sara'ti a'taino kon Sises pikiron kon ekareei amuranu'sa' to'ken esi miri tu'kan ni to' nekamapitu'pu itekare yau, iye'ku'sa' ru'pu e'menukasa' na'ne' iye'ku'sa' ru'pu uya ri ekama merunti pe itekare esi'pu Sises apurinin nan yau miri awonsi'ki so'si tawon kon yau ri.

Iyawon Ekamanin

Ekonekan ensa' ru'pu ekamanin pe (1:1-26)

a. Te'nonka pe Sises usauroku'pu (1:1-14)

b. Isutas pata'pu iyakan anamu'pu (1:15-26)

Surusiran po tunene'pu kon ekama'pu enno'sa' kon uya (2:1—8:3)

Isutiya, Sameriya po tunene'pu kon ekama'pu enno'sa' kon uya (8:4—12:25)

Paaru e'turawasoma'pu (13:1—28:31)

a. Iye'sara'ti pe itekare ekamai' iti'pu (13:1—14:28)

b. Surusiran po eke pe mitin pi' to' esi'pu (15:1-35)

c. Iyakon ite'kwa pe itekare ekamai' iti'pu (15:36—18:22)

d. Itosorawano ite'kwa pe itekare ekamai' iti'pu (18:23—21:16)

e. A'sisa' pe Paaru esi'pu, Surusiran, Sisariya, miri awonsi'ki Ron po (21:17—28:31)

Sises Enuku'pu Erpu Pona

1 ¹Eke Tiyo'peras, wapiyaro' ukaretaai yau imenukasa' uya man, tanporon ni Sises nukupu'pu miri awonsi'ki to' enupa'pu iya

ru'pu ²iyenuku pona ri Erpu pona. Miri rawiri, Papa meruntiru ke tauta'kwaru'tii', tuneporo'san tunenno'ton kon pe itekare ekamai' apiyo'ma'pu iya tu-turawasooi kon ku'to' pe to' uya.

³Sises ekota'ma'pū, miri awonsi'ki iyeriku'pū tūpo kurusu' po, to' piya' isenpoikapitū'pū inke ite'kwa ri, to' uya te'mū'sa'kasa' apurito' pe. Inke ri to' piya' isenpoikapitū'pū 40 kaisa ri wūi ton u'matū koro'tau terikū tūpo te'mū'sa'kasa' a'tai, miripan usaurokū'pū Papa e'to' esa' wanni pe pi'. ⁴Taron ni a'tai to' piyau tesi koro'tau, to' auro'ka'pū iya, “Surusiran apai kūtītū, e'tane ukūipūnū usauro'sa' rū'pū ipi' enupikiri me'tūi' usaurokū ri metata'tūine'nokon ipi'. ⁵Isaan uya ka'pon amū' pa'taisimapitū'pū tuna ke, e'tane seri pe iwa'ne ri Papa uya apa'taisimapitū kon miri Wakū Ta'kwarū ke,” ta'pū iya.

⁶Sises pokon pe kanan tamūrasa' kon a'tai, to' uya ekama'po'pū, “Ina epuru, seri a'tai pe' uri'nokon Esuwerū amū' e'to' itesa' pe na'po auya seri?” ta'pū to' uya.

⁷Miripan uya ta'pū to' pi', “Iweyu i'tuto' auya'nokon kuru pūra ri iyesi. Ukūipūnū uya ikoneka miri tūweyu a'tai ri. ⁸E'tane Wakū A'kwarū uye'sa' a'tai ipona'nokon, merunti pe iyena kon miri, miripan uyekareei ekama auya'nokon miri Surusiran po, Isutiya po, Sameriya po, miri awonsi'ki siya ri non emū' kaisa ri,” ta'pū iya.

⁹Seri ta'pū iya tūpo, itanūmū'pū to' enu airi ri, miripan onamū'pū kapuru' uya to' enu apai.

¹⁰To' esi'pū ka'ta' tenu kon tūtūse enpitū pi' iyenu'tane. Miri koro'tau, ite'kwanau pūra ri, asa'ron kon inserū amū' e'soto'kasa' esi'pū to' piyau. ¹¹“Imiri'nokon, Kiyarari pon kon, i'ri pi' seri yau iye'soto'pi'sa' kon uya ka'ta' iyenu kon tūpitū? Pūse ri Sises enuku menyatūine' Epūn pona uye'to' oton, iti ene'pū auya'nokon kasa ri,” ta'pū to' uya.

**Ma'tayas Ena'pū
Isutas Pata'pū Yakan Pe**

¹²Miri tūpo, enno'sa' kon enna'po'pū Surusiran pona Are' Wūpū poi, inni kuru pūra ri, 1 mayirū o'koi' ri pata pona. ¹³Pata eposa' tūuya'nokon a'tai, pata tūto' tūuya'nokon itau, ka'tawon iūti ta' to' uti'pū. Pūsamoro iyamūrasa' kon esi'pū; Pi'ta, Isaan, Isens, Anturu, Piri', Tamas, Pa'taramiu, Ma'siu, Isens (Arū'piyas mu), Saiman (Usera' tukai' tesa'sen^a), miri awonsi'ki Isutas (taron ni Isens mu). ¹⁴To' amūrapitū'pū isewenapai ri ipūremai'. Uri'sami'si amū', Sises san Meri, miri awonsi'ki Sises akon non esi'pū to' koro'tau.

¹⁵Miri a'tai, Pi'ta e'mū'sa'ka'pū tūtonpa ton Sises apurinin nan koro'tau. ¹²⁰kaisaron kon esi'pū miri yau. ¹⁶“Utonpa ton, kin Tepi' poro Wakū A'kwarū usauro'sa' rū'pū Isutas pi' si uta'ku'tisa'

^a 1:13 *Usera'* - Roman amū' enapai temo'ka kon i'sero'.

1:4 Ūru' 24:49 1:5 Ma'siu 3:11; Ma' 1:8; Ūru' 3:16; Isaan 1:33

1:8 Ma'siu 28:19; Ma' 16:15; Ūru' 24:47-48 1:9 Ma' 16:19; Ūru' 24:50-51

1:13 Ma'siu 10:2-4; Ma' 3:16-19; Ūru' 6:14-16

man. Sises a'si ton kon anin pe iyena'pũ. ¹⁷Isutas esi'pũ anũsa' rã'pũ ina tonpa pe itekare ekama pi' iye'turawasomato' pe," ta'pũ Pi'ta uya.

¹⁸(Iri eseru ku'sa' tũuya epe'pũ ke Isutas uya non e'ma'pũ, miripan yau ita'mo'ka'pũ, iye'toi'kwa'pũ tãwenu'pi takanũ'se. ¹⁹Tanporon kon Surusiran pon kon uya itekareei eta'pũ, miripan kon uya miri non ese'ti'pũ A'ketama tukai', Mũn Pata'se' ta e'kwa pe.)

²⁰Miyari ri Pi'ta usaurokũ'pũ, "Iye'menukasa' man Eren yau,

“ ‘Tiwi itawon pũra itiwũ' nesii,

inũ' ri kuse'nin itau,”^b miri awonsi'ki,

“ ‘Tiwi tũron ni itepuru pe te'ton ipata'pũ anũmũi,^c tukai'. ²¹Miri pe iyesi pi', Isutas pata'pũ iyakan epopai'nokon, pena ri Sises a'tai uya'kiri'nokon iye'sa' rã'pũ, ²²Isaan uya epa'taisiman ekareei ekama'pũ si'kiri miri awonsi'ki Sises enuku pũ'kũ pona ri iye'sa' rã'pũ, miripan e'to' pe utonpa kon pe Sises e'mũ'sa'kasa' ene'pũ tũuya ekamanin pe,” ta'pũ iya.

²³Miripan kon uya asa'ri ka'pon amũ' anũmũ'pũ; Isole', Parusapas tukai' to' nesakũnũ, Isu'su'tas tato' to' uya ipi', miri awonsi'ki Ma'tayas. ²⁴Miripan tanporo miri

ya te'san ipũrema'pũ, “Ina epuru, tanporon kon usenuminkato' i'tu auya. Apũne ekamaki nai kũri rupi anũsa' auya pũsamoro asa'ron kon ka'pon amũ' apai ²⁵enno'sa' pe iye'to' pe, Isutas pata'pũ iyakan pe. Isutas uya ina nonkasa' man tãpata'se' ya' tãuti pi',” tukai' to' ipũrema'pũ. ²⁶I'tun nito' ike ke to' i'tu'pũ to' uya, miripan i'ki'ma tane to' uya ita'mo'ka'pũ Ma'tayas winikũi', miripan Ma'tayas ena'pũ 11 pan kon enno'sa' kon tonpa pe.

**Papa A'kwarũ Uyee'pũ
Sises Poitorũ Ru'san
A'kwarũ'tii'**

2 ¹Penti'kas tato' weyu e'seposa' a'tai, ^d tanporo Sises apurinin nan amũrasa' esi'pũ tikin ni ipata Surusiran po. ²Miri yau, ite'kwanau pũra ri, pata a'merumũ'pũ, eke pe a'setun kasa, ka' winipai, miripan ewomũ'pũ to' iwũ' ta', ³miripan kon uya apo' waraino ene'pũ, miripan e'ta'nũku'pũ to' kaisa ri to' i'pai pona'ne eretuai'. ⁴Tanporo to' uta'kwarũ'ti'pũ Wakũ A'kwarũ ke, miripan kon e'sara'ti'pũ usauro'ni pi' tũron kon ka'pon amũ' maimu' yau'ne, Iya'kwarũ uya tũusauro'to' kon pe tũkupũ kon pi'.

⁵Miri a'tai, Esuwerũ amũ' amũrasa' esi'pũ mi awiri'nan ni, pata emũ' apaino kon Surusiran

^b 1:20 Eren 69:25 ^c 1:20 Eren 109:8 ^d 2:1 Penti'kas—To' Epoi Iti'pũ Weyu Rũ'pũ pe, 50 pe wũi tũpo Esuwerũ amũ' amũrasa' ti'kiyari kon a'nai' akũ'pũsa' anũmũ tũuya'nokon weyu pi'. ^e 2:4 maimu, miri pe pũra ani Kiri' maimu yau.

1:18-19 Ma'siu 27:3-8 1:22 Ma' 16:19; Uru' 24:51

2:1 E'sotas 23:16; 34:22; Ripaiti'kas 23:15-21; Isu'taronomi 16:9-12



Apo' waraino ene'pū to' uya. (2:3)

pona. ⁶Pata a'merumū tetai', to' amura'pū Sises apurinin nan pata'se' ya'. To' usewansiuka'pū tūmaimu kon tau'ne to' usaurokū eta tūuya'nokon pi'. ⁷Ipan pe to' usewansiuka'pū, miripan kon uya ta'pū, “Pūsamoro nūsauro'ai'ne' nan sa'ne Kiyarari ko' amū' ko! ⁸Ɔri kasa ken si umaimu kon tau'ne to' usaurokū eta seri? ⁹Tūron kon sa'ne uye'pi'sa' man ko, Pa'tiya winipai, Metiya winipai, miri awonsi'ki Eran winipai, miri awonsi'ki tūron kon kanan Me'sa'po'temiya, Isutiya, Ka'pato'siya, Pontas, Eisa Mūre'pū, ¹⁰⁻¹¹Pūrekiya, Panperiya, Isi', Ripiya miri awonsi'ki Ron piyaworo' nan ni uye'sa' man ko, Esuwerū amū' miri awonsi'ki Esuwerū amū' pen e'tane, Esuwerū amū' napurinu apurinin nan. Tūron kon kanan Kūri' winipaino kon miri awonsi'ki

Arepiya winipaino kon, e'tane si umaimu kon tau'ne to' usaurokū eta'nokon, eke ri Papa nūkupū'pū ekareei pi'!” ta'pū to' uya. ¹²Tanporon kon usewansiuka'pū, i'tu tūuya'nokon pūra iyese pi'. “Ɔri ekamanin pe seri esi?” tukai' to' usekama'popitū'pū.

¹³E'tane tūron kon uta'kiri'pū to' pi' to' sapema pe ri. “To' e'taripasa' man,” ta'pū to' uya.

Pi'ta Uya Itekare Ekama'pū

¹⁴Miri a'tai, Pi'ta e'mū'sa'ka'pū ¹¹pan kon tūtonpa ton pokon pe, anpisin ka'pon amū' koro'tau, miripan usaurokū'pū eke pe, “Utonpa ton, Esuwerū amū' tūron ni pata wini'nan miri awonsi'ki Surusiran po tūuko'mansan, apūne etati'! Ɔri ta e'kwa pe seri e'ku'sa' tukai' ekama uya. ¹⁵Ɔpoken pūra ri iusenuminka

kon ina e'taripasa' tukai'. Awanakui'
ri mari pata man, 9 a'kura' ri mari.
Inu' e'taripa pãra ri iyese miri a'tai.
16E'tane pu'kena' Isoweru nekama'pũ
rũ'pũ uta'ku'ti seri,

17“ ‘Papa uya se kasa tasa': Se
ton kupũ uya miri
non weyu u'matũ a'tai:
Uya'kwarũ enno'to' uya
oton tanporon kon pona.

Imu kon miri awonsi'ki
iyensi kon amũ' uya
umaimu ekamato' oton,
moineri'san enu
uta'kwakasa' uya ento'
oton,
miri awonsi'ki kiyyi' amũ'
e'ne'pi'to' oton.

18Miri riken pe pãra, upoitorũ
ton, warawoti'si amũ'
miri awonsi'ki
uri'sami'si amũ' pona
uya'kwarũ enno'to' uya
oton ni mari,
miripan kon uya umaimu
ekamato' oton.

19A'kwarũpi'nin ku'to' uya
oton ka' yau,
miri awonsi'ki i'tuto' ipi'
non po kanan.
Miri a'tai, miri yau mũn e'to'
oton,
apo' miri awonsi'ki ipun
pe ikirisin e'to' oton.

20Wũi enu ewarumanto' oton,
miri awonsi'ki kapũ
usutato' oton mũn kasa.

Eke ri, miri awonsi'ki
wakũ ri Itepuru Weyu
uyepũ rawiri
tanporo seri ton e'ku'to'
oton.

21Inu' ri kũri ri Itepuru
ekama'ponin nũ'pũ
tũpika'tinin pe,
epika'tito' oton tasa' iya,^f
ta'pũ rũ'pũ Isoweru uya.

22“Imiri'nokon Esuweru amũ',
seri umaimu etati'! Pũse ri Sises,
Nasare' pon, i'koro'tau'nokon
iyese'pũ Papa nennoko'pũ.
Tu'kan ni eke Papa tũrawasooi,
a'kwarũpi'nin, miri awonsi'ki i'tuto'
ipikiri ri ku'to' pe iya iyena'nokon.
Papa uya enpoika'pũ iyena'nokon
inkupũnũ wini, Papa nennoko'pũ
tukai' i'tu kon pa, mi'tuyatũi'ne'
kasa ri. 23Pena ri Papa uya iku'sa'
esi'pũ iyena'nokon itato' pe tũuya,
miripan tũrũ'pũ auya'nokon iri
ton ena' to' uya kurusu' pona
ipokapi'to' pe, iyeri'to' pe. 24E'tane
Papa uya i'mũ'sa'ka'pũ eri'nito'
meruntirũ apai, eri'nito' uya a'sisa'
ko'manũkũ namai'. 25Pena Tepi'
uya Itepuru maimu ekama'pũ,

“ ‘Papa, Itepuru ene uya inke
ri upiyau.

Miri uriya', usi'nũkũ pen.

26Miri pe iyese pi', pori' pe
uyewan yau esii'ma,
uyesen uya epori'mato'
enpoika.

Ayapuri uya, Papa,

^f2:17-21 Isoweru 2:28-32

2:23 Ma'siu 27:35; Ma' 15:24; Æru' 23:33; Isaan 19:18

2:24 Ma'siu 28:5-6; Ma' 16:6; Æru' 24:5

eri'sa' ri e'tane,
 upun uko'mamū te'ku'to'
 yau,
 27 apūne pūra uruwai' yau esi
 i'se pūra iwesi pi',
 miri awonsi'ki wakū, uri
 ipoitorū ukita i'se pūra
 iwesi.
 28 ĩko'manse'na utito' e'ma
 enpoikasa' auya man;
 pori' pe uku'to' auya
 oton, apūne pūra tiwi ri
 upiyau iwesi pi',^g
 ta'pū Tepi' uya," ta'pū iya.

29 Pi'ta usaurokū'pū tipiyi'se
 pūra, "Utonpa ton, eke utamokori
 kon Tepi' erikū'pū, miripan
 uruwasi esi seri pona ri. 30 Tepi'
 esi'pū pu'kena', miripan uya Papa
 uya, 'Ikupū uya kuru ri miri,' tukai'
 tauro'ka'pū rū'pū si i'tu'pū: tikin ni
 ipayan amū tonpa ku'to' oton Papa
 uya itepuru pe, Papa munki amū
 esa' pe, Tepi' esi'pū to' esa' pe kasa,
 tawon. 31 Miri pe iyese pi', Tepi' uya
 nin si Kūrai^h e'mū'sa'kato' oton
 i'tusa' tūuya pi' ekama'pū, uruwai'
 yau iko'manto' oton pen ni, miri
 awonsi'ki ipun ukita pen ni, tukai'.

32 "Pūse ri Sises, iyeri'sa'
 rū'pū i'mū'sa'ka'pū Papa uya.
 Ina si iya'kiron kon nū'san uya
 iye'mū'sa'kasa' ene'pū. 33 Papa
 uya eke pe kuru ikupū'pū, miripan
 ereutanū'sa' iya tenwo'netū wini,
 miripan uya apiyo'ma'pū ta'kwarū

enno'to' pe iya tūpoitorū ton pona,
 tūsaurokū'pū awiri ri. Sises uya
 si eke pe kuru ri ina repasa' Wakū
 A'kwarū ke menyatūi'ne' miri
 awonsi'ki metayatūi'ne'. 34 Tepi'
 enu'sa' pūra iyese tūpun yau Epūn
 pona, e'tane Tepi' uya ta'pū,

"Ītepuru uya ta'pū uyepuru pi';
 "Uyenwo'netū winikūi'
 ereutanū'ki
 Itepuru pe iwesi pa,
 35 apūne iyeyaton non entai
 iwesi pa iku'tane uya to'
 esa' pe iwesi pa,"ⁱ

tasa'.
 36 "Īmiri'nokon miri awonsi'ki
 tanporo ri Esuwerū amū' uya i'tu
 i'se esi i'napai ri kuru iyese tukai':
 Pūse ri si Sises inwini'pū kon ku'sa'
 Papa uya man Itepuru pe miri
 awonsi'ki Kūrai pe," ta'pū Pi'ta uya.

37 Ka'pon amū' uya seri etasa'
 a'tai, ipan pe to' ewan poka'pū
 iya, miripan kon uya Pi'ta miri
 awonsi'ki itonpa ton ekama'po'pū,
 "Ina tonpa ton, i'ri ken si kupū ina
 uya seri?" ta'pū to' uya.

38 Pi'ta uya to' maimu eikū'pū,
 "Īmiri'nokon tikin pa'ne me'atūi'ne'
 kaisa ri amakooi kon apai era'titi',
 ina uya apa'taisimato' kon pe
 Sises ese' yau amakooi kon pi'
 usentu'man nito' pe, miripan uya
 Wakū A'kwarū ke irepa kon miri.
 39 Papa uya tūsaurokū'pū kupū
 miri ipi'nokon, apayan kon nū'san

§ 2:25-28 Eren 16:8-11 ^h 2:31 Kūrai (Kiri' maimu yau), miri pe pūra *Me'saya* (Ipuru maimu yau), asa'ri ri mari iyese, *Papa Nanūtmanū* ta e'kwa pe; v. 36 kanan.

ⁱ 2:35 Eren 110:1

2:30 Eren 132:11; 2 Sanwerū 7:12-13

pi', miri awonsi'ki sunwaron kon pi' niri, tanporon kon Itepuru, itese' pi' e'nito' Papa nuki'manu ton pi' ri niri," ta'pu Pi'ta uya.

⁴⁰Miyari ri Pi'ta usauroku'pu to' emiya'pontinin pe, "Epika'titi' iri ton seri a'taino kon piyapai," ta'pu iya. ⁴¹Pi'ta maimu apurinin nu'san pa'taisima'pu enno'sa' kon uya, miripan 3,000 kaisaron kon ena'pu to' tonpa pe.

⁴²Inke ri tenupato' kon awiri kuru ri to' e'pitu'pu, tuisi'nunka kon ke to' amurapitu'pu, to' uta're'tipitu'pu' miri awonsi'ki to' ipuremapitu'pu a'samutu yau.

Enno'sa' Kon Uya I'tuto' Ipikiri Ku'pitu'pu

⁴³Tu'ke ri a'kwarupi'nin miri awonsi'ki i'tuto' ipikiri kupu'pu enno'sa' kon uya, miripan pi' tanporon kon enari'numu'pu. ⁴⁴Tanporo Sises apurinin nan amurapitu'pu a'samutu yau, miripan kon e'repaitu'pu tanporon ke ri tutonpa kon pokon pe, ⁴⁵miripan kon uya tunono kon miri awonsi'ki timamin kon tonpa kurupo'pomaitu'pu. Miri epe'pu ke tutonpa kon repaitu'pu to' uya i'se iye'to' airi. ⁴⁶Wui kaisa ri to' amurapitu'pu Esuweru amu' use'mato', ipuremato' iwu' pu'ku ta', tanporo tamurapi'se to' uta're'tipitu'pu tiwu' kon tau'ne pori' pe, amure' pe pura

to' usekanpitu'pu. ⁴⁷Papa apuri-pitu pi' to' esi'pu, miripan taron kon ka'pon amu' esi'pu pori' pe to' pi'. Wui kaisa ri Itepuru uya tankoneka'san ke to' tonpa'ti'pu.

Pi'ta Uya Ise'mesa' Epi'ti'pu

3 ¹Taron ni wui a'tai, Pi'ta miri awonsi'ki Isaan pokon uti'pu Esuweru amu' use'mato', ipuremato' iwu' ta' ipureman weyu a'tai, ko'mamu pe, 3 a'kura'. ²Miri yau, ka'pon esi'pu ise'mesa' iyentu'pu si'kiron ni to' napitunu "Akorawan Mura'ta" tukai' to' nesakunu Esuweru amu' use'mato', ipuremato' iwu' purorooi mura'ta na!. Miri yau, to' uya inonkapitu'pu tumpurataai oton ekama'poto' pe iya ka'pon amu' tewonsan pi'. ³Pi'ta miri awonsi'ki Isaan pokon ewontane tumpurataai oton pi' to' ekama'po'pu iya. ⁴Pi'ta miri awonsi'ki Isaan uya to'sa ri ene'pu. "Apune, ina enki," ta'pu Pi'ta uya ipi', ⁵miripan kon ene'pu iya, pura ke to' uya turepa tukai'.

⁶Pi'ta uya ta'pu, "Purata pura man, e'tane itesa' pe ri e'ai'ne' ke irepa uya: Sises Kurai Nasare' pon ese' yau, e'mu'sa'ka', miri awonsi'ki asaki," ta'pu iya ise'mesa' pi'. ⁷Itenwo'netu wini itemekon a'si'pu iya iye'mu'sa'ka tane, miripan i'ta ton miri awonsi'ki ipurakon amu' ena'pu pana' pe inke pura ri. ⁸Miripan

¹2:42 to' uta're'tipitu'pu; miri pe pura, to' enta'napitu'pu Itepuru enta'na'pu eseru ru'pu yau; miri pe pura, to' enta'napitu'pu Itepuru tenupa'pu kon awiri.

2:44 Inkupu'pu 4:32-35

e'sanumū'pū iye'sara'ti'pū usarin pi'. To' a'kiri iyewomū'pū Esuwerū amū' use'mato', ipūremato' iwū' ta', iye'sanūnpitū'pū Papa apuripitū pe. ⁹Tanporo ka'pon amū' miri yau te'san uya isari ene'pū Papa apuripitū pi', ¹⁰miripan kūrī ri teta'kwanūnsen tukai' to' ni'tunū Akorūwan Mūrā'ta tato' yau Esuwerū amū' use'mato', ipūremato' iwū' mūrā'ta nau te'sen pe ti'tuse, ipan pe to' usewansiuka'pū, iye'ku'sa' na'ne' ipi' pi'.

**“Sises Uya Ka'pon Epi'tisa',”
Ta'pū Pi'ta Uya**

¹¹Pūse ri si ka'pon uta'sisa' esi'pū Pi'ta miri awonsi'ki Isaan pokon pi', miripan ka'pon amū' usewansiukasa' eka'tumū'pū to' piya' Saraman Epa'kato' Iya' tato' ya'. ¹²Ka'pon amū' ensa' Pi'ta uya a'tai, ta'pū iya to' pi', “Utonpa ton, Esuwerū amū', i'ri pe iyese pi' iusewansiukasa' kon seri pi'? I'ri pe iyese pi' ina enpitū auya'nokon? Tameruntirū kon ke miri awonsi'ki Papa porī'manin nan pe tesi kon pi' ina uya epi'tisa' pen miri. ¹³Utamokori kon amū' Epūra'an, Aisi', miri awonsi'ki Seko' e'to' itese' pi' Papa uya tūpoitorū Sises ku'sa' eke pe, miripan Paire' piya' inee'pū auya'nokon iwito' pe iya. Inonka tane iya ri, ‘Sises i'se pūra ina man,’ ta'pū auya'nokon Paire' pi'. ¹⁴Sises esi'pū wakū, ipokena'

ri e'tane, ‘I'se pūra ina man,’ ta'pū auya'nokon. Sises innonkapai Paire' esi'pū, e'tane ka'pon amū' wipi'nin nū'pū enna'pū auya'nokon inonkato' pe iya. ¹⁵Inke ka'pon amū' uko'manto' sara'tinin nū'pū wini'pū auya'nokon e'tane, Papa uya i'mū'sa'ka'pū iyeri'sa' apai. Ina esi seri ennin nū'san pe miri awonsi'ki ekamanin nan pe. ¹⁶Ina miri awonsi'ki pūse ri ka'pon uya Sises apuri uriya' pūse ri e'mū'sa'kasa' pana' pe. Sises apuri ina uya uriya', pūse ri ise'mesa' usepi'tisa' tanporon kon pe menyatu'ne'.

¹⁷“Imiri'nokon miri awonsi'ki itepuru ton uya seri kupū'pū Sises pi' inkupūnū kon i'tu auya'nokon pūra iyese pi'. ¹⁸E'tane pūra ri, Papa uya pu'kena' amū' auro'kasa' rū'pū pena ri awiri seri e'kupū'pū, pūse ri Kūrai^k ekota'mato' oton tawon. ¹⁹Miri pe iyese pi', amakooi kon inonkati', Papa winikūi' era'titi'. Miri a'tai, Papa usentu'ma ipi'nokon uya tanporo amakooi kon korakato' pe. Miri a'tai, wakū pe ri Papa uya imeruntitanūkū kon miri, ²⁰miri awonsi'ki Kūrai, Papa Nanūmū'pū ennoko iya miri—Sises ri. ²¹Pūse ri Sises si e'to' oton Epūn po Papa uya tanporon koneka emenna' pe pona ri, pena ri tūsaurokū'pū kasa wakū ton pu'kena' amū' yai. ²²Apūne pūra Mosi' uya ekama'pū, ‘Papa, Iteperu

^k 3:18 *Kurai*, miri pe pūra *Me'saya*—*Papa Nanūmū'pū* ta e'kwa pe; v. 20 airi ri mari.

3:13 E'sotas 3:15 3:14 Ma'siu 27:15-23; Ma' 15:6-14; Ūru' 23:13-23; Isaan 19:12-15

uya pu'kena', uwaraino anunto' oton itonpa kon ni. Tanporon inekamanu main awiri me'tui'.²³ Kari ri si pu'kena' maimu awiron pen esi a'tai, Papa uya ima'tanu'to' oton tumunki amu' koro'tapai,'" ta'pu Pi'ta uya to' pi'.

²⁴ Miyari ri Pi'ta usauroku'pu, "Seri pe si ne'ku'ai'ne' esi penaro' ri tanporon kon pu'kena' amu' nekama'pu Sanweru esi'pu si'kiri ri. ²⁵ Papa uya ta'pu ru'pu atamokori kon pi' pu'kena' amu' awiri tanku'ton kuru pi'. To' uya si eporo'pu, imiri'nokon uya ri niri kanan eporo. Epura'an auro'ka'pu Papa uya i'tuti': 'Tanporon kon ka'pon amu' purema uya miri apayan nu'san poro,'" tasa' iya ru'pu," ta'pu iya.

²⁶ Te'nonka pe, Pi'ta uya ta'pu, "Papa uya, taron kon piya' ennoko tuuya wapiya kuru, tani'mu'sa'ka'pu, tupoitoru ennoko'pu ipiya'nokon, ipurema kon pe, iri iyaseru kon tannonkai' iwesi kon pa," ta'pu Pi'ta uya to' pi'.

**Pi'ta Miri Awonsi'ki Isaan
Esi'pu Konsuru Amu' Piyau**

4 ¹ Papa ena' use'man nito' tarawasomanin nan, Esuweru amu' use'mato', ipuremato' iwu' erasu ton epuru, miri awonsi'ki Satu'si amu' uyee'pu, Pi'ta miri awonsi'ki Isaan pokon ni mari usauroku koro'tau. ² Miri a'tai, to' usakorota'pu se kasa iyese pi', asa'ron kon enno'sa' kon uya ka'pon amu'

enupa esi'pu Sises e'mu'sa'ka'pu pi' teri'sa' apai. Seri enta', iyeri'sa' kon e'mu'sa'ka ekamanin pe. ³ Pi'ta miri awonsi'ki Isaan a'si'pu to' uya pariki'si ta'; pata uko'mansa' pi', taron ni wui emaku pu'ku pona ri. ⁴ E'tane tu'kan kon ka'pon amu' uya itekare etaka'sa' esi'pu, miripan kon uya apuri'pu, miripan kon e'tonpa'tisa' esi'pu 5,000 kaisa ri.

⁵ Miri ema'sa' yau, Esuweru amu' epuru ton miri awonsi'ki Main pi' enupanin nan amura'pu Surusiran pona. ⁶ Miri yau, Anas, Papa ena' use'man nito' tarawasomanin nan epuru pe te'sen esi'pu, Kaya'pas a'kiri te'san, Isaan, Arisanta miri awonsi'ki taron kon ni esi'pu itepuru tonpa ton pe te'san. ⁷ Tapiya'nokon Pi'ta miri awonsi'ki Isaan nepu'pu to' uya to' ekama'popi'to' pe tuuya'nokon, "Nai kasa ikupu'pu auya'nokon? Inu' meruntiru yau, inu' ese' yau ikupu'pu auya'nokon?" tukai'.

⁸ Miri a'tai, Pi'ta, uta'kwaru'tisa' Waku A'kwaru ke uya ta'pu to' pi', "Eke ton ka'pon amu' epuru ton, ⁹ seri pe ina ekama'po auya'nokon ise'mesa' epi'tisa' ina uya pi', i'ri kasa isepi'tisa' tukai'. ¹⁰ Seri i'tuti' imiyamoro ka'pon amu' Esuweru amu'; Nasare' pon, Sises ese' uya puse ri warawo' epi'tisa' e'mu'sa'kasa' esi ipiyau'nokon. Inpokapitu'pu kon kurusu' pona iyeri'to' pe i'mu'sa'kasa' Papa uya. ¹¹ Papa Maimu uya tasa' na'ne' Sises pi',

¹3:22-23 Isu'taronomi 18:15, 18-19 ^m 3:25 Iseneses 22:18; 26:4

“Seri ti' imiri'nokon aminin nan newaruma'ti'pū enasa' man aminin nan uya amito' apon pe kuru,”ⁿ tasa'.¹² Makooi apai epika'tin nito' e'seposa' Sises poro riken, tanporo seri non po inū' ri Papa nūturū'pū pika'tinin wannī pe pūra ri iyesi miri,” ta'pū Pi'ta uya.

¹³Itepuru ton usewansiuka'pū, ipiyi'ke' pe pūra Pi'ta miri awonsi'ki Isaan ene tūuya'nokon pi' sepa' nan ni miri awonsi'ki isenupasa' kon pen ni, e'tane to' uya to' to'ka'nūku'pū Sises a'kiron kon nū'san pe. ¹⁴E'tane si ka'pon to' nepi'ti'pū e'mū'sa'kasa' ene'pū to' uya to' piyau. Miri a'tai, i'ri ri tato' to' uya pūra iyesi'pū Pi'ta miri awonsi'ki Isaan pi'. ¹⁵Konsurū amū' uya to' enpa'ka'pū tiwū' kon tapai, miripan kon e'sara'ti'pū usauro'ni pi' tūtonpa kon amū' pokon pe, ¹⁶“I'ri pe to' kupū seri, tanporon kon Surusiran po tūuko'mansan uya ri tanporo to' nūkupū'pū i'tu, miripan wapu'ti poken pūra iyesi. ¹⁷E'tane seri ereutanū'pai iyesi iye'ta'nū'kapū wapiya ka'pon amū' koro'tawiri. To' enari'papai'nokon, miri entakasa' auya'nokon a'tai ikota'ma kon miri tukai,” ta'pū to' uya.

¹⁸Miri a'tai, to' kanan ki'makaa'pū to' uya. Ta'pū to' uya to' pi', “Seri tūpo inū' ri kusauro'katūu, kusenupatūu Sises ese' pi',” ta'pū to' uya.

¹⁹E'tane Pi'ta miri awonsi'ki Isaan pokon uya to' maimu eiku'pū,



“Seri tūpo inū' ri kusauro'katūu, kusenupatūu Sises ese' pi'!” (4:18)

“Imiri'nokon pe i'tuti', ipoken pe' iwesi kon Papa enu yau, amaimu kon awiri e'ni yau Papa Maimu tentakai'? ²⁰Ina e'pakapū poken pūra man ina nene'pū ton, miri awonsi'ki ina neta'pū ekamato' tūuya'nokon piyapai,” ta'pū to' uya. ²¹Ipan pe to' enari'pa tūuya'nokon tūpo, Konsurū amū' uya to' nonka'pū. Nai kasa to' kota'mato' tūuya'nokon tukai' to' uya i'tu pūra ri iyesi'pū, apūne pūra tanporon kon uya ri Papa apuripitū pi' iye'ku'sa' rū'pū pi'. ²²Warawo' isepi'tisa' na'ne' esi'pū 40 kaisaron entaino ri iwūpiyaai.

**Pi'ta Miri Awonsi'ki Isaan
Pokon I'pūrema'pū**

²³Tūnonkasa' kon a'tai, Pi'ta miri awonsi'ki Isaan enna'po'pū tūtonpa kon amū' koro'ta', ekamase'na tanporon ni use'man nito' tūrawasomanin nan epuru

ⁿ 4:11 Eren 118:22

ton eke ton kuru miri awonsi'ki itepuru ton uya ta'pə tupi'nokon nū'pə. ²⁴Seri etasa' tūuya'nokon a'tai, to' ipūrema'pə isewan ya' tenai' Papa pi'. "Itepuu, Imiri nukoneka'pə Epən miri awonsi'ki non miri awonsi'ki parau miri awonsi'ki tanporon ni miri yawon. ²⁵Ausauokū'pə Wakū A'kwarū awiri ina tamokori, ipoitorū Tepi' poro ri, se kasa tukai':

“ 'I'ri pi' Esuwerū amū' pen usakorota;
i'ri pi' ka'pon amū' e'kama, epoton kon kasa ri?

²⁶Kin amū' e'kama, miri awonsi'ki non esanon ni amūra isipokon pe,

Papa, Itepuu miri awonsi'ki inanūmū'pə, Kūrai° ewa'nomase'na,^p tukai'. ²⁷I'napai ri Era' miri awonsi'ki kopūna Ponsiyas Paire' pokon amūra'pə Esuwerū amū' pen ka'pon amū' Esuwerū pon kon pokon pe seri pata yau, wakū ayapiyo' Sises ananūmū'pə ewa'noma pi' te'to' kon pe ekonekai'. ²⁸To' amūrasa' tanporon ni imeruntirū miri awonsi'ki iyaseru awiri iye'ku'to' pe inkupū'pə ku'se'na. ²⁹Miripan, seri pe si enki, Papa: ina enari'pa to' uya; ina, ipoitorū ton iku'ki wakū

pe, tepiyi'se pūra amaimu ekamato' pe ina uya. ³⁰Iyemiyatū tinkai' ri usepi'tin iku'ki, tiwi i'tuto' ipikiri miri awonsi'ki a'kwarūpi'nin niri iku'ki, wakū ipoitorū Sises ese' yau,” tukai' to' ipūrema'pə.

³¹Tūwipūrema kon tūpo, to' e'nonkasa' a'tai, to' e'to' yau usi'ki'ma'pə. Tanporo to' uta'kwarū'ti'pə Wakū A'kwarū ke, miripan kon uya Papa Maimu ekama'pə tepiyi'se pūra.

Sises Apurinin Nan Esi'pə Amūre' Ton Pen

³²Sises apurinin nan esi'pə tikin ni ri isenuminkato', tikin ni ri itewan. Inū' uya ri uiwano' seri ta pūra ri, e'tane tiwano' kon ke ri te'repasan pe to' esi'pə. ³³Merunti pe kuru esii'ma enno'sa' kon uya Itepuu Sises e'mūsa'ka'pə terikū'pə apai ekama'pə, miripan kon pona eke pe ri wakū nonkasa' tanporo to' pona. ³⁴Inū' ri tekota'masen kuru ri pūra iyese'pə to' koro'tau, kamoro tūmainarū ke, tiwū' ke ri te'san uya ikurūpo'pomapitū'pə, miripan epe'pə rū'pə ne'pitū'pə to' uya ³⁵enno'sa' kon ena', miripan ekanpitū'pə to' uya to' kaisa ri ipūra kuru to' esi pi' tense.

³⁶Miri kasa si, Ilose' esi'pə miri, Ripai pa rū'pə pe te'sen, Sai'pūras po iyentusa' rū'pə, Panapas tukai' enno'sa' kon nesakūnū

° 4:26 *Kūrai* (Kiri' maimu yau), miri pe pūra *Me'saya* (Ipuu maimu yau), asa'ri ri mari iyese, *Papa Nanūmū'pə* ta e'kwa pe. ^p 4:25-26 Eren 2:1-2

4:24 E'sotas 20:11; Ne'imaya 9:6; Eren 146:6

4:27 Ma'siu 27:1-2; Ma' 15:1; Ūru' 23:1; Isaan 18:28-29 4:32 Inkupū'pə 2:44-45

(Pori'mapi'nin ta e'kwa pe).
 37Tumainaru kurupo'poma'pu iya,
 miripan epe'pu nee'pu iya enno'sa'
 kon ena'.

Ananayas, Ino'pu Sa'paira

5 ¹Ananayas, ino'pu Sa'paira uya kanan tunono kon kurupo'poma'pu. ²Itepe'pu tonpa'ka'pu to' uya tano'pu ya' ri esil'ma tiwano' kon pe iye'to' pe, miripan tonpa'pu nee'pu iya enno'sa' kon ena'. ³Miri a'tai, Pi'ta uya ta'pu, "Ananayas, i'ri pe iyese pi' iri ri Se'tan^a ewonsa' iyewan ya, kasi pe ri Waku A'kwaru enku'ti pa, miri awonsi'ki itonpa ri kupu'pu esil'ma ipiyau? ⁴Ikurupo'poma auya wapiya pe' iiwano' pe iyese'pu pen miri? Miri awonsi'ki ikurupo'poma tupo, itepe'pu esi'pu iiwano' pe pen ni pe' miri? I'ri pe iyese pi' tuku'sen pen ni kupu'pu auya? Ka'pon amu' pi' pe' kasi pe iwe'sa' pe ekama auya e'tane, kasi pe iwe'sa' Papa pi'," ta'pu iya. ⁵Seri etasa' tuuya a'tai, Ananayas uta'mo'ka'pu eke' pe, miri awonsi'ki ipan pe ri seri etanin nu'san enari'numu'pu iye'ku'sa' ru'pu pi'. ⁶Miri tupo, moine ton warawo' amu' uyee'pu itekepu ontise'na, miripan enpa'ka'pu to' uya iu'na'tito' pe tuuya'nokon.

⁷Osoruwau ite'kwa kura' emiya era'tisa' tupo'ne ri, ino'pu uyee'pu, i'ri e'ku'sa' tukai' i'tu iya pura iyese'pu. ⁸Pi'ta uya ekama'po'pu,

"Seri riken pe' Ananayas ya' inono kon epe'pu pe ineporo'pu kon?" ta'pu iya.

"Ewai', miri riken itepe'pu," ta'pu iya.

⁹Pi'ta uya ta'pu ipi', "I'ri pe iyese pi' Itepuru A'kwaru i'tupitu kon pa iyekoneka'pu kon?" ta'pu iya. "Apu'ne enki, ataan'pu u'na'tinin nu'san ni mari esi moro mura'ta nau, miri awonsi'ki to' uya ri mari iyenpa'ka miri," ta'pu iya. ¹⁰Miri a'tai ri, ipiyau ita'mo'ka'pu eke' pe, miripan moine ton warawo' amu' ewomu'pu itekepu ekare pi'. Itekepu ari'pu to' uya iu'na'tito' pe itaan'pu piyau ri. ¹¹Miri pi', ipan pe ri Sises apurinin nan miri awonsi'ki tanporon kon seri etanin nu'san enari'numu'pu.

Enno'sa' Kon Uya E'ne' Ton Epi'ti'pu

¹²Enno'sa' kon uya tu'kan ni i'tuto' ipikiri miri awonsi'ki a'kwarupi'nin kupu'pu ka'pon amu' koro'tau, miri awonsi'ki tanporon kon Sises apurinin nan pe te'san esi'pu puroro'i po, Saraman Epa'kato' Iya' tato' tau. ¹³Tanporon kon ni esi'pu ipiyi'ke' pe to' koro'ta' enapai pura, ka'pon amu' uya ipan pe ri to' nama tane. ¹⁴Miri koro'tau ri, tu'kan kon warawoti'si amu' miri awonsi'ki uri'sami'si amu' uya ri Itepuru apuri'pu, miri awonsi'ki to' tonpa pe to' era'ti'pu. ¹⁵Miri pe iyese pi', ka'pon amu' uya e'ne' ton

^a5:3 *Se'tan*—Makoi ese' isakon, *Papa eseru ewaruma'tinin* ta e'kwa pe.

nepŭ'pŭ, asanta ta' to' nonka'pŭ to' uya to' e'kwe' po'ne to' apon po'ne ri, Pi'ta uti a'kwarŭ'pŭ uya ri to' epi'tito' pe. ¹⁶Anpisiin ka'pon amŭ' Surusiran woi tŭuko'mansan uya e'ne' ton, makoi a'kwarŭ yen ton ni nee'pŭ, miripan kon usepi'ti'pŭ.

Enno'sa' Kon Ekota'ma'pŭ

¹⁷Miripan Papa ena' use'man nito' tŭrawasomanin nan epuru miri awonsi'ki tanporon kon iya'kiri te'san Satu'si amŭ' tonpa ton ikintato' esi'pŭ ipan pe to' pi'. ¹⁸To' uya enno'sa' kon a'si'pŭ, miripan kon uya to' tŭrŭ'pŭ pariki'si ta'. ¹⁹E'tane ewarupi nau, Papa inserŭi uya pariki'si mŭra'taai a'koka'pŭ, miripan uya to' enpa'ka'pŭ. ²⁰“Esuwerŭ amŭ' use'mato', ipŭremato' iwŭ' ta' entanti', ka'pon amŭ' pi' tanporo seri main ekamatanti' emenna' pe uko'man nito' ekareei,” ta'pŭ iya. ²¹Pata ema'sa' a'tai, to' ewomŭ'pŭ Esuwerŭ amŭ' use'mato', ipŭremato' iwŭ' ta' tauro'ka'pŭ kon awiri ri, miri awonsi'ki to' e'sara'ti'pŭ ka'pon amŭ' enupa pi'.

Papa ena' use'man nito' tŭrawasomanin nan epuru miri awonsi'ki itonpa ton uye'sa' a'tai, Esuwerŭ amŭ' Konsŭrŭi ton ki'ma'pŭ to' uya—tanporo Esuwerŭ amŭ' epuru ton—to' amŭ'rato' pe. To' uya Esuwerŭ amŭ' use'mato', ipŭremato' iwŭ' erasu pe te'san ennoko'pŭ pariki'si ta' a'sisa' rŭ'san enpa'kase'na.

²²E'tane to' utisa' pariki'si ta' a'tai, to' eporo to' uya pŭra iyesi'pŭ. Miri pi' to' enna'po'pŭ isekamase'na, ²³“A'kopi'sa' pe kuru ri pariki'si eporo'pŭ ina uya iterasu ton ni e'soto'pi'sa' esi'pŭ mŭra'ta nau, e'tane ina uya a'kokasa' a'tai, inŭ' pŭra iyesi'pŭ itau,” ta'pŭ to' uya. ²⁴Seri tawon eta tŭuya a'tai, Esuwerŭ amŭ' use'mato', ipŭremato' erasu ton epuru miri awonsi'ki Esuwerŭ amŭ' use'mato', ipŭremato' epuru ton usenu'mere'ma'pŭ miri, “I'ri ri si e'kupŭ'pŭ seri ko? I'ri pe to' esi'pŭ?” tukai'.

²⁵Miripan e'tane, ka'pon uyee'pŭ, “Apŭne enti', pariki'si ta' ana'si'pŭ kon amŭ' e'soto'pi'sa' use'man nito', ipŭreman nito' iwŭ' tau ka'pon amŭ' enupa pi',” tase'na. ²⁶Miri a'tai ri, erasu ton epuru uti'pŭ tŭtonpa ton pokon pe enno'sa' kon ne'se'na. To' ta'kwarŭkai' to' inne'pai pŭra to' esi'pŭ, apŭne pŭra ka'pon amŭ' uya tŭwini kon ti' ke tukai' to' usenari'pa'pŭ.

²⁷Enno'sa' kon nepŭ'pŭ to' uya Esuwerŭ amŭ' Konsŭrŭi ton piya', Papa ena' use'man nito' tŭrawasomanin nan epuru uya to' ekama'popi'to' pe. ²⁸“E'se'ne' pe ina uya ta'pŭ ipi'nokon, ‘Sises ese' pi' ka'pon amŭ' kusenupa-tŭu,’ ta'pŭ e'tane ri, pata Surusiran emŭ' wisa' auya'nokon enupan nito' auya'nokon ike ke miri awonsi'ki tŭmakooi ke ina esi pŭse ri mŭnŭ uriya' ta auya'nokon,” ta'pŭ iya.

29Pi'ta miri awonsi'ki itonpa ton uya imaimu eiku'pū, “Papa Maimu awiri ina e'to' pe iyese, ka'pon maimu awiri pen. 30Papa, ina tamokori ton e'to' itese' pi', Sises i'mu'sa'kanin nū'pū iyeri'sa' apai inwini'pū kon tūpokapi'se yūi pona. 31Papa uya i'mu'sa'kasa' tenwo'netu wini, iku'sa' iya esa' wanni pe miri awonsi'ki pika'tinin pe, Esuweru amū' ra'tinin pe, to' makooi pi' isentu'ma ke. 32Seri e'kupū ennin nū'san ina, Waku A'kwaru uya ri niri ene'pū, Papa nūturū'pū tūmaimu awiron kon ena',” ta'pū to' uya.

33Seri eta tūuya'nokon a'tai, ipan pe ri to' usakorota'pū, miri awonsi'ki to' ri inwipai to' ena'pū, 34e'tane Pari'si, Main pi' enupanin nan tonpa, Kamariyeru itese', ka'pon amū' nūnamanu ri e'soto'ka'pū to' piya', “Apūne rū'kwī, kamoro warawo' amū' enpa'kati' aka'ne' pe,” ka'se'na. 35Miripan uya to' auro'ka'pū, “Esuweru amū', inkupūnū kon ti'tui' e'ti' pūsamoro ka'pon amū' pi'. 36Pena sa'ne Tiyotas itese' ka'pon esi'pū inū' pe ri e'kupū i'se. Tu'kan kon ni ka'pon amū', 400 kaisaron kon era'ti'pū ipoitoru pe. Iwini'pū to' uya, miripan poitoru ton nū'san e'ta'nūku'pū, miri awonsi'ki i'ri pūra ri iyese'pū. 37Kūri ri e'ma'pū ta', Isutas, Kiyarari ko' kanan esi'pū, ka'pon amū' ese' menukapi'to' a'tai, miri awonsi'ki ka'pon amū' kanan anin pe iyese'pū. Kūri ri kanan wini'pū to' uya, miripan poitoru

ru'san e'ta'nūku'pū. 38Miri pe iyese pi', seri pe na'ne' pi' kapai e'ai ipi'nokon: tiwi pūsamoro warawo' amū' nesii; tiwi to' nūtii. Seri te'ku'sen esi a'tai ka'pon eseru pe, iye'kupū pūra iyese miri. 39E'tane Papa winon pe iyese a'tai, inū' uya ri pūsamoro ereutanūku pūra ri iyese. Papa ewa'noma auya'nokon pe ri iye'to' oton,” ta'pū iya.

40Seri ta iya pi', “Ewai' ri ka'wa,” ta'pū to' uya. Enno'sa' kon ki'ma'pū to' uya, miripan kon ari'po'pitu'pū to' uya, miripan kon uya ta'pū to' pi', “Sises ese' yau kasauro'tūu seri tūpo,” ta'pū to' uya. To' utito' pe to' nonka'pū to' uya. 41Enno'sa' kon uti'pū Esuweru amū' Konsurūūi ton piyapai. Pori' pe to' esi'pū, apūne pūra Papa pona waku pe ri iyese pi' to' ekota'ma Sises ese' wenai. 42Miri awonsi'ki wūi kaisari ri Esuweru amū' use'mato', ipūremato' iwū' tau, ka'pon amū' iwū' tau'ne tereutai' pūra ri, Sises pi' to' enupa pi' to' esi'pū, waku itekare ekama pi' to' esi'pū, Sises esi Papa Nanūmū'pū, tukai'.

7 Kaisaron Kon Utanūmū'pū

6 1Miri a'tai, tu'ke ri Sises apurinin nan tu'kanoro epirikū'pū. Kiri' pe tūsauro'san Esuweru amū' miri awonsi'ki patawon amū' Esuweru amū' pokon pe to' e'manenpato' esi'pū, kiyari ke tūtonpa kon uri'sami'si amū' itaan'pū ima'tasa' kon ini to' uya pi'. 2Miri pi' si ka'pon

amü' amüranüku'pu 12 kaisaron kon uya tanporon kon Sises apurinin nan, miri awonsi'ki ta'pu to' uya, "Iye'to' pe püra iyesi miri upona'nokon Papa Maimu tekamai' püra turon ni pi' e'ni a'tai usekan ni pi' ri. ³Utonpa ton, 7 kaisaron kon ka'pon amü' epoti' i'koro'tapai'nokon, i'tunin nan pe kuru ka'pon amü' ni'tunü ton, Wakü A'kwarü ke ita'kwarü'tisa' kon, seri i'se e'nito' tūrawasomanin pe te'ton kon, ⁴ipüreman pi' pari ina e'to' pe ka'pon amü' enupa pi' Papa Maimu ke," ta'pu to' uya.

⁵Tanporon kon epori'ma'pu enno'sa' kon maimu pi', miripan kon uya si Si'tipün anümü'pu Papa Maimu apurinin ye' kuru, Wakü A'kwarü yen; Piri' ri kanan to' tonpa pe; turon kon Püro'koras; Ni'kanorü; Timon; Parämenas; Ne'koras, Antiyo' winon, iyera'tisa' rü'pu Esuwerü amü' tonpa pe. ⁶To' uya si püsamoro anüsa' kon nü'san tūrü'pu enno'sa' kon piya', to' püremato' pe si to' uya, tūturawasooi kon si ku'to' pe to' uya.

⁷Miripan Papa Maimu usekama'pu miyari ri tu'kan kon pi' ri tu'ke ri Sises apurinin nan tu'kanoro epirikü'pu Surusiran po. Use'man nito' tūrawasomanin nan ni era'ti'pu tu'ke kuru ri Sises uya enupan nito' awiri te'to' kon pe.

Si'tipün A'si'pu To' Uya

⁸Si'tipün, eke ri Papa uya wakü nonkasa' esa' miri awonsi'ki tūmeruntirü kenan uya, eke pe ri a'kwarüpi'nin miri awonsi'ki i'tuto' ipikiri ri kupü'pu ka'pon

amü' koro'tau. ⁹E'tane turon kon ka'pon amü' Esuwerü amü' usenupato' iwü' tau te'san tonpa ton Inonkasa' Kon tukai' tesa'san, Esuwerü amü' pe ri te'san, Sairini miri awonsi'ki Arisantiriya winon kon ena'pu ewa'noma pi'. Kamoro miri awonsi'ki Esuwerü amü' Siri'siya miri awonsi'ki Eisa Märe'pu winon kon pokon pe te'sepose Si'tipün pokon pe to' e'sei'pitu'pu. ¹⁰E'tane ipoken püra ri iyesi tato' ipikiri püra ri iyesi'pu, apüne püra isaurokü pi' i'tunin pe kuru Iya'kwarü uya iku'sa' ke.

¹¹Miripan kon uya ama'ai ka'pon amü' anümü'pu eseru'tinin nan pe, "Si'tipün eta'pu ina uya Mosi' miri awonsi'ki Papa sapema pe ri isaurokü'pu," taton kon.

¹²Miripan kon uya ka'pon amü', Esuwerü amü' epuru ton miri awonsi'ki Main pi' enupanin nan ni tūrunka'pu. To' uya Si'tipün a'si'pu, miripan nepü'pu to' uya Esuwerü amü' Konsüruüi ton piya'. ¹³To' uya kasi pe ri Si'tipün eseru'tisa' tūuya'nokon nü'pu ekama'pu Konsüru amü' pi'. "Iyereuta püra ri püse ri usauro'ni pi' man iri pe use'man nito', ipüreman nito' iwü' pi' miri awonsi'ki Main, Mosi' winon pi'. ¹⁴Ina uya etasa' man ta iya püse ri Sises, Nasare' pon uya seri pata ma'tanüku tawon. Miri awonsi'ki ensima iya uko'man ni eseru Mosi' nütürü'pu uyena'nokon," ta'pu to' uya.

¹⁵Tanporo ense'na iyamürasa' kon Esuwerü amü' Konsüruüi ton iwü' ta' uya enpitu'pu itemü' poi

ri, miripan kon uya itemu' ene'pu inseru emu' kasa ri.

Si'tipun Uya Esuweru Amu' Konsuruai Ton Auro'ka'pu

7 ¹Miri a'tai, use'man nito' tarawasomanin nan epuru uya Si'tipun ekama'po'pu, "I'napai ri pe' ka'pon amu' nusauro'ai'ne' ipi' esi?" tukai'.

²Si'tipun uya imaimu eiku'pu, "Imiri'nokon, tunamasan itepuru ton, apune etati'. Papa usenpoika'pu Epura'an piya' Me'sa'po'temiya po Eran pona iti rawiri. ³'Apata'se' miri awonsi'ki itonpa ton ininki, itiki miri non sekamayai'ne' ya','⁷ ta'pu Papa uya ipi'.

⁴"Miripan uya Karutiya pon kon nimi'pu. Eran po iyepatama'pu. Ikuipunu uma'ta'pu tupo, Papa uya ennoko'pu seri muko'manyatui'ne' ya'. ⁵E'tane inturunu pe te'sen itimamin tusa' iya pura iyesi'pu, e'tane Papa usauroku'pu iku'to' pe uya tukai', 'Imiri, miri awonsi'ki apayan nus'an, Esuweru amu' uya non epoto' oton.' Miri a'tai, imure pura Epura'an esi'pu. ⁶Miri tupo, Papa usauroku'pu, 'Apayan nus'an, Esuweru amu' e'to' oton ka'kuran pe taron kon pata yau. Miri yau, tapiyo' kon pe to' e'tane, to' kota'mato' oton to' uya 400 kaisa ri wuipiya, ⁷e'tane uri uya miri eke pata kota'mato' oton. To' epa'kato'

oton miri eke pata yapai, seri pata ya' uyapuripi'se'na,'^s ta'pu Papa uya. ⁸Miri a'tai, Papa uya Epura'an auro'ka'pu tanporo warawo' amu' uya tayun kon pi'pi puturakapi'to' pe, tumunki pe to' esi ekamanin pe. Miri a'tai, Aisi', Epura'an mu entu'pu, ⁸kaisa ri wui tupo, itun pi'pi puturaka'pu iya. Miri tupo, Aisi' mu, Seko' entu'pu, miripan yun pi'pi puturaka'pu iya. Seko' uya niri 12 kaisaron kon tumunki amu' yun pi'pi puturakapitu'pu.

⁹"Isose' esi'pu to' tonpa pe. Irunan ni ikinta'pu Isose' pi', miripan kon uya ikerupo'poma'pu Isi' yawon kon poitoru pe. E'tane Papa esi'pu iya'kiri, ¹⁰miripan uya ipika'ti'pu tanporo ewankamanin apai. Isose' repa'pu iya ipu'ketu ke, miripan uya iku'sa' esi'pu waku pe kin Peero ewakiri pe. Miri a'tai, Peero uya Isose' kupu'pu tanporo Isi' miri awonsi'ki tapata'se' epuru pe.

¹¹"Miri a'tai, iwankan uta'mo'ka'pu tanporo Isi' miri awonsi'ki Kenan pata pona. Miri a'tai, ka'pon amu' apu'kaa'pu iwan pi', utamokori kon amu' ri enta'nato' ipi' pura iyesi'pu, miripan uya eke ri ewankamanin nee'pu. ¹²Seko' uya eta'pu, 'Kiyari esi Isi' po,' tawon, miripan uya tumunki amu', utamokori kon amu' ennoko'pu kiyari ennase'na.

^r7:3 Iseneses 12:1 ^s7:7 Iseneses 15:13-14; E'sotas 3:12

7:4 Iseneses 11:31; 12:4 7:5 Iseneses 12:7; 13:15; 15:18; 17:8

7:8 Iseneses 17:10-14; 21:2-4; 25:26; 29:31-35:18 7:9 Iseneses 37:11-28; 39:2, 21

7:10 Iseneses 41:39-41 7:11 Iseneses 42:1-2

13 Iyakon ite'kwa pe to' utisa' a'tai, Isole' usekama'pu tarui ton pi'. Miri a'tai si, Peero uya Isole' tonpa ton i'tu'pu miri. 14 Seru tupo, Isole' uya tumaimu ennoko'pu tukupunu uye'to' pe tanporo tatonpa ton pokon pe Isi' pona. 75 kaisa ri tanporo to' esi'pu. 15 Miri a'tai, Seko' uti'pu Isi' pona, miripan uma'ta'pu. Imunki amu' ri niri uma'tapitu'pu miri yau. 16 To' ekepu nee'pu to' uya Si'ken pona, miripan kon u'na'tipitu'pu to' uya Epura'an ne'ma'pu yau Amoru munki amu' wini, Si'ken po.

17 "A'ko pe iweyu uyepu koro'tau, Papa uya tusauroku'pu ku'to' pe Epura'an pi', tu'ke kuru utonpa kon amu' epansa' esi'pu. 18 Miri a'tai, taron ni kin, Isole' i'tunin pen ena'pu Isi' epuru pe. 19 Kari ri e'kupu'pu to' wanmura iri pe to' ma'tanuku pi', uri'nokon tamokori ton kota'ma'pu to' uya. To' apiyo'ma'pu to' uya tentusan mure amu' eno'mato' pe to' uya, to' uma'tato' pe.

20 "Miri koro'tau, Mosi' entu'pu. Waku pe ru'kwi iyese'pu, mure e'pito' kasa pura. Osoruwau kapu' to' uya imainanpa'pu ikupunu iwu' tau. 21 To' uya enpa'kanu'sa' a'tai, Peero ensi uya anumu'pu, miripan emo'ka'pu iya tumure kasa kuru ri. 22 Mosi' usenupasa' esi'pu tanporo Isi' pon kon eseru yau. Imaimu,

miri awonsi'ki inkupunu esi'pu merunti pe.

23 "40 kaisa ri iwupiyaa' Mosi' enasa' a'tai, tatonpa ton ka'kuranpa pi' iye'kupu'pu. 24 To' tonpa Esuweru pon wipitu' Isi' ko' uya ene'pu iya, miripan uti'pu Esuweru pon pika'tise'na. Miripan e'ma'pu Mosi' uya, Isi' ko' tawise. 25 Mosi' usenuminka'pu tatonpa ton uya tato'ka'nuku tukai' Papa uya tuku'sa' to' pika'tinin pe tukai', e'tane to' uya ito'ka'nuku pura iyese'pu. 26 Miri ema'sa' yau, Mosi' uya asa'ron kon Esuweru pon kon epanta'ma ene'pu, to' epanta'ma ereutanuku i'se iyese'pu. Ta'pu iya to' pi', 'Warawo' amu' isitonpa pe iwesi kon miri. Itonpa ku'wipitu', ta'pu iya to' pi'.

27 "E'tane warawo' tatonpa wipi'nin uya Mosi' a'tu'ma'pu, 'Inu' uya iku'sa' ina epuru pe, miri pe pura ina eseru aimenkanin pe? 28 Uwipai pe' iwesi Isi' ko' wini'pu auya kasa ko'mamiyau?' tai'ma. 29 Mosi' uya miri etasa' a'tai, iyapurumu'pu Metiyan pona. Miri yau, iko'mamu'pu ka'kuran pe. Miri yau, asa'ri imu'ta'pu.

30 "40 kaisa ri wupiya tupo, inseru usenpoika'pu Mosi' piya' yu' epo'ti yau, rimono' tau, a'ko pe Sainai Wupu piyau. 31 Miri ensa' tuya a'tai, ipan pe isewansiuka'pu yu' epo'ti pura iyese pi'. A'ko pe iwiniku' iti koro'tau, Papa maimu

7:13 Iseneses 45:1-16 7:14 Iseneses 45:9-10, 17-18; 46:27

7:15 Iseneses 46:1-7; 49:33 7:16 Iseneses 23:3-16; 33:19; 50:7-13; Isens 24:32

7:18 E'sotas 1:7-8 7:19 E'sotas 1:10-11; 22 7:20 E'sotas 2:2 7:21 E'sotas 2:3-10

7:23-29 E'sotas 2:11-15; 18:3-4

eta'pū iya: ³²‘Papa uri, atamokori kon Epūra'an, Aisi', miri awonsi'ki Seko' e'to' itese' pi'.’^t Mosi' enari'nūmū e'tititi'ka'pū, inenpai pūra. ³³Miri a'tai, Papa uya ta'pū ipi', ‘Asapatooi imo'kaki! Miri iye'mū'sa'kasa' na'ne' yau esi wakū pe. ³⁴Umunki amū' ekota'ma ensa' uya man Isi' po. To' a'nūmū etasa' uya man. Miri pi' uye'sa' man to' mo'kase'na. Inke pūra isi'ki; iyennoko uya seri Isi' pona' ta'pū iya ipi'.

³⁵‘Pūse ri Mosi' Esuwerū amū' newaruma'ti'pū, ‘Inū' uya iku'sa' ina epuru pe, ina eseru aimenkanin pe?’ ta'pū ipi' rū'pū, kūrī ri ennoko'pū Papa uya to' epuru pe, to' pika'tinin pe niri, inserū wini isenpoikasa' rū'pū yu' yau. ³⁶Mosi' kūrī ri utamokori kon amū' anin nū'pū inni Isi' apai, a'kwarūpi'nin miri awonsi'ki i'tuto' ipikiri ri kupū'pū iya, Papa uya imeruntii tūsa' esi'pū. Miri ton kupū'pū iya Isi' po, Isuweyu Parau kau miri awonsi'ki rimono' tau niri 40 kaisa ri wūipiya yau.

³⁷‘Pūse ri Mosi', Esuwerū amū' auro'kanin nū'pū, ‘Papa uya pu'kena' anūnto' oton i'korotapai'nokon uwaraino,' tawon nū'pū.’³⁸ Pūse ri Mosi' esi'pū to' korotau rimono' tau. Inserū, Papa winon uya auro'ka'pū Sainai Wūpū po. Main, uko'man nito' ipi' ekama'pū iya ipi'.

³⁹‘E'tane utamokori kon amū' uya apuri pūra iyesi'pū. To' uya inurunpa'pū. Tewan kon yau, enna'popai to' esi'pū Isi' pona. ⁴⁰Eran auro'ka'pū to' uya, ‘Papa tato' ipi' pe ika'sa' inkoneka', uyanin kon pe te'ton. Pūse ri Mosi', une'nin nū'pū kon Isi' apai e'tane, i'ri pe ri nawon iyesi'pū tukai' ina uya i'tu pūra man!’ ta'pū to' uya.’⁴¹ Miri a'tai, to' uya papa tato' pe ipi' ika'sa' koneka'pū paka mūre kasa, tūse'mato' kon nee'pū to' uya ipiya', miripan kon userenka'pū, to' umanumū'pū tūnkoneka'pū kon nama tūuya'nokon ekamanin pe. ⁴²E'tane Papa usakorotasa' era'ti'pū to' piyapai, apūne pūra papa tato' ipi' ika'sa' konekasa' to' uya wenai. To' nonka'pū iya to' ipūremato' pe wūi enu, kapūi, miri awonsi'ki siriki amū' pi'. Seri e'menukasa' esi'pū pu'kena' karetaai yau:

“ ‘Esuwerū amū' rū'kwī, seri iuse'mato' kon nepū auya'nokon pūra iyesi'pū uyena' 40 kaisa ri wūipiya rimono' tau iwesi kon a'tai.

⁴³Papa tato' pe ipi' ika'sa' More' iwū' apitū'pū auya'nokon, siriki pe ika'sa' ka'pon amū' nesakūnū Re'pan tukai'.

†7:32 E'sotas 3:6 †7:37 Isu'taronomi 18:15, 18 †7:40 E'sotas 32:1

7:30-34 E'sotas 3:5, 7-8, 10 7:35 E'sotas 2:14 7:36 E'sotas 7:3; 14:21; Nonpa 14:33
7:38 E'sotas 19:1-20:17; Isu'taronomi 5:1-33 7:41 E'sotas 32:2-6

Ika'sa' iwipuremato' kon
ipi'.

Miri pe iyese pi', iyenno'to'
uya 'nokon oton
inni'™ Paperan enta'.

44“Utamokori kon amū' piyau
Papa uya amuranū'nito' ita' esi'pū
rimono' tau. Iyekonekasa' esi'pū Mosi'
pi' Papa nekama'pū awiri. Ikonekato'
ipi' pe tūnene'pū kasa. 45Utamokori
kon amū' uya miri amuranū'nito'
ita' eporo'pū tūkūipūnū kon wini,
miripan ari'pū to' uya ta'kiri'nokon
Isa'suwa a'kiri tūuti kon a'tai non
mo'kai'. Miri non mo'ka'pū to' uya
tūron kon ka'pon amū' enapai. Papa
uya to' ainūnpa'pū Esuwerū amū'
uya non mo'kato' pe. Iko'mamū'pū
miri pata yau Tepi' weyu e'seporo
pona ri. 46Kūri ri Papa ewakiri pe
iye'sa' rū'pū, miripan uya Papa
ekama'po'pū iūti amito' pe tūuya
tūmiri pe. 47E'tane Saraman uya
kuru iūti ami'pū.

48“Miripan e'tane, Papa esi eke pe
ka'pon nami'pū tau tūuko'mansen
pen. Pu'kena' amū' tonpa uya tasa',

49“ Epūn esi uyapon pe,
non esi u'ta apon pe.

I'ri warai iūti ami
auya'nokon uiwū' pe?
ta Itepuru uya.

Miri pe pūra nai yau
umoronka'to' pata'se' esi?

50Unkoneka'pū ton pen pe' se
ton tanporon ni?'x

51“Imiri'nokon iri ton ni, sa'man
ton ni iyewan kon! Imiri'nokon
e'makoima atamokori kon amū'
esi'pū kasa. Iuko'mamū kon Wakū
A'kwarū ewaruma'ti pi'. 52Atamokori
kon uya wapiyaro' kon pu'kena'
amū' kota'ma'pū. To' uya ri Ipokena'
Ka'pon uyepū ekamanin nan ta'ka'pū.
Seri pe si eparanka'pū auya'nokon
iteyaton non ena' to' uya iwito' pe.
53Imiri'nokon uya Papa Maimu
eporo'pū miri, Papa nūturū'pū
atamokori kon ena'. Inserū amū' uya
miri tūru'pū atamokori kon ena'. Miri
e'tane, iyawiri pūra iwesi kon,” ta'pū
Si'tipūn uya to' pi'.

Ti' Ke Si'tipūn Wini'pū To' Uya

54Esuwerū amū' Konsūruūi ton
uya pūse ri Si'tipūn maimu etasa'
a'tai, ipan pe to' usakorota'pū.
Miri a'tai, to' uya tūyi kon
kititii'ma'pū, ipan pe tūusakorota
kon pe. 55E'tane, Si'tipūn uya eke
pe Wakū A'kwarū eposa' esi'pū,
ka'ta' tenu tūru'pū iya. Miri a'tai,
Papa a'kwarii ene'pū iya. Miri a'tai,
Sises e'mū'sa'kasa' ene'pū iya Papa
enwo'netū wini. 56“Apūne enti',
Papa uya Epūn mūra'taai a'kokasa'!
Sises e'mū'sa'kasa' esi Papa
enwo'netū wini!” ta'pū Si'tipūn uya.


57Eke pe to' uki'pi'nūnpitū'pū.
Tanporo to' uti'pū itekare pi',
temiyatū kon tūpitū'pū to' uya

™ 7:42-43 Emos 5:25-27 (LXX) x 7:49-50 Aisaya 66:1-2

7:44 E'sotas 25:9, 40 7:45 Isens 3:14-17

7:46 2 Sanwerū 7:1-16; 1 Kūrono'kūrus 17:1-14

7:47 1 Kin Amū' 6:1-38; 2 Kūrono'kūrus 3:1-17 7:51 Aisaya 63:10



To' e'sara'ti'pū eke ton ti' ma'kiri pi' ipona, iwini'pū to' uya. (7:58)

tūpana kon pona imaimu eta tūuya'nokon namai'. ⁵⁸To' uya tūpi'si'se enpa'ka'pū pata yapai, miripan kon e'sara'ti'pū eke ton ti' ma'kiri pi' ipona, iwini'pū to' uya. Ka'pon amū' iwini'nan nan uya tūpon kon pūro'pon kanka'pū, miripan nonka'pū to' uya non pona moineri'pi, Saarū piyau.

⁵⁹Ti' ke to' uya tūwini koro'tau, Si'tipūn ipūrema'pū, “Uyepuru, Sises, uya'kwarū anūnki!” ta'pū iya. ⁶⁰Tese'mu po ita'mo'ka'pū, eke pe iyipūrema'pū, “Uyepuru, to' kūkota'mai to' uya uwini pi'!” ta'pū iya. Miri ta tūpo, iyerikū'pū.

8 ¹Saarū esi'pū miri yau iwiti' ri ta pi'.

Saarū Uya Sises Apurinin Nan Kota'mapitū'pū

Miri a'tai, ka'pon amū' e'sara'ti'pū ipan pe Sises apurinin

nan kota'ma pi' Surusiran po tūuko'mansan. Miri a'tai, tu'kan kon Sises apurinin nan apūrumū'pū Isutiya miri awonsi'ki Sameriya pona. Enno'sa' kon niken e'ninsa' esi'pū Surusiran po. ²Papa uya tasa' kasa warawo' amū' uya Si'tipūn u'na'ti'pū, eke pe tūuta'kwarūkai' to' ukaramū'pū iwenai.

³Miri koro'tau, Saarū e'sara'ti'pū Sises apurinin nan ma'tanūkū pi'. Iyewonpitū'pū iuti kaisa ri'ne, warawo' amū', uri'san amū' niri Sises apurinin nan tūpitū'pū pariki'si ta'.

Piri' Uya Itekare Ekama'pū Sameriya Po

⁴Sises apurinin nan, ka'pon amū' nainūnpa'san Surusiran apai uti'pū pata kaisa ri wakū Sises ekareei ekama pi'. ⁵Sises apurinin nan tonpa, Piri' itese' uti'pū Sameriya

pata ya', miripan uya miri yau Kŭrai^y ekama'pŭ ka'pon amŭ pi'. ⁶Miri a'tai, tu'kan kon esi'pŭ ipan pe Piri' maimu inetapai, wakŭ i'tuto' ipi' inkupŭnŭ ensa' tŭuya'nokon pi'. ⁷Makoi^z a'kwarŭ ton epa'ka'pŭ ipirorŭnpitŭi'ma ka'pon amŭ' apai. Tu'kan kon ise'mesa' kon, sekentei'pa' nan usepi'ti'pŭ, apŭne pŭra Papa uya Piri' ku'sa' wenai to' epi'tinin pe. ⁸Tu'kan kon ka'pon amŭ' esi'pŭ ipan pe pori' pe miri pata yau.

Saiman, Enwoke'

⁹Miri yau iyese'pŭ ka'pon, Saiman itese', enwoke', eke pe te'ku'sen miri pata yau. Enwoke' pe tesi wini te'ku'sen pen ni ku'nin pe iyese'pŭ Sameriya yawon kon tewansiukai'. ¹⁰Tanporo ka'pon amŭ' miri yawon kon aiko ton miri awonsi'ki eke ton ni uya apuri'pŭ. "Pŭse ri ka'pon esi Papa meruntirŭ yau," ta'pŭ to' uya. Eke kuru tukai' ka'pon amŭ' uya esaku'pŭ. ¹¹Apuri pi' to' esi'pŭ, apŭne pŭra enwoke' pe tesi ke to' ewansiukapitŭ'pŭ iya, inke ri. ¹²E'tane nin si Piri' nekamanŭ wakŭ itekare, Papa e'to' esa' wannŭ pe, miri awonsi'ki Sises Kŭrai ese' ekareei apurisa' to' uya a'tai, warawoti'si amŭ' miri awonsi'ki uri'sami'si amŭ' epa'taisima'pŭ. ¹³Saiman uya ri niri Piri' maimu apuri'pŭ. Piri' uya ipa'taisima'pŭ tŭpo, ipikiri Saiman esi'pŭ mi airi

ri Piri' uti a'tai. Tiwiri ri Saiman usewansiukapitŭ'pŭ, i'tuto' ipi' miri awonsi'ki eke Papa turawasooi Piri' nŭkupŭnŭ tense.

¹⁴Surusiran pon kon enno'sa' kon uya etasa' a'tai, tu'kan kon Sameriya yawon kon uya Papa maimu apurisa' tawon, to' uya Pi'ta miri awonsi'ki Isaan ennoko'pŭ to' piya'. ¹⁵To' uya to' eposa' a'tai, to' ipŭrema'pŭ to' pona Wakŭ A'kwarŭ epoto' pe to' uya, ¹⁶apŭne pŭra Wakŭ A'kwarŭ uye'sa' pŭra ri mari iyese'pŭ to' pona. Piri' uya to' pa'taisima'pŭ esi'pŭ Itepuru Sises ese' yau riken. ¹⁷Miri a'tai, Pi'ta miri awonsi'ki Isaan uya temiyatŭ kon tŭrŭ'pŭ to' pona, miripan kon uya Wakŭ A'kwarŭ eporo'pŭ.

¹⁸Saiman uya ene'pŭ Papa uya Ta'kwarŭ tŭrŭ ka'pon amŭ' pona enno'sa' kon uya temiyatŭ kon tŭrŭ to' pona a'tai, pŭrata ke to' repa i'se iyese'pŭ. ¹⁹"Urepati' miri ku'nin ke. Miri a'tai, tanporo uyemiyatŭ tuto' uya ton ipona uya, Wakŭ A'kwarŭ epoto' pe," ta'pŭ iya.

²⁰Pi'ta uya imaimu eiku'pŭ, "Ipŭrataai pokon pe auma'ta miri, apŭne pŭra iusenuminka pi' Papa winon e'ma auya pŭrata ke tukai'!" ²¹Papa uya iku'sa' pŭra man i'ri ku'nin pe ina a'kiri seri turawasooi yau, apŭne pŭra iyewan esi wakŭ pe pŭra Papa pona. ²²Miri pe iyese pi', iri pe iusenuminkato' inonka' miri awonsi'ki iwipŭrema pa Itepuru pi'. Miri a'tai, ipi' isentu'ma uya

^y 8:5 *Kurai*, miri pe pŭra *Me'saya*—*Papa Nanŭtu'pŭ* ta e'kwa pe. ^z 8:7 *Makoi*, miri pe pŭra *iri*, Kiri' maimu yau.

amakooi eno'mato' pe ikupū i'se iusenuminka'pū na'ne'. ²³I'tu uya wenai ipan pe iyikinta ina pi' tukai', tiwi ri iye'makoima wini," ta'pū iya.

²⁴Miri a'tai, Saiman uya ta'pū Pi'ta miri awonsi'ki Isaan pi', "I'pūremati' upona. Miri a'tai, mukayatu'ne' ri e'kupū namai' upi'," ta'pū iya.

²⁵Pi'ta miri awonsi'ki Isaan uya ka'pon amū' auro'ka'pū tūpo, Sises i'tusa' tūuya'nokon nū'pū pi' itekare ekama'pū to' uya to' pi', Papa winon Sises ekareei, to' e'sara'ti'pū enna'pon pi' Surusiran winikūi'. Tūuti kon koro'tau, wakū Sises ekareei ekama'pū to' uya ka'pon amū' pi' Sameriya yawon eke iwa ton pata yau'ne.

I'tiyo'piya Kwin Pūrataai Esa'

²⁶Inserū, Papa nennoko'pū uya Piri' auro'ka'pū, "Ekoneka' iuti pa wūi enu enuku kamisi winikūi' Surusiran poino asanta Kesa ponakan ta'," ta'pū iya. (Miri asanta e'nonka'pū miri.)^a ²⁷Miripan ekonekasa' uti koro'tau, ka'pon eporo'pū iya miri asanta tau tūutisen, eke kuru ri I'tiyo'piya pata kwin pūrataai esa', Surusiran pona itisa' rū'pū ipūremai'. ²⁸Iyenna'po a'tai, iyereutasa' esi'pū tūkanwa tararan yau. Eke pe pu'kena' Aisaya nūmenuka'pū kareta ekama iya esi'pū. ²⁹Papa A'kwarū uya Piri' auro'ka'pū, "Enta miri tararan piyau a'ko pe e'se'na," tukai'.

³⁰Miri a'tai, Piri' uti'pū tararan piya', miripan uya eta'pū ekama iya pu'kena' Aisaya nūmenuka'pū yau. Piri' uya ekama'po'pū, "Mekamayai'ne' pe' mūto'ka'nū'an?" ta'pū iya.

³¹"Kane, ito'ka'nūku uya pūra man. Ka'pon uya ri nin enpoika a'tai, ito'ka'nūku uya ri," ta'pū iya. Miripan uya Piri' ki'ma'pū tūpiyau iyereutato' pe tūkanwa ya'. ³²Se tawon ekama pi' iyesi'pū:

"To' uya ari'pū karimeru ari kasa iwise'na.

Karimeru mūre kasa ti'po' akū'tane e'pana te'sen, miripan kasa isaurokū pūra iyesi'pū.

³³Se pe ri iye'ku'to' yau, inū' ri iwenaino' pūra iyesi'pū.

Inū' uya ri ipayan nū'san ekamato' oton pen ni, apūne pūra non po iko'manto' emo'ka'pū pi',"^b

tawon.

³⁴Kwin pūrataai esa' uya Piri' ekama'po'pū, "Ekamaki inū' pi' pu'kena' uya imenukasa'; tūmiri pi' pe', tūron ni pi' ri kati?" ta'pū iya.

³⁵Miri a'tai, Piri' epiya'ti'pū miri ri iye'menukasa' itekare apai wakū Sises ekareei ke ipana'ti pi'.

³⁶To' uti koro'tau asanta tawiri, tuna eporo'pū to' uya. "Apūne tuna enki! Upa'taisimaki. I'ri niri ken uwa'kutui'no miri apai?" ta'pū iya.

^a 8:26 *Miri asanta e'nonka'pū miri; miri pe pūra, Miri asanta esi rimono' ta' e'ma.*

^b 8:33 *Aisaya 53:7-8*



*“Ka'pon uya ri nin enpoika a'tai,
ito'ka'nukû uya ri.” (8:31)*

³⁷Piri' uya ta'pû, “Apuri auya a'tai tanporo iyewan a'kiri, iye'kupû ri,” ta'pû iya.

Miripan maimu eikû'pû iya, “Apuri uya seri Sises Kurai esi Papa Mu pe tukai,” ta'pû iya.^c

³⁸Miripan uya tararan ereuta-nukû'pû. Miri a'tai, asa'ri ri mari Piri' miri awonsi'ki kwin pûrataai esa' uti'pû tuna ka', miripan pa'taisima'pû iya. ³⁹To' ekanwaka a'tai tuna kapai, Itepuru A'kwarû uya Piri' ari'pû. Kwin pûrataai esa' uya ene pûra iyena'pû. Miri ri e'tane, iti'pû pori' pe esi'lma asanta tawiri. ⁴⁰Miri a'tai, Piri' esi ene'pû to' uya itekare ekama pi' Aso'tas po, siya ri pata kaisa ri'ne Sisariya pona ri.

Saarû Eporo'pû Sises Uya
(Inkupû'pû 22:2-16; 26:12-18)

9¹Miri koro'tau, Saarû usakorotasa' uya, “Sises poitorû ton tû'ka uya,” ta'pû. Saarû uti'pû Papa ena' use'man nito' tûrawasomanin nan epuru

piya' ²tekamanin kareta, Tamaskas pon Esuwerû amû' usenupato' iwû' ton ta' epose'na. Seri kareta uya Saarû ku'sa' esi'pû, Ite'ma awiron kon, warawoti'si miri awonsi'ki uri'sami'si a'sisa' ato' pe iya Surusiran pona.

³Ta'kiron kon pokon pe iti uya pata eporo koro'tau, Tamaskas itese', a'kwa, Epûn winon uya iwei'ti'pû. ⁴Ita'mo'ka'pû non pona. Miri a'tai, main eta'pû iya, “Saarû, Saarû, i'ri pe iyese pi' ukota'ma auya?” tawon.

⁵Saarû uya ekama'po'pû, “Inû' imiri, Uyepuru?” ta'pû iya.

“Uri Sises, inkota'manû,” ta'pû iya. ⁶“E'mû'sa'ka', itiki pata pona. Miri yau iyese miri ayauro'ka ton inku'ton pi',” ta'pû iya.

⁷Ka'pon amû' iya'kiri tûutisan e'takû'ka'pû, i'ri tai'ma pûra ri; miripan kon uya main eta'pû, e'tane inû' ri ene to' uya pûra iyese'pû. ⁸Saarû e'mû'sa'ka'pû non poi, e'tane i'ri ene iya pûra iyese'pû. Miri wenai, to' uya ari'pû itemiyatû pi' ta'sii' Tamaskas pona. ⁹Osorûwau wûi itenu pûra iyese'pû. Iyenta'na pûra, i'ri ri ensi iya pûra iyese'pû.

Ananayas, Itepuru Apurinin

¹⁰Miri yau iyese'pû Sises apurinin, Ananayas itese'. Ananayas enu uta'kwakasa' koro'tau, Itepuru maimu eta'pû iya, “Ananayas!” tawon. “Setayai' ri, Uyepuru,” ta'pû iya.

¹¹“Ekoneka', enta Isutas piya', To'saron itese' asanta ta',”

^c 8:37 37 airon pûra iyese miri tûron ni imenukasa' ton yau.

ta'pŕu Itepuru uya ipi'. “Inu' ri mekama'poi' miri yau, ‘Ka'pon, Saaru itese', Tarusas winon pe' seri yau nai?’ tukai'. Seri a'tai, ipureman pi' man. ¹²Itenu uta'kwakasa' uya ene'pŕu ka'pon, Ananayas itese' uyepŕu, temiyatu tuse'na tŕpona, ennin pe tenato' pe,” ta'pŕu Itepuru uya itenu uta'kwakasa' koro'tau.

¹³“Uyepuru, tu'kan kon ka'pon amŕu' uya uyauro'kasa' man, waku ton Papa nukupŕu'san ekota'mato' emapu'tisa' iya ipan pe Surusiran po. ¹⁴Papa ena' use'man nito' tŕrawasomanin nan epuru ton uya auro'ka'pŕu iye'to' pe Tamaskas pona iyese' pi' te'san a'sipi'se'na, to' ase'na Surusiran pona,” ta'pŕu Ananayas uya.

¹⁵E'tane, “Saaru piya' enta. Anansa' uya man uyapiyo' pe, uyekareei pi' Esuweru amŕu' pen, to' epuru ton, miri awonsi'ki Esuweru amŕu' auro'kato' pe iya. ¹⁶Uri wenai eke pe iyekota'mato' enpoika uya miri itenu ya,” ta'pŕu Itepuru uya Ananayas pi'.

¹⁷Miri a'tai, Ananayas uti'pŕu itau iye'to' iuti ta', miripan uya temiyatu tŕrŕ'pŕu Saaru pona. “Utonpa Saaru, Sises, asanta tau isenpoikasa' rŕ'pŕu iyena' uya uyenna'sa' man, ennin pe kanan iyena pa, auta'kwaru'ti pa niri Waku A'kwaru ke,” ta'pŕu iya. ¹⁸Miri ta iya pe ri, moro' pi'pi waraino uta'poku'pŕu itenu ton poi. Ennin pe kanan iyena'pŕu. Miri a'tai,

iye'mŕu'sa'ka'pŕu, miri pe ri Ananayas uya ipa'taisima'pŕu. ¹⁹Miripan enta'nasa' ena'pŕu pana' pe.

Tamaskas Po Saaru Uya Sises Ekareei Ekama'pŕu

Saaru uko'mamu'pŕu Sises poitoru rŕ'san piyau Tamaskas po. ²⁰Miri a'tai ri, itekare ekama pi' iye'sara'ti'pŕu, “Sises esi Papa Mu pe,” tukai'.

²¹Tanporo etanin nan usewansiuka'pŕu, “Pŕuse ri pen pe' pŕuse, Surusiran pon kon kŕri ri ese' pokon kon tŕ'kataine' pen? Iye'sa' kanan pen pe' se, kamoro a'sipi'se'na, miripan kon ase'na use'man nito' tŕrawasomanin nan epuru ton eke ton kuru ena'?” ta'pŕu to' uya.

²²E'tane miyari ri tŕnekamanu yau merunti pe Saaru ena'pŕu. Papa Maimu wini enpoika pi' iyese'pŕu, “Sises esi Kŕrai' pe,” tukai', miripan pi' to' utanpokuma'pŕu.

²³Inke Tamaskas po Saaru esi koro'tau, Esuweru amŕu' e'kama'pŕu iwini pi'. ²⁴Tŕwini pi' e'kamanisa' eta'pŕu Saaru uya. Wŕi nai, ewarupi nau niri mŕa'ta nau Saaru enupikiri to' esi'pŕu, iwito' pe tŕuya'nokon e'tane, to' uya iwini'pŕu pen. ²⁵Inenupanu ton uya ipika'ti'pŕu, ewarupi nau tŕpa'kai'. Miri a'tai, eke pa'siki'ti yau si'na' pi' to' uya inu'ti'pŕu pata wekupiri euta yai.

⁹9:22 *Kŕrai* (Kiri' maimu yau); miri pe pŕa, *Me'saya* (Ipuru maimu yau), asa'ri ri mari iyese, *Papa Nanumu'pŕu* ta e'kwa pe.

9:18 Topayas 11:13-15 9:25 2 Koren 11:32-33

**Panapas Uya Saaru Ekama'pū
Surusiran Po**

²⁶Surusiran pona Saaru epa'kasa' a'tai, Sises poitoru ru'san tonpa pe kuru enapai iyese'pū, e'tane tu'kan kon enari'nūmū'pū ipi', "Inapai ri pe' ken Sises apurinin pe iyenasa'?" tukai'. ²⁷E'tane Panapas uya inee'pū itekare ekamase'na enno'sa' kon piya'. Panapas uya enpoika'pū to' pi', "Saaru uti koro'tau Tamaskas e'ma tau, Itepuru ene'pū iya, miripan uya auro'ka'pū," ta'pū iya. Panapas uya niri to' auro'ka'pū, "Saaru uya Sises ekareei ekama'pū enari'mura Tamaskas pon kon ka'pon amū' pi'," ta'pū iya. ²⁸Panapas maimu apurisa' to' uya wenai, Sises apurinin nan Surusiran pon kon tonpa pe Saaru ena'pū, miripan usari'pū enari'mura ri Surusiran poro Sises ekareei ekama pi'.

²⁹Saaru esi'pū usauro'ni pi' e'maimu'pi' ni pi' Sises ekareei pi' Esuweru amū', Kiri' pe tūsauro'san pokon pe enpoika i'se to' pi', e'tane miyari ri iwini pi' to' e'kama'pū. ³⁰Turon kon Sises apurinin nan uya i'tusa' a'tai, ka'pon amū' e'kamasā' iwini pi', to' uya ari'pū Sisariya pona, miripan ennoko'pū to' uya Tarusas pona.

³¹Miri a'tai, Sises apurinin nan Isutiya, Kiyarari, miri awonsi'ki Sameriya pon kon uko'mamū'pū ewankamanin pūra, inū' uya ri to' kota'ma pūra iyese wenai. Wakū A'kwaru uya to' meruntitanūku'pū, to' pori'ma'pū iya ri. Miyari ri Sises

apuri pi' tu'ke to' ena'pū. Miripan kon uko'mamū'pū Itepuru nama pi' ri tūko'mamū kon kaisa ri.

Ise'mesa' Epi'ti'pū Pi'ta Uya

³²Pi'ta esi koro'tau utin pi' pata ton kaisa ri'ne, Reta pon kon waku ton Papa nūkupū'san ka'kuranpai' iti'pū. ³³Miri yau, ka'pon eporo'pū iya, Eniyas itese'. Te'kwe' poi iye'mū'sa'ka pūra iyese'pū, 8 kaisa ri wūpiya ise'mesa' uko'mansa' esi'pū. ³⁴Pi'ta uya ta'pū ipi', "Eniyas, seri pe Sises uya iyepi'ti. E'mū'sa'ka', iye'kwe' e'mepi'ki," ta'pū iya. Miri a'tai ri, Eniyas e'mū'sa'ka'pū. ³⁵Tanporo tūko'mansan Reta miri awonsi'ki Isaran yawon kon uya ene'pū, to' era'ti'pū Itepuru Sises winikui'.

**Taru'kas, Eri'sa'
I'mū'sa'ka'pū Pi'ta Uya**

³⁶Isa'pa pata po, Sises apurinin uri'san esi'pū, Tapi'ta itese'. Itese' esi'pū Kiri' maimu yau Taru'kas, "usari" ta e'kwa pe. Tiwiri ri waku ku'nin pe iye'pitu'pū, entu'manin nan ni pika'ti pi'. ³⁷Reta po Pi'ta esi a'tai, e'ne' pe tenai', uri'san Taru'kas eriku'pū. Iyeri'sa' ekepu korūka'pū to' uya, miripan kon uya ka'tawon iuti tau inonka'pū. ³⁸Reta esi'pū a'ko pe Isa'pa piyau. Sises poitoru ru'san uya Reta po Pi'ta esi tukai' etasa' a'tai, asa'ron kon ka'pon amū' ennoko'pū to' uya ipiya'. "Inke pūra isi'ki," ta'pū to' uya ipi'.

³⁹Miri a'tai ri, iti'pū Isa'pa pona to' a'kiri. Pata eposa' iya a'tai,

to' uya ari'pū ka'ta', Tarū'kas ekepu piya'. Tanporo uri'sami'si amū' itaan'pū ima'tasa' kon nū'san amūrasa' esi'pū ipiyau, ukaran ni pi', pon amū' Tarū'kas nukonepitu'pū enpoikapitu pi' to' esi'pū nurine iyesei a'taino rā'pū.

⁴⁰Tanporo Pi'ta uya to' enpa'ka'pū, miripan e'sekunka'pū ipāremai', nurine kanan Tarū'kas enato' pe. Miri tūpo, eke' winikūi iyera'ti'pū, "Tapi'ta, e'mū'sa'ka'!" ta'pū iya. Miri a'tai ri, itenu ton uta'koka'pū. Pi'ta ene iya a'tai, iye'mū'sa'ka'pū ta'mu pona. ⁴¹Itemiya pi' ta'sii' i'mū'sa'ka'pū iya, miripan uya Sises poitorū rū'san miri awonsi'ki uri'sami'si amū' itaan'pū ima'tasa' kon nū'san ki'ma'pū, miripan uya nurine inee'pū to' piya'. ⁴²Miri a'tai ri, mi poro ri te'san ka'pon amū' uya Isa'pa po eke Papa tūrawasooi e'ku'sa' i'tu'pū. Tu'kan kon uya Itepu ru apuri'pū. ⁴³Pi'ta



"Tapi'ta, e'mū'sa'ka'!" (9:40)

uko'mamū'pū Isa'pa po ka'pon, Saiman itese', o' pi'pi konepi'nin piyau.

Koneriyas, Papa Apurinin

10 ¹Miri yau iyesei'pū ka'pon, Koneriyas itese', Sisariya pata po tūko'mansen, Roman amū' soisaai epuru ton tonpa pe te'sen, I'tariyan soisa amū' tukai' tesa'san kon. ²Tiwiri ri tūtonpa ton amūtū pe Papa eseru poro iko'mamū i'se te'sen, tiwiri ri entu'manin nan repanin pe iyesei'pū eke pe ri, tiwiri ri tūwipūremasen Papa pi'.

³Ko'maan pe iwa, 3 a'kūra', Papa uya itenu a'kwakasa' uya, kipo'po Papa inserūi uyepū tūpiya' ene'pū. "Koneriyas!" ta'pū iya ipi'.

⁴Koneriyas uya enari'ke' pe esii'ma ene'pū, "I'ri na'ki i'se me'ai', uyepuru?" ta'pū iya ipi'.

Inserū uya ta'pū ipi', "Papa epori'masa' man entu'manin nan repasa' auya pi', iwipūremasa' pi' tūpi'. ⁵Saiman, Pi'ta tukai' tesa'sen ki'manin nan ka'pon amū' inenno'ki Isa'pa pata pona. ⁶Saiman ni mari itese' ka'pon, o' pi'pi konepitu pi' te'sen iwū' tau iyesei miri, parau e'pi po na'ne'," ta'pū iya.

⁷Auro'kanin nū'pū inserū uti'pū a'tai, Koneriyas uya asa'ri tūpoitorū ton ki'ma'pū. Tikin ni soisa ki'ma'pū iya niri, Papa apurinin, tūtonpa pe te'sen. ⁸Tanporo iye'ku'sa' rā'pū pi' to' auro'ka'pū iya. Miri tūpo, Isa'pa pona Pi'ta ki'mai' to' ennoko'pū iya.



“Ɔri na'ki i'se me'ai, uyepuru?” (10:4)

Pi'ta Enu A'kwaka'pu Papa Uya

⁹Pure'po'si a'tai ri, miri ema'sa' yau, pata eporo to' uya koro'tau, Pi'ta enuku'pu ai'tou pan iuti nakapu pona ipuremai'. ¹⁰Miri a'tai, iwan pe iyesi'pu, enta'napai iyesi'pu. Iti'kiyari ekoneka koro'tau, Papa uya itenu a'kwaka'pu. ¹¹Ka' uta'kokasa' ene'pu iya. Kareku waraino u'ti non pona a'kwa' kasa ewa'tisa' asakiri'nan si'na' ke itekun enne'pi'ne ene'pu iya. ¹²Miri yau iyesi'pu ti'tui' pura ri ene amu', ikui amu', miri awonsi'ki iri ton ni toron amu' niri. ¹³Miri a'tai, main eta'pu iya, “Ɔyo' tawise enta'naki,” tawon. ¹⁴E'tane Pi'ta uya imaimu eiku'pu, “Uyepuru, miri kupu uya pura man; iri tasa' na'ne' nan ipi' Main uya annin pen uri,” ta'pu Pi'ta uya. ¹⁵Papa uya ta'pu ipi', akon ite'kwa pe, “Waku enta'nan nito'

pe Papa nukoneka'pu pi' iri kukai,” ta'pu iya. ¹⁶Pi'ta uya seri main eta'pu osorawau ite'kwa, miri pe ri, o' amu' en enuku'pu ka' pona.

Koneriyas Poitoru Ton Uya Pi'ta Warinpa'pu

¹⁷Pi'ta usenuminka koro'tau, “Ɔri kuru si ekamanin se ko?” tukai', Koneriyas nennoko'san ka'pon amu' esi'pu enuri'ni pi' mura'ta nau. ¹⁸To' uya ekama'po'pu, “Moro pe' seri yau ka'pon, Saiman, Pi'ta tato' nai?” ta'pu to' uya.

¹⁹Ɔri ta e'kwa pe seri esi se, ta Pi'ta uya koro'tau, “Osorawawon kon' ka'pon amu' esi iyenpai,” ta'pu Ita'kwaru uya ipi'. ²⁰“E'mu'sa'ka', iu'ti'; tusunuminkai' pura itiki to' a'kiri. To' enno'sa' uya miri ipiya,” ta'pu.

²¹“Uri kari ri anwarinpanu kon. Ɔri na'ki pikiri uyense'na misi'tuu?” ta'pu Pi'ta uya to' pi'.

²²“Koneriyas, Roman amu' soisaai epuru uya ina enno'sa' man,” ta'pu to' uya ipi'. “Ipokena' pe te'sen miri awonsi'ki tiwiri ri Papa eseru poro iko'mamu i'se te'sen; Esuweru amu' uya niri waku kari ri tato' ipi'. Papa inseruu uya auro'ka'pu iuye'to' pe itiwu' ta' auro'kato' auya etato' pe iya,” ta'pu to' uya.

²³“Ewai,” ta'pu Pi'ta uya to' pi', miripan uya to' ewonnaku'pu tupa'ya' to' apontii'.

◦ 10:19 *Osorawawon*; taron ni ton imenukasa' ton uya *asa'ron* ta; taron ni ton imenukasa' ton uya inonpaai ekama pura iyese.



Pi'ta enuku'pŭ ailtou pan iuti nakapu pona ipuremai'. (10:9)

Koneriyas Uya Pi'ta Ereutanuku'pŭ

Miri ema'sa' yau, Pi'ta e'sara'ti'pŭ utin pi' to' a'kiri. Isa'pa apai Sises apurinin nan e'sara'ti'pŭ itonpa pe. ²⁴Iyema'sa' yau, Sisariya epokaa'pŭ to' uya. Tŭtonpa ton akonta awon kon miri awonsi'ki tŭtonpa ton kuru tamuranu'se Koneriyas esi'pŭ to' enupikiri. ²⁵Pi'ta ewomu koro'tau, Koneriyas uti'pŭ mura'ta na' ipiya' ata'mo'kai' inama tŭyua ekamanin pe. ²⁶Pi'ta uya ipika'ti'pŭ i'mu'sa'ka pi' itemiyatu pi' ta'sii', "E'mu'sa'ka', uri pi' kipuremai, ka'pon ni mari uri, awaraino," ta'pŭ iya ipi'.

²⁷Asaurokui'ma iya'kiri Pi'ta ewomu'pŭ, tu'kan kon ka'pon amu' amurasa' koro'ta'. ²⁸"I'tu auya'nokon miri Esuweru amu' enta'na pŭra iyese tŭron kon Esuweru amu' pen a'kiri, to' ri ka'kuranpa to' uya pŭra ri iyese

to' iwu' ta'. E'tane pŭra, Papa uya enpoikasa' man uyenu ya' tŭron kon waku pe inkoneka'san pi' iri tukai' esi namai'. ²⁹Miri wenai, ukan ka'pon amu' enno'sa' auya a'tai, inke pŭra ri uye'ni pi' epori'ma'pŭ. Apune ekama'; i'ri pe iyese pi' uki'masa' auya?" ta'pŭ Pi'ta uya ipi'.

Koneriyas Uya Tŭnene'pŭ Ekama'pŭ Pi'ta Pi'

³⁰Koneriyas uya imaimu eiku'pŭ, "Asakiri'ne ipata'pŭ pe wui utika'sa' seri, uiwu' tau ipureman pi' esi koro'tau, ko'maan pe iwa, 3 a'kura', ite'kwanau pŭra ri, ka'pon a'kwa ipon e'soto'kasa' esi'pŭ upiyau, ³¹miripan uya ta'pŭ, 'Koneriyas, Papa uya iwipuremato' etasa' man, entu'manin nan repa auya niri i'tusa' iya man. ³²Miri wenai, Isa'pa pona Saiman Pi'ta ki'mase'na ka'pon amu' inenno'ki. Saiman ni mari itese' ka'pon o' pi'pi konepitu pi' te'sen piyau iyese miri, parau e'pi po na'ne', ta'pŭ iya upi'. ³³Miri a'tai ri, ka'pon amu' ennoko'pŭ uya iki'mai'. Waku pe ri umaimu awiri iuye'sa' man. Seri pe si ina amurasa' man tanporo Papa uya tentane'nokon, tanporo ri Itepuru uya irepasa' ina auro'kato' auya ike ke ekama auya etase'na. Asauro'ki si," ta'pŭ Koneriyas uya.

Papa Uya Tanporon Kon I'nanka

³⁴Pi'ta e'sara'ti'pŭ to' auro'ka pi', "Seri pe ito'ka'nuku uya, i'napai ri Papa esi tanporo ka'pon

amū' i'nūnkanin pe isi'kaisa ri,
³⁵tanporon kon ni tūnamanin
 nan, ipoken te'sen ku'nin nan
 anūmū Papa uya, inū' yan pe ri
 to' e'tane. ³⁶I'tu auya'nokon, Papa
 uya tūmaimu ennoko'pū Esuwerū
 amū' piya'. Wakū itekare ekama'pū
 iya, wakū pe tūpokon pe uko'man
 ni emapu'tinin Sises poro. (Sises
 esi Esuwerū amū' epuru pe riken
 pen, e'tane tanporon kon ni epuru
 pe iyesi.) ³⁷Tanporon ni e'kupū'pū
 Isutiya pata poro'ne i'tu auya'nokon
 miri. Miri ton e'sara'ti'pū Kiyarari
 po, itekare ekama pi' epa'taisimapi'
 ni pi' Isaan esi'pū pata'pū pe. ³⁸I'tu
 auya'nokon Sises, Nasare' pon
 Papa uya Ta'kwarū miri awonsi'ki
 tūmeruntirū tūrū'pū ipona. Sises
 utipitū'pū niri wakū kupū pi' pata
 kaisa ri'ne, ka'pon amū' epi'tipitū

pi' Makoī meruntirū apai. Sises uya
 seri ton kupū'pū Papa esi wenai
 tūpika'tinin pe.

³⁹“Ina esi miri tanporo Esuwerū
 amū' pata'se' awiri, Surusiran
 poro ri, inkupū'pū tūnene'pū kon
 ekamanin pe. To' uya iwini'pū
 kurusu' pona tūpokapi'se. ⁴⁰Miri
 ri e'tane, nurine iye'to' pe Papa
 uya i'mū'sa'ka'pū osorūwau wūi
 tūpo. Papa uya ka'pon amū' uya
 ento' pe ikupū'pū. ⁴¹Tanporon
 kon uya kuru ene'pū pen; ina riken
 ennin nan pe anūnsa' kon uya Sises
 ene'pū, tūron kon ka'pon amū'
 auro'kanin nan pe ina e'to' pe. Ina
 iyenta'nasa' kon iya'kiri, ensin
 nū'san ni iya'kiri, nurine iyenasa'
 a'tai terikū tūpo, ⁴²kūri ri uya
 ina auro'kasa' itekare ekamanin
 pe ina e'to' pe ka'pon amū' pi'.



*Miri yau iyesi'pū ti'tui' pūra ri ene amū', ikūi amū',
 miri awonsi'ki iri ton ni toron amū' niri. (10:12)*

Kuri ri kuri ri Papa Nanumū'pū tanporon kon eseru aimenkanin pe tanporo nurinan kon, iyeri'sa' kon ni niri. ⁴³Tanporo kareta amū' pu'kena' ton numenuka'pū ka'pon amū' auro'kanin pe ipi' uya seri ekamasa': Inū' ri kuri Sises apurinin pe te'sen uya, tumakooi pi' usentu'man nito' eporo miri itese' poro," ta'pū iya.

Papa A'kwarū U'ti'pū To' Pona

⁴⁴Pi'ta usaurokū koro'tau, ite'kwanau pūra ri, Wakū A'kwarū u'ti'pū tanporo ka'pon amū' etanin nan pona. ⁴⁵Isa'pa winon kon, Esuwerū amū', Sises apurinin nan, Pi'ta a'kiri iye'sa' kon usewansiuka'pū, apūne pūra Papa uya Ta'kwarū tusa' pi' Esuwerū amū' pen ni pona. ⁴⁶⁻⁴⁷Tūron ni main' yau'ne, Papa apuripitū to' uya, eta'pū to' uya.

Miri a'tai, Pi'ta uya ta'pū, "Tnapai ri man wakū pe, pūsamoro epa'taisimato' pe iyese tuna ke. To' uya Wakū A'kwarū eposa' man uri'nokon uya eposa' na'ne' kasa ri," ta'pū iya. ⁴⁸To' apiyo'ma'pū iya to' epa'taisimato' pe Sises Kūrai ese' yau, miripan kon uya Pi'ta ekama'po'pū tūpiyau'nokon iko'manto' pe miyari rū'kwī pari.

Pi'ta Epataka'pū

11 ¹Enno'sa' kon miri awonsi'ki tūron kon to' tonpa ton Isutiya po tūko'mansan uya, Esuwerū amū' pen ni uya Papa ekareei anūsa' tawon eta'pū. ²Pi'ta

utisa' a'tai Surusiran pona, Esuwerū amū' pen yun pi'pi puturūka tawon nan uya isapema'pū miri yau. ³"Esuwerū amū' pen ni piya' iutipitū miri awonsi'ki auta're'tipitū to' piyau," ta'pū to' uya Pi'ta pi'. ⁴Miri pi' nin si tanporo iye'ku'sa' rū'pū pataka'pū Pi'ta uya na'ne' to' pi';

⁵"Isa'pa pata po ipūreman pi' esi'pū. Miripan koro'tau, ka' apai eke kareku waraino a'kwa' kasa ewa'tisa' asakiri'nān si'na' ke itekun enne'pi'ne u'ti ene'pū uya upiya', Papa uya uyenu a'kwakasa' koro'tau. ⁶Miri yau, tu'kan kon ni ti'tui' pūra ri ene amū', ikūi amū' miri awonsi'ki iri ton ni toron amū' ri ene'pū uya. ⁷Miri tūpo, Papa uya uyauro'ka eta'pū uya, 'Pi'ta, iyo' oton tūwise enta'na', tawon.

⁸"Kane, Uyepuru, ikupū uya pūra iyese, apūne pūra kamoro warai'nān o' amū' ansa' uya pūra kuru ri iyese,' tukai' imaimu eiku'pū uya.

⁹"Akon ite'kwa pe kanan uyauro'ka'pū iya, 'Tri pi' ri iri kūkai, tanporon ni Papa nūkoneka'pū esi wakū pe.' ¹⁰Seri e'kupū'pū osorūwau ite'kwa. Miri tūpo, ene amū' apon kareku waraino enuku'pū.

¹¹"Miri a'tai, osorūwawon kon ka'pon amū' uyee'pū itau e'to' iuti airi, Koneriyas nennoko'san upiya' Sisariya apai. ¹²Papa A'kwarū uya uyauro'ka'pū te'ku'ku'mai' pūra ri to' a'kiri utito' pe, Esuwerū amū' pe pūra ri to' e'tane. ⁶kaisaron kon Isa'pa pon kon utonpa ton uti'pū uya'kiri Sisariya pona. Miri

^f10:46-47 main, miri pe pūra ani

yau, ka'pon iwu' ta' ina ewomu'pu. ¹³Miripan uya inseru e'mu'sa'kasa' ene'pu tuuya ekama'pu ina pi', 'Ka'pon amu' enno'ki Isa'pa pona Saiman Pi'ta ki'mai'. ¹⁴Ekama iya miri, Papa uya tanporo iwu' tawon kon pika'tito' oton,' tukai', ta'pu inseru uya ipi'.

¹⁵"Usauroku e'sara'ti pe ri, Waku A'kwaru u'ti'pu to' pona, wapiya upona'nokon iu'ti'pu kasa. ¹⁶Miri a'tai, it'u'pu uya Itepuru Sises uya ta'pu ru'pu, 'Isaan uya ka'pon amu' pa'taisimapitu tuna ke, e'tane imiri'nokon epa'taisimato' oton Waku A'kwaru ke,' tawon. ¹⁷Papa uya miri ri Waku A'kwaru ke to' repasa' uri'nokon repa'pu tuuya ike ke ri Itepuru Sises Kurai apuri'nokon a'tai, inu' pe ken si te'ku'se Papa ereutanuku i'se esi?" ta'pu Pi'ta uya ka'pon amu' Surusiran pon kon pi'.

¹⁸Seri eta to' uya a'tai, Pi'ta sapemato' tuuyanonokon ereutanuku'pu to' uya, Papa riken apuripitu'pu to' uya. "Papa uya ken ka'wa Esuweru amu' pen kanan ku'sa' tumakooi kon apai tera'tii' tuuko'mansan pe," ta'pu to' uya.

Apurinin Nan Antiyo' Pon Kon

¹⁹Ka'pon amu' uya Si'tipun wini'pu si'kiri, Sises apurinin nan apurumu'pu Surusiran apai taron ni pata ya'ne, apune pura miri yawon kon ka'pon amu' uya tukota'ma kon pi'. Taron kon to' tonpa ton uti'pu Pini'siya pata ya', Sai'puras opa'wu pona, miri

awonsi'ki Antiyo' pata ya'. To' uya Sises ekareei ekama esi'pu Esuweru amu' pi' riken miri ton pata yau'ne. ²⁰Taron kon Sises apurinin nan esi'pu Sai'puras opa'wu pon kon miri awonsi'ki Sairini pata yawon kon, miripan kon uti'pu Antiyo' pata ya'. Miri yau, itekare ekama'pu to' uya Esuweru amu' pen ni pi', waku Itepuru Sises ekareei. ²¹Miripan kon pika'ti'pu Papa uya. Itekare ekama pi' to' esi koro'tau, tu'kan kon ni Esuweru amu' pen ni ena'pu Sises apurinin nan pe, miripan kon era'ti'pu Papa winikui'.

²²Surusiran pon kon apurinin nan uya seri etasa' esi'pu, miripan kon uya Panapas ennoko'pu Antiyo' pona. ²³Pata eposa' tuuya a'tai, Papa uya eke pe ri waku nonkasa' to' pona ene'pu iya. Pori' pe iyese'pu, miripan uya to' pori'mapitu'pu miyari ri Sises apurinin nan pe to' e'to' pe tanporo tewan kon pokon pe. ²⁴Panapas esi'pu waku kuru ka'pon, Waku A'kwaru ke ita'kwaru'tisa', miri awonsi'ki apurito' ke, miripan uya tu'kan kon ni pika'ti'pu Itepuru Sises apurinin nan pe.

²⁵Miripan tupo, Panapas uti'pu Tarusas pona Saaru epose'na. ²⁶Miripan uya eposa' a'tai, inee'pu iya Antiyo' pona. Miri yau, Panapas miri awonsi'ki Saaru pokon uko'mamu'pu tikin ni wapiya apurinin nan pokon pe te'sepopi'se, miripan kon uya

tu'kan kon ni ka'pon amū' enupa-pitū'pū. Antiyo' po wapiya kuru Sises paitora ton esakū'pū to' uya miri Kūri'san amū' tukai'.

27Miri a'tai'ne, Sises apurinin nan, pu'kena' amū' uti'pū Antiyo' pona, Surusiran apai. 28Tikin ni to' tonpa, Akapas itese', e'mū'sa'ka'pū asauro'se'na. Papa A'kwarū uya tauro'kato' awiri ekama'pū iya to' pi', "Eke iwankan uta'mo'kan pi' man tanporo pata emū' kaisa ri," ta'pū iya. (Seri e'kupū'pū Kūrautiyas esi a'tai Ron o'no te'san pata ton epuru pe.) 29Sises pi' enupasa' kon e'kama'pū Isutiya pon kon tūtonpa kon repa pi' pūrata ke. 30Miripan kon uya ikupū'pū, pūrata ennoko'pū to' uya so'si epuru ton ena', Panapas miri awonsi'ki Saaru pokon enau.

Pi'ta Epa'ka'pū Pariki'si Tapai

12 1Miri koro'tau, Sises apurinin nan kota'ma i'se kin Era' esi'pū, miripan uya soisa amū' ennoko'pū so'si epuru ton Surusiran pon kon a'sise'na, miripan kon tūto' pe to' uya pariki'si ta'. 2Era' uya soisa apiyo'ma'pū Isens, Isaan rui wito' pe iya supara ke. 3Era' uya i'tu'pū Isens wisa' tūuya a'tai, pori' pe kuru Esuwerū amū' ena'pū tukai', miri awonsi'ki soisa amū' kanan apiyo'ma'pū iya Pi'ta a'sito' pe to' uya iwito' pe kanan. Seri e'kupū'pū A'sarutanū'sa' Pen Pūreti Pi' Enta'nan Weyu a'tai. 4Soisa

amū' uya Pi'ta a'si tūpo, to' uya ari'pū pariki'si ta', miripan Era' uya asakiri'nān kon iyamu'kuru ton asakiri'nān yawon kon soisa amū' apiyo'ma'pū erasunti pi'. Era' esi'pū Pi'ta tenpa'kai' pariki'si tapai inekama'popi'pai Esuwerū amū' pana airi, To' Epoi Iti'pū Weyu Rū'pū tūpo. 5Miri pi' ri pariki'si tau Pi'ta enkurunpa'pū to' uya, e'tane apurinin nan esi'pū Papa ekama'po pi', Pi'ta pika'tito' pe iya.

6Era' e'kamasa' Pi'ta enpa'ka pi' ekama'popi'to' pe tūuya min winon ewarupūi tau, Pi'ta esi'pū e'nūn ni pi' asa'ron kon soisa amū' a'sanau. To' uya itemekon auronpi'sa' esi'pū. Tūron kon soisa amū' esi'pū mūra'ta erasunti pi'. 7Ite'kwanau pūra ri, inserū usenpoika'pū Pi'ta piya', miripan uya a'kwa pe pata kupū'pū pariki'si tau. Inserū uya Pi'ta enpa'ka'pū ta'pi'pi'se, "Inke pūra e'mū'sa'ka'," ta'pū iya, miripan auronpi'sa' itemiyatū utaranka'pū. 8Miri tūpo, "Ekoneka', asapatooi ipata'ti'," ta'pū inserū uya ipi', miripan kupū'pū Pi'ta uya. "Ipon pūro'pon ipata'ti', miri awonsi'ki uya'kiri isi'ki," ta'pū inserū uya.

9Pi'ta uti'pū iya'kiri pariki'si tapai. I'napai ri pe' ne'ku'ai'ne' esi tai'ma ri Pi'ta epa'ka'pū pariki'si tapai, tenu uta'kwakasa' uya ri na'ki ene tukai' isenuminkai'ma. 10Pi'ta miri awonsi'ki inserū uya wapiyaro' kon soisa amū' entakakaa'pū, miri awonsi'ki



Ite'kwanau p̄ra ri, inseru usenpoika'p̄ Pi'ta piya'. (12:7)

ite'ma'p̄u pe te'san kanan entakakaa'p̄u to' uya. Soisa am̄' uya to' ene p̄ra. To' uye'kaa'p̄u wa'ka pun pe te'sen m̄ra'ta na', pata ya' t̄utisen, miripan m̄ra'ta uta'koka'p̄u tiwano' pe ri, miripan kon epa'ka'p̄u. Inni r̄'kwi ri asanta tau to' utikaa'p̄u t̄po, inseru uya inimi'p̄u.

11 "I'napairi ri ka'si, pariki'si tapai epa'kasa' seri wa!" ta'p̄u Pi'ta uya. "Si'tuka'ai' si, Itepuru uya tinserr̄u enno'sa' upika'tii' Era' esi t̄nkup̄n̄ inku'pai upi' apai miri awonsi'ki iye'kup̄u kuru tawon nan niri Esuweru am̄' piyapai," ta'p̄u iya.

12 Pi'ta uya i'tusa' a'tai, iti'p̄u Meri, Isaan san iw̄' ta'. Tu'kan kon ni ka'pon am̄' am̄rasa' ip̄remase'na tepose. 13 Pi'ta uya m̄ra'ta wipit̄u'p̄u. Ka'pon uya ri tewonn̄'to' pe, apiyo' pe r̄'kwi te'sen, Rota itese' uyee'p̄u imaimu'se'na m̄ra'ta na'. 14 Pi'ta maimu etasa' t̄uya

a'tai, epori'mai'ma iyeka'tum̄'p̄u, m̄ra'ta ta'kokai' p̄ra, iuti tawon kon pana'tii', "Pi'ta man m̄ra'ta nau!" ta'p̄u iya.

15 "I'ri uya ayano'ma, Rota?" ta'p̄u to' uya ipi', e'tane ri akonomapi'kaa'p̄u iya,

"Pi'ta esi mi airi ukayai'ne ko!" takaa'p̄u iya kanan.

"A'tai p̄ra itinserr̄u ri na'ki," ta'p̄u to' uya.

16 M̄ra'ta wipit̄u pi' ri Pi'ta esi'p̄u to' uya a'kokato' pe. To' uya a'kokasa' a'tai, to' usewansiuka'p̄u ene t̄uya'nokon pi'. 17 Pi'ta uya temiyat̄u ke e'pana e'ti' ta'p̄u to' pi', miripan uya Papa inser̄u uya tenpa'kasa' pariki'si tapai r̄'p̄u ekama'p̄u. "Seri mekamat̄u' Isens pi' miri awonsi'ki t̄ron kon itonpa kon am̄' pi'," ta'p̄u iya. Miri t̄po, t̄ron ni pata ya' iti'p̄u.

18 Miri ema'sa' yau, soisa am̄' utai'p̄u ipan pe ri, ap̄ne p̄ra i'ri kasa Pi'ta epa'ka'p̄u tukai' to' uya i'tu p̄ra ri iyesi'p̄u. 19 Era'

uya soisa amū' apiyo'ma'pū Pi'ta warinpatō' pe to' uya, e'tane to' uya eporo pūra iyēsī'pū. Miri pi' to' ekama'popitū'pū iya, i'ri kasa Pi'ta epa'ka'pū tukai', e'tane to' nekama ton pūra ri iyēsī'pū, miripan uya tūron kon soisa amū' apiyo'ma'pū Pi'ta erasuntinin nan pe iku'sa' kon nū'san wito' pe to' uya.

Miri tūpo, Era' uti'pū Sisariya pona Isutiya ponsi'ki, miripan uko'mamū'pū inke rū'kwi ri.

Era' Uma'tato'

²⁰Era' usakorota'pū ipan pe ri Taya miri awonsi'ki Saitan pon kon ka'pon amū' pi'. Tūron kon ka'pon amū' Taya miri awonsi'ki Saitan pon kon tonpa ton uti'pū Era' ense'na. Era' poitorū, eke pe kuru te'sen Pūrastas e'to' pe tūmaimu kon awiri kin Era' auro'kato' pe to' uya ekama'po'pū, tūpata'se' kon yawon kon ka'pon amū' e'to' pe wakū pe kin a'kiri tukai', apūne pūra kin pata'se' apai ti'kiyari kon eponin nan pe te'to' kon pe.

²¹Tūweyu pe tūneporo'pū a'tai, Era' uya tūpon pata'ti'pū kin pe tesi ekamanin, miripan ereuta'pū tapon po, ka'pon amū' iyamūrasa' kon auro'ka pi'. ²²“Pūse ri kūrī ri Papa nūsauro'ai'ne', ka'pon pen ni!” tukai', ka'pon amū' uki'pi'nūnpitū'pū Era' pi'.

²³Inke pūra Papa inserūi uya eno'ma'pū non pona, apūne pūra

ka'pon amū' uya tapuri i'se iyēsī wenai miri awonsi'ki Papa ru'ku inamati' ta iya kasa pūra. Miripan ani'pū weruwe amū' uya, miripan eriku'pū.

²⁴E'tane Papa maimu ri esi'pū miyari ri utin pi' miri awonsi'ki epan ni pi'.

²⁵Tūturawasooi kon u'ma'sa' a'tai, Panapas miri awonsi'ki Saaru pokon enna'po'pū Surusiran poi.^{s h} Isaan, Ma' tato' nee'pū to' uya ta'kiri'nokon.

**Panapas, Saaru
Ennoko'pū To' Uya**

13 ¹Antioy' po so'si tau te'san koro'tau, pu'kena' ton miri awonsi'ki enupanin nan esi'pū. Kamoro si esi'pū Panapas; Simiyan, Mekoro tukai' to' nesakūnū; Rusiyas, Sairini itese' pata winon; Manayen, kopūna Era' isakon pe isemo'kasa' rū'pū; miri awonsi'ki Saaru. ²Papa apuri pi' to' esi koro'tau, miri awonsi'ki tūta're'tii' pūra to' useruma koro'tau, Papa A'kwarū uya to' auro'ka'pū, “Inke pūra seri pe Panapas miri awonsi'ki Saaru pokon anūnti', uyapiyo' ton pe, miri awonsi'ki tūki'ma'pū uya 'nokon ya' ku'se'na to' utito' pe,” ta'pū iya.

³Miripan tenta'nai' pūra tūuseruma kon tūpo, miri awonsi'ki tūwipūrema kon tūpo, to' pona'ne temiyatū kon nonkapitū'pū

^s 12:25 Tūron ni imenukasa' ton, *Surusiran pona* tawon pe iyēsī. ^h 12:25 Tūron ni imenukasa' ton, *Surusiran poi Antioy' pona* tawon pe iyēsī.

12:23 2 Ma'kapis 9:5-28

to' uya to' p̄rema pe, miripan kon ennoko'p̄u to' uya.

**Paaru Esi'p̄u
Sai'p̄uras Pata Po**

⁴Papa A'kwaru uya Panapas miri awonsi'ki Saaru pokon ennoko'p̄u tu'kan pata yau'ne t̄nekamanu kon ekama pi'. To' uti'p̄u Antiyo' ponsi'ki Seru'siya pona, miripan kon ekanwa'ti'p̄u, Saramis pona t̄utito' kon pe, Sai'p̄uras opa'w̄uri pon. ⁵Saramis po si tesi kon koro'tau, Esuweru am̄' usenupato' iw̄u' ta' to' uti'p̄u, Papa Maimu ekama'p̄u to' uya. Isaan Ma' esi'p̄u miri to' a'kiri to' pika'ti pi'.

⁶Tanporo miri opa'w̄u ti'ma'kai' to' usari'p̄u, Pa'pos itese' pata eporo t̄uya'nokon pona ri. Miri pata yau, Esuweru enwoke' pe esii'ma akono pe te'sen esi'p̄u Paru-Sises itese'. ⁷Miri opa'w̄u epuru pe te'sen, Sisiyas Paaros itese' a'kiri inke itipitu'p̄u. K̄uri ri kop̄na esi'p̄u i'tunin kuru. Tikin nan ka'pon ennoko'p̄u iya Panapas miri awonsi'ki Saaru ki'mase'na to' uye'to' pe t̄upiya', ap̄ne p̄ura Papa Maimu inetapai tesi pi'. Miri a'tai, Panapas miri awonsi'ki Saaru pokon uti'p̄u ipi' ekamase'na. ⁸E'tane p̄use ri ka'pon, Erimas tato' ipi' Kiri' am̄' maimu yau, enwoke' ta e'kwa pe esi'p̄u to' i'se p̄ura, kop̄na auro'ka'p̄u iya Sises apuri iya namai'. ⁹Miri a'tai Saaru, Paaru tukai' to' nesakunu uta'kwaru'ti'p̄u Wak̄u A'kwaru ke uya to'sa ri Erimas ene'p̄u, ¹⁰miripan uya, "Makoi kasa kuru me'ai! Wak̄u pe

te'sen ewaruma'ti auya! Kasi pe ri ka'pon am̄' auro'ka auya, miri awonsi'ki t̄aron ni ton ni iri ton ni kupu auya to' pi'. I'napairon ni Papa eseru ensima i'se iwe'to' ereutanu'ki! ¹¹Seri pe kuru Papa uya ikota'ma miri, tenku'ne iyena miri, miripan inke kuru p̄ura ri w̄ui enu tense p̄ura iuko'mamu miri," ta'p̄u Paaru uya ipi'.

Inke p̄ura ri, tenku'ne iyena'p̄u kapuru' miri awonsi'ki ewarupi uye'e'p̄u ipona, miripan usari'p̄u te'ma a'pitu' i'se, ka'pon ni i'se iyesi'p̄u temiyatu pi' tanin oton. ¹²Paaru uya enwoke' auro'ka'p̄u iye'ku'sa' ipi' tense, kop̄na uya, "i'napairon," ta'p̄u Sises ekareei pi'. Paaru miri awonsi'ki Panapas nekamanu Sises ekareei pi' isewansiuka'p̄u.

**Paaru, Panapas Pokon
Esi'p̄u Antiyo' Po**

¹³Miri t̄upo, Paaru miri awonsi'ki iya'kiri te'san itonpa ton uti'p̄u kanau yai Pa'pos ponsi'ki Piruka, Panperiya awon pona. Miri yau, Isaan Ma' uya to' nimi'p̄u. Surusiran pona iyenna'po'p̄u. ¹⁴Piruka ponsi'ki to' uti'p̄u Antiyo', Pi'sitiya yawon pona. Sapa' a'tai, to' uti'p̄u Esuweru am̄' usenupato' iw̄u' ta', miripan kon ereuta'p̄u. ¹⁵Mosi' numenuka'p̄u miri awonsi'ki pu'kena' am̄' numenuka'p̄u usekama'p̄u t̄upo, Esuweru am̄' usenupato' iw̄u' epuru ton uya ka'pon ennoko'p̄u Paaru miri awonsi'ki Panapas piya' t̄umaimu kon pe, miripan

uya, “Ina tonpa ton, inu' ri esi a'tai asauro'pai tiwi ka'pon amu' auro'kai' to' pori'ma pe,” ta'pu iya to' pi'. ¹⁶Miri yau, Paarū e'mu'sa'ka'pu, temiyatu ari'ma'pu iya, e'pana to' e'to' pe, miripan uya, “Utonpa ton, Esuweru amu', miri awonsi'ki Esuweru amu' pen, Papa namanin nan, umaimu etati!! ¹⁷Papa, uri'nokon Esuweru amu' napurinu uya utamokori kon anumu'pu, miripan kon epankasa' tūuya, ka'kuran pe to' esi koro'tau Isi' po. Inke ri tūuko'mamu tūpo, Papa uya tūmeruntiru ke to' enpa'ka'pu miri pata apai. ¹⁸Tūmaimu awiri pūra ri to' e'tane, to' nukupunu moronka pi' iyese'pu 40 kaisa ri wūpiya rimonu' tau to' uko'mamu koro'tau. ¹⁹Papa uya to' pika'ti'pu 7 kaisaron kon tūpataron kon Kenan pon kon ka'pon amu' enpa'kato' pe to' uya, miripan uya to' nono tūsa' uiwano' kon pe. ²⁰Seri e'kupū'pu 450 kaisa ri wūpiya yau iwa'ne ri.

“Miri tūpo, Papa uya to' usewa'noma epuru pe te'ton kon anūnpitū'pu, Sanweru, pu'kena' pe te'sen ena to' epuru pe pona ri. ²¹Miri a'tai, tepuru kon pe kin i'se ka'pon amu' esi'pu. Miripan Saaru, Kisi mu anumu'pu Papa uya kin pe, miripan uko'mamu'pu 40 kaisa ri

wūpiya to' epuru pe. ²²Kin pe iye'to' yapai Saaru mo'ka tūuya tūpo, Papa uya Tepi' anumu'pu kin pe. Waku pe kuru Papa usauroku'pu ipi', 'Eposa' uya man warawo' Tepi', Ise'si mu upori'manin pe te'sen ku'nin, i'se e'to' ku'to' iya oton miri,' ta'pu Papa uya.

²³“Papa uya Tepi' pa ru'pu, Sises ennoko'pu Esuweru amu' pika'tise'na. Miri kupu uya ta'pu tūuya utamokori ton pi' awiri. ²⁴Sises e'sara'ti e'turawasoman pi' rawiri, Isaan uya itekare ekama'pu tanporon kon Esuweru awon kon pi', iri tūnkupunu kon apai to' era'tito' pe, miripan kon epa'taisimato' pe. ²⁵Tūturawasooi i'ma'ka tūuya winikui', Isaan uya to' ekama'popitū'pu, 'Inu' pe uku'atū? Ka'pon ennoko uya miri, tasa' ru'pu Papa uya ipi' pe, uyekama auya'nokon seri, e'tane etati, seri pe ri iyepu miri e'tane isapatooi mu' ara'ka poken pūra ri esi,' ta'pu iya.

²⁶“Utonpa ton Esuweru amu', Epūra'an payan nu'san, Esuweru amu' pen ni niri Papa namanin nan, etati!! Uri'nokon iwano' pe kuru Papa uya epika'tin nito' eseru ennoko'pu. ²⁷Surusiran pon kon ka'pon amu' miri awonsi'ki to' epuru ton uya i'tu pūra iyese'pu pūse ri Sises esi pika'tinin pe

†13:22 Eren 89:20

13:17 E'sotas 1:7; 12:51 13:18 Nonpa 14:34; Isu'taronomi 1:31

13:19 Isu'taronomi 7:1; Isa'suwa 14:1

13:20 Eseru Aimenkanin Nan 2:16; 1 Sanweru 3:20 13:21 1 Sanweru 8:5; 10:21

13:22 1 Sanweru 13:14; 16:12 13:24 Ma' 1:4; Ūru' 3:3

13:25 Isaan 1:20; Ma'siu 3:11; Ma' 1:7; Ūru' 3:16; Isaan 1:27

tukai', miri awonsi'ki pu'kena' amu' maimu Sapa' kaisa ri tausekamasen to'ka'naku to' uya pura iyessi'pu, e'tane pu'kena' amu' uya ekama'pu awiri to' uya iwini'pu. ²⁸Tu'kan kon ni ka'pon amu' usauroku'pu, 'Iri kupu Sises uya,' tukai', e'tane iwito' ipikiri oton eporo to' uya pura iyessi'pu. Miri ri e'tane, itepuru Paire' ekama'po'pu to' uya ima'tanu'to' pe iya. ²⁹Pena ri pu'kena' ton nekama'pu kupu'pu ka'pon amu' uya miri Sises pi'. To' uya iwini'pu. Kurusu' pona to' uya ipokapitu'pu, miripan mo'ka'pu taron kon uya kurusu' poi, miripan emaika'pu to' uya ti' akasa' uruwai' pe ya'. ³⁰E'tane Papa uya i'mu'sa'ka'pu eri'nito' apai. ³¹Inke ri isenpoikapitu'pu ta'kiri Kiyarari ponsi'ki Surusiran pona itisa' kon enu ya', ka'pon amu' si ennin nu'san esi miri taron kon ka'pon amu' pana ya' ekama pi'.

³²"Ina uya kanan si seri waku kuru itekare ekama seri ipi'nokon. 'Miri kupu uya,' ta'pu Papa uya utamokori kon pi' uta'ku'tisa' ru'pu ³³uri'nokon, to' payan non pi'. Miri si ku'sa' iya Sises ti'mu'sa'kase Eren apon yau isakon pe te'sen Eren uya ekamasa' kasa,

" 'Seri pe umu, tikin nan pe kuru iwesi miri,

ikuipunu pe enasa' seri.'^j

³⁴Papa uya tamu i'mu'sa'ka'pu iyeri'sa' apai, miripan eri'to' oton pen ni miri enta'. Miri pi', Papa uya utamokori kon amu' auro'ka'pu,

" 'Irika'ti uya 'nokon kuru miri, umunki amu',
Tepi' auro'ka'pu uya awiri ri.'^k

³⁵Tepi' uya Kurai' pi' Papa auro'kasa' taron ni Eren yau,

" 'Ikitato' pe uyekepu nonka auya pen, apune pura waku uri,
ipoitoru ukita i'se pura iwesi.'^m

³⁶"Tu'ko'mamu koro'tau, Tepi' uya, ikupu iya i'se Papa e'to' ku'pitu'pu. E'tane iyeriku'pu, ka'pon uya iu'na'ti'pu, itamokori ton esi'pu kasa ri, miripan pun ukita'pu. ³⁷E'tane kuri Papa nu'mu'sa'ka'pu iyeriku'pu yapai ukita'pu pen.

³⁸"Miri pe iyessi pi', utonpa ton, i'tu auya'nokon i'se esi Sises poro makoi pi' usentu'man, usekama ipi'nokon. ³⁹Kuri ri poro tanporon kon apurinin nan ekoneka, tanporon ni ekonekan pokena' pen ni ipiyapai, Mosi' numenuka'pu wini. ⁴⁰Miri pe iyessi pi', ti'tui' e'ti', pu'kena' amu' nekama'pu e'kupu namai' ipi'nokon:

^j13:33 Eren 2:7 ^k13:34 Aisaya 55:3 ^l13:35 Kurai (Kiri' maimu yau), miri pe pura Me'saya (Ipuru maimu yau), asa'ri ri mari iyessi, Papa Nanumunu ta e'kwa pe.

^m13:35 Eren 16:10

13:28 Ma'siu 27:22-23; Ma' 15:13-14; Uru' 23:21-23; Isaan 19:15

13:29 Ma'siu 27:57-61; Ma' 15:42-47; Uru' 23:50-56; Isaan 19:38-42

13:31 Inkupu'pu 1:3

41 “ ‘Etati' imiyamoro, Papa
 sapemanin nan!
 fusewansiuka kon miri
 Papa nŭkupŭnŭ tense
 miri awonsi'ki iyeri'to'
 oton kon.

Iku'to' uya oton aya'tai'nokon
 anapurinŭ ton kon pen ni
 ka'pon uya ekama tane
 ipi'nokon,ⁿ

tawon,” ta'pŭ ya.

42 Paarŭ miri awonsi'ki Panapas
 uya Esuwerŭ amŭ' usenupato' iwŭ'
 nimi koro'tau, ka'pon amŭ' uya to'
 ki'ma'pŭ Sapa' a'tai to' uye'to' pe
 miyari pari seri ton ekamase'na.
 43 Ka'pon amŭ' e'nonkasa' a'tai,
 anpisin pe Esuwerŭ amŭ' miri
 awonsi'ki Esuwerŭ amŭ' pen e'tane
 Papa namanin nan uya Paarŭ miri
 awonsi'ki Panapas e'ma'pŭka'pŭ.
 Paarŭ miri awonsi'ki Panapas uya
 to' auro'ka'pŭ, Papa uya wakŭ
 nonkasa' tŭpona'nokon awiri to'
 uko'manto' pe.

44 Tŭron ni Sapa' a'tai, tu'ke
 ri anpisin pe Antiyo' pon kon
 amŭra'pŭ Esuwerŭ amŭ' usenupato'
 iwŭ' ta' Paarŭ miri awonsi'ki
 Panapas usaurokŭ etase'na Itepuru
 Sises pi'. 45 Esuwerŭ amŭ' ikinta'pŭ
 anpisin pe ka'pon amŭ' ene
 tŭuya'nokon a'tai, miripan kon
 usaurokŭ'pŭ iri pe Paarŭ pa'nŭkŭ pe.
 46 Miripan kon maimu eiku'pŭ Paarŭ
 miri awonsi'ki Panapas uya te'namai'
 pŭra, “Sises ekareei, Papa winon

ekamato' ina uya pe iyesi wapiya
 Esuwerŭ amŭ' pi', e'tane Papa
 Maimu ewaruma'ti auya'nokon, miri
 uya ekama wakŭ tiwiri uko'man
 nito' eponin nan pe pŭra ri tukai'
 iye'kupŭ kon. 47 Arŭne pŭra Papa
 uya ina apiyontisa' ina uya iku'to' pe,
 “ ‘To' weyu pe iyennoko uya
 seri
 non emŭ' kaisaron kon
 ka'pon amŭ' pana'tise'na,
 to' pika'tinin pe uri esi pi',^o
 tukai,” ta'pŭ Paarŭ uya.

48 Miri eta Esuwerŭ amŭ' pen uya
 a'tai, to' epori'ma'pŭ. Papa Maimu
 inamato' uya. Esuwerŭ amŭ' pen,
 Papa nanŭmŭ'san tŭpiyau to' e'to'
 pe uya Sises ekareei apuri'pŭ.

49 Miri a'tai, Itepuru maimu
 uti'pŭ tanporo miri nono awiri.
 50 Miri e'tane tŭron kon Esuwerŭ
 amŭ' epuru ton uya, eke ton pe
 te'san ka'pon amŭ', miri awonsi'ki
 Papa namanin nan uri'sami'si amŭ'
 uya Paarŭ miri awonsi'ki Panapas
 ewaruma'tito' pe ikupŭ'pŭ. Kamoro
 Esuwerŭ amŭ' uya tŭron kon
 ka'pon amŭ' auro'ka'pŭ Paarŭ miri
 awonsi'ki Panapas kota'mato' pe to'
 uya. Miripan kon uya Paarŭ miri
 awonsi'ki Panapas enpa'ka'pŭ tŭnono
 kon apai. 51 Miripan Paarŭ miri
 awonsi'ki Panapas uya ti'ta kon poi
 non tiuti'pŭ pata nimii'ma, Papa uya
 to' nonkasa' ekamanin pe, miripan
 kon uti'pŭ Ai'koniyon pona, Antiyo'
 ponsi'ki. 52 Miri koro'tau, Sises

ⁿ 13:41 Apa'ka' 1:5 ^o 13:47 Aisaya 42:6; 49:6

13:51 Ma'siu 10:14; Ma' 6:11; Ūru' 9:5; 10:11

apurinin nan uta'kwaru'ti'pu pori' ke miri awonsi'ki Waku A'kwaru ke.

Paaru Miri Awonsi'ki Panapas Pokon Esi'pu Ai'koniyan Po

14 ¹Te'to' kon kasa ri Ai'koniyan po, Paaru miri awonsi'ki Panapas pokon uti'pu Esuweru amu' usenupato' iwu' ta', miripan kon uya waku pe pori'ma' kuru ri itekare ekama'pu. Miripan tu'ke ri Esuweru amu' miri awonsi'ki Esuweru amu' pen ni niri ena'pu Sises apurinin nan pe. ²E'tane Esuweru amu' itekare apurinin nan pen uya Esuweru amu' pen turunka'pu iri pe to' pi' to' e'ku'to' pe. ³Miri yau, Paaru miri awonsi'ki Panapas pokon uya wu' apitu'pu inke ri. Enari'mura Sises ekareei ekama pi' to' esi'pu, i'napai ri waku nonkasa' iya ekareei esi enpoikainin pe, to' repa'pu iya wini to' meruntiru ke, i'tuto' ipikiri miri awonsi'ki a'kwarupi'nin ku'to' pe to' uya. ⁴Kamoro Ai'koniyan po tuku'mansan epantakapi'sa' esi'pu; taron kon uya enno'sa' kon apuri'pu, taron kon uya taron kon Esuweru amu' apuri'pu.

⁵Miri yau, Esuweru amu' pen miri awonsi'ki Esuweru amu' usauroku'pu Paaru miri awonsi'ki Panapas kota'mato', tepuru kon pokon pe to' e'kama'pu, ti' ke to' wito' pe tuuya'nokon. ⁶E'tane Paaru miri awonsi'ki Panapas uya etasa' esi'pu, miripan kon uti'pu taron ni pata pona, Restura, Terupi, miri awonsi'ki iwoino' nan pata pona, Rai'koniya pata yau. ⁷Miri

yau tesi kon a'tai, itekare ekama pi' to' esi'pu ka'pon amu' pi'.

Paaru, Panapas Pokon Esi'pu Restura, Terupi Po

⁸Restura po ka'pon esi'pu ise'mepi'sa' i'ta. Iyentusa' a'tai, miri kasa ri iyese'pu, miripan usari para ri iyese'pu. ⁹Paaru usauroku Itepuru Sises pi' etapitu pi' iyese'pu. Paaru uya enpitu'pu, miripan ene'pu iya Itepuru Sises uya kuru upika'ti tukai' apuri'pu iya. ¹⁰Miripan Paaru uya, "E'mu'sa'ka', utonpa!" ta'pu ipi' tuku'pi'nunse. Miri etasa' tuuya a'tai, iye'sanumu'pu, miripan usari'pu waku pe.

¹¹Paaru nukupu'pu tense, papa amu' tato' pe ri Paaru miri awonsi'ki Panapas kupu'pu to' uya. Tamaimu kon, Rai'koniya pon kon maimu yau to' uki'pi'nunpitu'pu, "Apu'ne, enti'! Pusamoro ka'pon amu' esi miri papa amu' pe, e'tane ka'pon amu' pe to' era'tisa', miripan kon u'tisa' ka' winipai upika'tise'na'nokon!" ta'pu to' uya. ¹²Miri yau, Panapas esaku'pu to' uya Isus tukai', "Eke pe iyese," ta'pu to' uya, miripan Paaru esaku'pu to' uya frames tukai', apu'ne para tausau'ro'sen pe iyese pi'. ¹³Eke pata mura'ta yau ri to' use'mato', ipuremato' iwu' esi'pu Isus itese' tepuru kon apurise'na ka'pon amu' utito' ita'. Miripan to' use'mato' turawasomanin uya Paaru miri awonsi'ki Panapas nukupu'pu eta'pu. Miripan uya asa'ri paka amu' nee'pu, pata ipu'ru to' i'mu

woi, to' use'mato' tūrawasomān, miri awonsi'ki ka'pon amū' esi'pū paka amū' inwipai Paarū miri awonsi'ki Panapas apuri pe tenta'nato' kon pe.

¹⁴Miri yau, Paarū miri awonsi'ki Panapas uya to' e'kamasā' i'tu'pū paka amū' wini pi' tapuri kon pe to' po'tito' pe tūuya'nokon, miripan kon uya tūpon kon pūro'pon karapitū'pū, “Kane!” ta tūuya'nokon e'kwa pe. To' eka'tumū'pū ka'pon amū' koro'ta' tūuki'pi'nūnpitū'ima'nokon, ¹⁵“Ina tonpa ton, miri kū'ku'tūu! Ka'pon amū' ri mari ina, awarai'nokon ni mari! Emenna' itekare wakū kuru ekamai' ina uye'sa' ipi'nokon. Tūron kon ika'sa' ton piyapai era'titi'; i'napairon Papa piya' era'titi! To' uya ipika'ti kon pūra iyese. Kūri ri esi Papa pe, tanporon non koneka'pū iya tanporo ipo te'sen. Non koneka'pū iya, parau, tuna ton, ka' miri awonsi'ki tanporo uri'nokon. ¹⁶Pena ri imiri'nokon Esuwerū amū' pen esi'pū i'se ri iwe'to' kon apuri pi' Papa uya ri iyenpitu'pū kon, apūne pūra ti'tu auya'nokon pūra iyese pi'. ¹⁷E'tane si, tanporon kon ka'pon amū' enu ya' isenpoikasa', kūri ri uya wakū ton ke repān nisa' tukai' i'tu kon pa. Wakū ton ni ku'sa' iya iiwano' kon pe: tuna enno'sa' iya; tūweyu a'tai iyepetato' pe iikiyari kon ku'sa' iya; eke pe ri kiyari ke irepasa' iya 'nokon; miri awonsi'ki pori' pe iku'sa' iya 'nokon,” ta'pū

Paarū uya. ¹⁸To' usaurokū eta'pū ka'pon amū' uya e'tane ri, to' ereutanukū i'se to' e'tane paka amū' wini to' uya namai', to' ereutanukū to' uya poken pūra iyese'pū.

¹⁹Miri a'tai, Esuwerū amū' Antiyo' miri awonsi'ki Ai'konian pon kon uyee'pū, miripan kon uya tūwinikū'i'nokon to' mo'ka'pū. Miripan kon uya ti' ke Paarū wipitū'pū. Iyeri'sa' pe tekamai', to' uya ipi'sikū'pū pata apai. ²⁰E'tane Sises apurinin nan uti'pū Paarū piya'. To' amūra'pū iwoi. Iye'mū'sa'ka'pū, miripan enna'po'pū pata pona to' a'kiri. Iyema'sa' yau, Paarū miri awonsi'ki Panapas uti'pū Terūpi pona Restura ponsi'ki.

To' Enna'po'pū

Antiyo', Siriya Yawon Pona

²¹Miri yau, to' uko'mamū'pū Sises ekareei Papa Maimu ekama pi'. Tu'kan kon ni kupū'pū to' uya Sises apurinin nan pe. Miri tūpo, enna'pon pi' to' e'sara'ti'pū Restura pona miri awonsi'ki Ai'konian pona miri awonsi'ki Antiyo' pona. ²²Pata kaisari ri Sises apurinin nan epopitū'pū to' uya. To' meruntitānukū'pū to' uya, miripan kon auro'ka'pū to' uya itekare pi' to' pori'ma pe, Sises ri apuri pi' to' uko'manto' pe. “Uri'nokon ekota'mato' pe iyese Papa e'to' esa' wannī pe ya' epa'kan nito' pe,” ta'pū to' uya. ²³Paarū miri awonsi'ki Panapas uya so'si

14:15 E'sotas 20:11; Eren 146:6

epuru pe te'ton kon anamū'pū. Tawipūremai' miri awonsi'ki tenta'nai' pūra tūserumai' to' tūrū'pū to' uya to' napurinū Itepuru ena'.

²⁴Pi'sitiya itese' pata poro tūuti kon tūpo, Paarū miri awonsi'ki Panapas uti'pū Panperiya pona. ²⁵Miripan kon uya Pirūka itese' pata eporo'pū, to' uya Papa Maimu ekama'pū ka'pon amū' pi'. Miri tūpo, to' uti'pū parau e'pi pona, to' uya A'tariya itese' pata eporo'pū. ²⁶A'tariya ponsi'ki kanau yau, parau kau to' uti'pū Antiyo' pona ri mari te'sara'ti'pū kon ya'. Miri yau, to' tūrū'pū Papa uya wakū nonkasa' ya' to' tūrawasooi to' uya enuka'nū'sa' na'ne' si ku'nin pe to' e'to' pe.

²⁷Antiyo' pona tūuye'sa' kon a'tai, tanporo apurinin nan amūra-nūka'pū to' uya. Papa nūkupū'pū tūporo'nokon ekama'pū to' uya to' pi', Esuwerū amū' pen uya apurito' pe ikupū'pū iya rū'pū. ²⁸Paarū miri awonsi'ki Panapas pokon uko'manpiti'pū Antiyo' po inke ri kapūi tenno'pi'se, Sises pi' enupasa' kon miri pata yawon kon piyau.

**Konsurū Amū'
Surusiran Pon Kon**

15 ¹Tūron kon Sises apurinin nan uti'pū Isutiya yapai Antiyo' pona tūtonpa kon enupase'na, “ŷyun kon pi'pi puturūkasa' auya'nokon a'tai riken, Mosi' nekama'pū awiri, Papa uya

ipika'ti kon,” tase'na. ²Seri uya, Paarū miri awonsi'ki Panapas pokon sakoropa'pū, miripan pi' to' pokon pe to' e'sei'pitu'pū. Miri a'tai, Paarū miri awonsi'ki Panapas anamū'pū to' uya tūron kon apurinin nan pokon pe, to' utito' pe Surusiran pona, enno'sa' kon miri awonsi'ki so'si epuru ton ense'na to' uti'pū miri pi'.

³Apurinin nan uya to' ennoko'pū. To' uti koro'tau Pini'siya, Sameriya yawiri, Sises apurinin nan auro'ka'pū to' uya, “Esuwerū amū' pen enasa' man Sises apurinin nan pe,” tukai'. Tanporon kon epori'ma'pū ipan pe eta tūuya'nokon a'tai. ⁴To' uye'sa' a'tai Surusiran pona, to' ereutanūka'pū apurinin nan uya, enno'sa' kon miri awonsi'ki so'si epuru ton uya. Miri a'tai, Paarū miri awonsi'ki Panapas uya to' pi' ekama'pū tanporo Papa nūkupū'pū tūporo'nokon Esuwerū amū' pen koro'tau. ⁵Miri a'tai, Sises apurinin nan Pari'si amū' tonpa ton e'mū'sa'ka'pū, miripan kon uya ta'pū, “Esuwerū amū' pen yun pi'pi puturūkato' pe kuru ri iyese miri. Mosi' nekama'pū main apurito' pe to' uya ekama auya'nokon kuru miri to' pi',” ta'pū to' uya.

⁶Seri pi' isenuminkase'na itekare ekamai' enno'sa' kon miri awonsi'ki so'si epuru ton amūra'pū. ⁷Inke kuru tūsausorokū kon tūpo, Pi'ta e'mū'sa'ka'pū, ta'pū iya to' pi', “Utonpa ton, i'tu auya'nokon pena Papa uya uyanamū'pū

i'koro'tapai'nokon, Esuweru amu' pen uya itekare etato' pe uri wini, to' uya apurito' pe niri. ⁸Papa, tanporon usenuminkato' i'tunin uya enpoika'pu Esuweru amu' pen anamu tuya Waku A'kwaru turu tuya wini to' pona, uri'nokon pi' ikupu'pu tuya kasa. ⁹Taron ni pe uku'sa' iya 'nokon para ri iyese kamoro piyapai. To' ewan koruka'pu iya to' uya apurito' wini. ¹⁰Fri pe ken si iyese pi' Papa i'tupitu 'ise iwesi kon? Sa'man pe ri Esuweru amu' pen apurinin nan kupu 'ise iwesi kon miri, uri'nokon miri awonsi'ki ukupunu kon nukupu'pu pen ni. ¹¹Kane! Apuri Itepuru Sises uya waku nonkasa' poro epika'tin nisa', to' kasa ri," ta'pu iya.

¹²Tanporo iyamurasa' kon esi'pu e'pana Panapas miri awonsi'ki Paar u eta pi' i'tuto' ipikiri miri awonsi'ki a'kwarupi'nin ku'sa' Papa uya taporo'nokon Esuweru amu' pen koro'tau ekama tane to' uya. ¹³To' e'nonkasa' a'tai, Isens usauroku'pu, "Utonpa ton, uyetati'. ¹⁴Saiman nekamayan ko upi'nokon, Esuweru amu' pen pi' 'aiko' tato' tuya enpoika Papa uya, to' tonpa ton anamu tuya wini tamunki pe to' e'to' pe. ¹⁵Seri si esi seri pena pu'kena' amu' numenuka'pu awiri. Iye'menukasa' na'ne' kasa:

¹⁶“ ‘Seri tupo, enna'poto' oton
Tepi' iwu' ru'pu
uta'mo'kasa' konekase'na,

miripan a'motasa' ami uya
emenna' pe,
inna'po uya pena iyese'pu
kasa.

¹⁷Miri a'tai, ka'pon amu' tonpa
ru'san uya
Itepuru warinpatu' pe,
tanporo kamoro Esuweru
amu' pen uri iwano' pe
to' esi,
tasa' Itepuru uya, seri
ku'nin nu'pu uya”

¹⁸Pena ri isi'tusa' ru'pu seri.

¹⁹“Miri pe iyese pi', miri pi'
ekonekasa' man: sa'man pe
iku'pai para man Esuweru amu'
pen pona nera'tiyai'ne' nan
Papa winikui'. ²⁰Miri pe iyese
pi' to' ena' imenukapai'nokon, to'
auro'kapai'nokon iri kiyari ika'sa'
ena' itusa' pi' to' enta'na namai';
tekumai' makoi tuku'se para to'
e'to' pe; terupatu'kai' iwisa' o' miri
awonsi'ki munu'pan pi' to' enta'na
namai'. ²¹Papa uya Mosi' repa'pu
ike Main ekama pi' ka'pon amu'
nuko'manyan pena si'kiri ri, Sapa'
kaisa ri usenupan nito' iwu' tau
pata kaisari ri seri pu'ku pona ri,”
ta'pu iya.

**To' Numenuka'pu Esuweru
Amu' Pen Apurinin Nan Ena'**

²²Miri a'tai, enno'sa' kon
miri awonsi'ki so'si epuru ton,
tanporo so'si tawon kon pona
ri niri, waku pe poken iyese'pu

p 15:16-17 Emas 9:11-12

15:7 Inkupu'pu 10:1-43 15:8 Inkupu'pu 10:44; 2:4
15:16-18 E'sotas 34:15-17; Ripaiti'kas 18:6-23; 17:10-16

ka'pon amu' anunto' pe to' uya tu'koro'tapai'nokon, miripan kon uya to' ennoko'pu Antiyo' pona Paarü miri awonsi'ki Panapas a'kiri. Asa'ron kon anumu'pu to' uya: Isutas, Pa'sapas tato'; miri awonsi'ki Sairas, tatonpa kon epuru pe te'san. ²³Miripan kon enau kareta ennoko'pu to' uya se tawon si:

“Ina, enno'sa' kon miri awonsi'ki so'si epuru ton, irunan kon uya, 'Miyari'nokon,' ina tonpa ton pe iyenasa' kon Esuweru amu' pen Antiyo', Siriya, Siri'siya pon kon. ²⁴Ina uya etasa' man ina nennoko'san pen ni uti'pu miri ya' amanenpase'na'nokon, i use numinkato' kon tumanenpai'. ²⁵Miri wenai, tanporo ina e'kupu'pu ka'pon amu' anumu pi', miripan kon ennoko'pu ina uya imiyamoro piya', Panapas miri awonsi'ki Paarü pokon a'kiri, ²⁶ka'pon amu' tuma'tato' kon pi' tenari'nunsan pen ni pena iyepa'kaka'sa' kon ni miri yai, uyepuru kon Sises Kurai ese' wenai.

²⁷“Miri pe iyesi pi', ina uya Isutas miri awonsi'ki Sairas ennoko miri, kareta ina numentuka'pu enpoikase'na tunta kon yai. ²⁸Waku poken iyesi'pu Waku A'kwaru miri awonsi'ki ina pona, imiri'nokon pona e'tape'ne' ri

turu namai' i'se e'nito' entai ri. ²⁹Papa tato' pe ipi' ika'sa' ena' use'man nisa' ru'pu pi' kenta'natau; miri pona mun pi' kenta'natau, miri awonsi'ki o' erupatu'kasa' ru'pu niri; tekumai' niri ke'makoimatuu. Waku pe iwesi kon miri seri ton apanama'pu kon awiron pe iwesi kon yau. Hsiri ina ne'nonkayan, waku pe si tanporo miko'mantui'”

tawon.

Isutas Miri Awonsi'ki Sairas Uya Kareta Turu'pu

³⁰Asakiri'nan kon warawo' amu' ennoko'pu to' uya Antiyo' pata pona. To' amurasa' a'tai tanporo so'si ta', kareta turu'pu to' uya to' ena', ³¹miripan ekama to' uya a'tai, to' epori'ma'pu tupa'kinin kon pe main esi pi'. ³²Miri a'tai, Sairas miri awonsi'ki Isutas, pu'kena' pe te'san uya eke pe ri to' pika'ti'pu. Merunti pe ri tatonpa kon amu' kupu'pu to' uya. ³³To' uko'mamu tupo miri yau, to' tonpa ton uya to' ennoko'pu tausewankamai' pu'ra to' utito' pe tenno'nin nu'san kon piya'. ³⁴Miri e'tane, Sairas ekoneka'pu miri yau ri tu'uko'manto' pe.^q

³⁵E'tane Paarü miri awonsi'ki Panapas pokon e'nimi'pu Antiyo' po. Miri yau, tu'kan kon pokon pe esii'ma enupan pi', miri awonsi'ki Itepuru Sises maimu ekama pi' ri to' esi'pu.

^q 15:34 Taron ni ton penaro' kuru imenukasa' yau v. 34 pu'ra iyesi.

**F'sentai Paarŭ, Panapas
Pokon Eseru Esi'pŭ**

³⁶Miri tŭpo, Paarŭ uya ta'pŭ Panapas pi', "Enna'ponpai utonpa kon amŭ' ka'kŭranpase'na tanporo pata kaisari Itepuru Maimu ekama ne'taine' awiri, ikupŭ to' uya ense'na," ta'pŭ iya. ³⁷Panapas esi'pŭ Isaan, Ma' tukai' tesa'sen ari i'se ta'kiri'nokon, ³⁸e'tane Paarŭ pona ipoken pŭra iyesi'pŭ, apŭne pŭra tŭninsa' iya 'nokon pi' Panperiya yau iye'turawasoma pŭra iyesi'pŭ to' a'kiri. ³⁹Ipan pe isi pe to' e'sei'pitu'pŭ. Miri wenai, to' e'nonka'pŭ isipiyapai; Panapas uya Ma' anŭmŭ'pŭ tisakon pe. To' uti'pŭ kanau yau Sai'pŭras pona; ⁴⁰e'tane Paarŭ uya Sairas anŭmŭ'pŭ. Sises apurinin nan uya to' tŭrŭ'pŭ Itepuru uya wakŭ nonkasa' ya'. Miripan kon nin si uti'pŭ miri. ⁴¹To' uti'pŭ Siriya miri awonsi'ki Siri'siya awiri, apurinin nan meruntitanŭku pi'.

Temu'ti Ena'pŭ To' Tonpa Pe

16 ¹Paarŭ miri awonsi'ki Sairas pokon uti'pŭ Siri'siya itese' pata ponsi'ki Terŭpi pona, miripan kon uti'pŭ Restŭra pona Sises apurinin Temu'ti itese' pata'se' ya'. Isan esi'pŭ Esuwerŭ amŭ' tonpa pe, Sises apurinin, e'tane ikuipŭnŭ esi'pŭ Kiri' pe. ²Itekare apurinin nan, Restŭra miri awonsi'ki Ai'koniyon pon kon uya, "Wakŭ kŭri ri Temu'ti," ta'pŭ. ³Ta'kiri

tŭron ni pata ya'ne Temu'ti miri awonsi'ki Sairas anapai Paarŭ esi'pŭ, miripan uya Temu'ti yun pi'pi puturŭka'pŭ. Miri kupŭ'pŭ iya, Temu'ti uya ekamŭra miri pata yau te'san Esuwerŭ amŭ' e'kupŭ emapu'ti namai', apŭne pŭra Esuwerŭ pe pŭra ikuipŭnŭ esi uya iku'sa' pe pŭra to' uya i'tu'pŭ. ⁴Miri yau, pata kaisa ri to' usari'pŭ. Surusiran pon kon enno'sa' kon miri awonsi'ki so'si epuru ton nŭkoneka'pŭ main Esuwerŭ amŭ' pen napuri ton pe iku'sa' ekama pi' to' esi'pŭ pata kaisa ri. ⁵Miri pi', Sises apurinin nan umeruntita'pŭ apurito' tŭuya'nokon yau, miripan kon epiriku'pŭ tu'ke ri wŭi kaisa ri.

**Paarŭ Enu Uta'kwakasa' Uya
Ma'sitoniya Pon Ene'pŭ**

⁶Paarŭ miri awonsi'ki itonpa ton uti'pŭ Pŭrekiya nono poro miri awonsi'ki Kare'siya itese' pata epose'na, apŭne pŭra Wakŭ A'kwarŭ esi'pŭ Sises ekareei ekama to' uya i'se pŭra Eisa po. ⁷Paarŭ miri awonsi'ki iya'kiri te'san uya Maisa itese' pata eposa' altai, Pitiniya itese' pata ya' itipai to' esi'pŭ, e'tane Sises A'kwarŭ esi'pŭ miri ya' to' uti i'se pŭra. ⁸Miri pe iyesi pi', to' uti'pŭ to'sari ri Maisa poro, miripan kon epa'ka'pŭ Tŭrowas pona. ⁹Ewarupi nau, Papa uya ka'pon Ma'sitoniya pon ento' pe Paarŭ enu a'kwaka'pŭ. Ka'pon e'mŭ'sa'kasa' ene'pŭ iya ata'kwarŭkase'na, "Ma'sitoniya pona ina ipika'titanŭ'ki," ta'pŭ

iya. ¹⁰Paaru enu uta'kwaka'pu tupo, inke para ri Ma'sitoniya pona tautito' kon pe ina e'kama'pu, apune para ina uya i'tu'pu Papa esi miri yau ina uya itekare ekama i'se tukai'.

**Retiya Ena'pu
Sises Apurinin Pe**

¹¹Ina ekanwa'ti'pu kanau ya' Turowas po, miripan parau ni'kwiri'nuku'pu ina uya opa'wu Samo'tures itese' pona. Iyema'sa' yau, ina uti'pu Niya'pores itese' pata pona kanau yau. ¹²Miri tupo, ina uti'pu makui' Piri'pai itese' pata pona, Roman amu' neporo'pu. Eke pe kuru seri pata esi'pu Ma'sitoniya po. Inke ru'kwi ri wui ina uko'manpitu'pu Piri'pai yau.

¹³Ina uti'pu pata apai tuna tau'tisen e'pi pona Sapa' a'tai, Esuweru amu' ipuremato' pata'se' eporo i'se ina esi'pu. Ina ereutapitu'pu, miripan usauro'ni pi' ina e'sara'ti'pu miri yau, iyamura'sa' kon uri'sami'si amu' pokon pe. ¹⁴Miri yau, tikin nan to' tonpa ina maimu eta pi' te'sen esi'pu, Retiya itese', Taya'tira itese' pata winon, tatariren pon atu kuru'po'poma pi' te'sen. Retiya esi'pu Esuweru amu' tonpa pen ni, e'tane ri Papa pi' tuwipuremasen pe iyesi'pu. Paaru nekamanu Sises ekareei apurito' pe iya Itepuru uya itewan a'koka'pu. ¹⁵Retiya miri awonsi'ki itiwu' tau te'san pa'taisima ina uya tupo, tiwu' ta' ina ki'ma'pu iya. "Itepuru Sises apurinin pe esi tukai' i'tu auya'nokon pi' si, uiwu' ta' isi'ti," ta'pu iya. Ina utito' pe tiwu' ta' ina kuu'pu iya.

**Paaru, Sairas A'si'pu
To' Uya Pariki'si Ta'**

¹⁶Turon ni a'tai, Esuweru amu' ipuremato' ya' ina uti a'tai, to' pitoru pe te'sen uri'san eporo'pu ina uya, makoi a'kwaru yen pe iyesi'pu, miripan esi'pu pena ri te'ku'ton i'tunin pe. Itesa' pe te'san uya eke pe purata eporo esi'pu, apune para ka'pon amu' uya e'ma'pu to' ena' te'ku'sen ekamato' pe iya. ¹⁷Puse ri uri'san uya Paaru miri awonsi'ki itonpa ton e'ma'pukapitu'pu inke iki'pi'nunpitu'pu ma, "Pusamoro ka'pon amu' esi Eke Papa pitoru ton pe, miripan kon uya epika'tin nito' eseru ekama!" ta'pu iya. ¹⁸Inke ri miri ta pi' iyesi'pu Paaru tanpokumai', miripan era'ti'pu makoi a'kwaru yen winikui', miripan uya, "Sises Kurai ese' yau ayau'ro'ka uya, puse uri'san apai epa'ka!" ta'pu. Miri a'tai ri, makoi a'kwaru epa'ka'pu iyapai.

¹⁹Itesanon uya seri enta' tapurataai kon epoto' iya oton pen tukai' i'tusa' a'tai, Paaru miri awonsi'ki Sairas a'si'pu to' uya. To' pi'siku'pu to' uya kuru'po'po pi' e'nito' pata'se' ya' eke ton pata esanon piya'. ²⁰Roman amu' epuru ton piya' to' ari'pu to' uya, miripan kon uya, "Esuweru amu' pusamoro, e'tane upata'se' kon yawon kon ka'pon amu' anpokuma to' uya. ²¹Utonpa kon amu' enupa to' uya uri'nokon Roman amu' nukupun pen ni ku'to' pe to' uya," ta'pu to' uya.

²²Miri yau, anpisin ton ka'pon amu' e'sara'ti'pu to' tonpa pe Paaru miri awonsi'ki Sairas ewa'noma pi',

miripan itepuru ton uya soisa amū' apiyonti'pū to' pon kara'pi'to' pe to' uya, miri awonsi'ki to' ari'po'pi'to' pe to' uya. ²³Isi pe to' ari'po'pitū tūpo, Paarū miri awonsi'ki Sairas a'si'pū to' uya pariki'si ta'. Iteperu ton uya to' a'sinin auro'ka'pū, wakū pe to' erasuntito' pe iya. ²⁴Main etasa' tūuya a'tai, i'na' kuru to' ennin uya to' ewonnūku'pū, miripan uya yūi akū'pi'sa' yai'ne to' pūrakon amū' enpa'kapitū'pū, ti'si kon amū' amapitū to' uya namai'.

²⁵Anomūra' a'tai, Paarū miri awonsi'ki Sairas esi'pū eke pe ipūreman pi'. To' userenka'pū Papa apuripitū'pū to' uya, tūron kon a'sisa' kon esi'pū to' etapitū pi'. ²⁶Miri koro'tau, pana' pe tūru'pūnū esi'pū, pariki'si usi'ki'ma'pū miri, iyapon ni usi'ki'ma'pū. Inke pūra ri, pariki'si mūra'ta amū' uta'kokapitū'pū, miri awonsi'ki a'sisa' kon auronpi'to' ike i'sen amū' emo'kapitū'pū. ²⁷Miri a'tai, a'sisa' kon esa' upaka'pū, miripan mūra'ta amū' uta'kokapi'sa' tense, tūsuparaai mo'ka'pū tūtapurukato' pe ike, apūne pūra a'sisa' kon utipitū'pū tukai' tūsenuminka ke. ²⁸"fiwano' pe ri, katapurukai, tanporo ri seri yau ina man!" tukai' nin si Paarū uki'pi'nūnpitū'pū miri.

²⁹Tūweyu nin si i'se a'sinin uki'pi'nūnpitū'pū miri, miripan ewomū'pū Paarū miri awonsi'ki Sairas pokon rakui' iye'sekunka'pū e'tititi'kai'ma. ³⁰To' enpa'ka'pū iya pariki'si tapai, miripan kon pi', "I'ri kuru tūku'se epika'tito' pe iyesei?" ta'pū iya to' pi'.

³¹Miripan kon uya, "Iteperu Sises apuriki iyepika'ti pa, imiri miri awonsi'ki iiwū' tau te'san," ta'pū to' uya ipi'. ³²Miri yau, Paarū miri awonsi'ki Sairas uya Iteperu Sises ekareei ekama'pū a'sinin miri awonsi'ki itiwū' tawon kon pi'. ³³Miri a'tai ri, a'sinin uya to' ari'pū to' ari'po'pitū'pū pata'pū korūkase'na. Inke pūra ri miri tūpo, Paarū miri awonsi'ki Sairas uya kūri ri miri awonsi'ki itiwū' tawon kon pa'taisima'pū. ³⁴Miri yau Paarū miri awonsi'ki Sairas ari'pū a'sinin uya tiwū' ta' to' a're'tii'. Papa apuri tūuya pi' nin si ipan pe pori' pe iyesei'pū miri, miri awonsi'ki itonpa ton ni niri.

³⁵Miri ema'sa' yau, iteperu ton uya pūresiman amū' ennoko'pū a'sinin piya'. "Tiwi kamoro ka'pon amū' nutii," tawon main esa' pe.

³⁶Miripan uya Paarū miri awonsi'ki Sairas pi', "Iteperu amū' uya uyapiyontisa' man iyenno'to' kon pe uya, miripan yau entanti' ri si, tūsewankamai' pūra," ta'pū iya.

³⁷E'tane Paarū uya pūresiman amū' maimu eikū'pū, "Iri ku'sa' ina uya pūra ri iye'tane, soisa amū' uya anpsin koro'tau ina ari'po'pi'to' pe to' uya, to' auro'ka'pū! Roman amū' ina e'tane pariki'si ta' ina a'si'pū to' uya, miripan kon esi ama'ai ina ennoko i'se. Kane! Tiwi Roman amū' epuru ton nūyepūi ina enpa'kai'," ta'pū iya.

³⁸Miri yau, pūresiman amū' epuru ton enna'po'pū Paarū maimu rū'pū ekamai' Roman amū' epuru ton pi'. Roman amū' ina, tasa' Paarū miri awonsi'ki Sairas

uya etasa' tũuya'nokon a'tai, to' usenari'pa'pũ. ³⁹Miripan kon uti'pũ to' pi' iri pe ri ina e'sa' man tase'na. Paarũ miri awonsi'ki Sairas enpa'ka'pũ to' uya pariki'si tapai, miripan kon pi', "Entanti'," ta'pũ to' uya. ⁴⁰Pariki'si tapai tepa'ka kon tũpo, Paarũ miri awonsi'ki Sairas pokon uti'pũ Retiya iwũ' ta', miripan kon e'seporo'pũ tũtonpa kon amũ' pokon pe. To' auro'ka tũpo to' pori'ma pe, Paarũ miri awonsi'ki Sairas uti'pũ Piri'pai apai.

Paarũ Esi'pũ Tesaroni'ka Po

17 ¹Paarũ miri awonsi'ki Sairas uti'pũ Anpi'pores miri awonsi'ki A'poroniya pata ton awiri. Tesaroni'ka pata eposa' to' uya a'tai, Esuwerũ amũ' usenupato' iwũ' eporo'pũ to' uya miri pata yau. ²Te'pi'to' kasa ri, Paarũ uti'pũ Esuwerũ amũ' usenupato' iwũ' ta' osorũwau Sapa' kaisa ri ka'pon amũ' auro'ka pi' iyesi'pũ iye'menukasa' itekare ke. ³Enpoika pi' iyesi'pũ Kũrai' ekota'mato' pe iyesi'pũ, ima'tato' pe iyesi'pũ, miri tũpo iye'mũ'sa'kato' pe terikũ'pũ apai iyesi'pũ niri. "Pũse ri Sises kanyauro'kayatũ'ne' esi miri Kũrai pe," ta'pũ iya to' pi'. ⁴Tũron kon Esuwerũ amũ' ena'pũ Paarũ miri awonsi'ki Sairas pokon tonpa pe, tu'kan kon ni Kiri' amũ' Papa namanin nan pokon pe ri niri, miri awonsi'ki tũnamai' te'san uri'sami'si amũ' ri niri.

⁵E'tane tũron kon Esuwerũ amũ' ikinta'pũ. Miri a'tai, iri iteseru ton ka'pon amũ' kan to' uti'pũ kũrũpo'po pi' e'ni pata'se' apai. Miri tũpo, ka'pon amũ' amũranũkũ'pũ to' uya, miripan kon uya usewankaman nito' sara'ti'pũ. Miripan kon uti'pũ Ise'sũn iwũ' ta' Paarũ miri awonsi'ki Sairas warinpai', to' ne'to' pe tũuya'nokon tu'kan kon ka'pon amũ' koro'ta'. ⁶E'tane Paarũ miri awonsi'ki Sairas eporo'pũ to' uya pen. Miri wenai, Ise'sũn pi'sikũ'pũ to' uya. Tũron kon niri Sises apurinin nan ne'sa' niri to' uya esi'pũ eke ton itepuru ton piya'. Tu'kan kon ka'pon amũ' uki'pi'nũmũ'pũ, "Pũsamoro manenpanin ku'nin nan pata yau uye'sa' man seri yau. ⁷Ise'sũn uya to' eretanus'sa' tũpiyau. Tu'kan ni kupũ'pũ to' uya kin Sisa uya tasa' poro'pũra. Ta to' uya moro man tũron ni kin, Sises tukai' tesa'sen ta to' uya," ta'pũ to' uya. ⁸Seri etasa' pata epuru miri awonsi'ki anpisi' ka'pon amũ' uya a'tai, to' e'sakoropa'pũ. ⁹Miri tũpo, Ise'sũn miri awonsi'ki tũron kon ka'pon amũ' uya pũrata tuto' pe to' kupũ'pũ itepuru ton uya to' nonkato' pe to' utito' pe aka'ne' pe.

Paarũ Miri Awonsi'ki Sairas Esi'pũ Pereya Po

¹⁰Ewarupi uye'sa' pe ri, to' tonpa ton uya Paarũ miri awonsi'ki Sairas ennoko'pũ Pereya pata pona. Pereya pata eposa' tũuya'nokon a'tai, Paarũ miri awonsi'ki Sairas

^{17:3} Kũrai; miri pe pũra, *Me'saya; Papa Nanũtu'pũ* ta e'kwa pe.

pokon uti'pŭ Esuwerŭ amŭ usenupato' iwŭ ta'. ¹¹Pereya pon kon Esuwerŭ amŭ esi wakŭ pe pari iteseru, isenupapai pari Tesaroni'ka pon kon ka'pon amŭ entai, ipan pe Sises ekareei inetapai to' esi'pŭ. Tiwiri wŭi kaisa ri iye'menukasa' itekare warinpa pi' to' esi'pŭ, i'napai ri pe' Paarŭ uya tenupato' kon esi tukai'. ¹²Tu'ke kuru Esuwerŭ amŭ uya itekare apuri'pŭ, miri awonsi'ki eke ton Kiri' pasi ton miri awonsi'ki warawoti'si amŭ uya niri apuri'pŭ.

¹³Paarŭ uya Pereya po Papa Maimu ekama tukai' Esuwerŭ amŭ Tesaroni'ka pon kon uya etasa' a'tai, to' kanan uti'pŭ ka'pon amŭ tŭrŭnkase'na. ¹⁴E'tane inke pŭra Paarŭ ennoko'pŭ itonpa ton uya tŭron ni pata ya', e'tane Sairas miri awonsi'ki Temu'ti pokon uko'manpi'tŭ'pŭ Pereya po ri. ¹⁵Paarŭ apŭrŭnpanin nŭ'san uya ari'pŭ A'tens itese' eke pata pona, miripan kon enna'po'pŭ Pereya pona Paarŭ maimu esa' pe, "Inke pŭra pari Sairas miri awonsi'ki Temu'ti pokon uya uyepoto' pe," tawon.


Paarŭ Esi'pŭ A'tens Po

¹⁶To' enupikiri Paarŭ esi koro'tau A'tens po, ipan pe ri ekamŭra iye'kupŭ'pŭ ika'sa' ton ipŭreman nito' ton ipi' ene tŭuya a'tai miri pata yau. ¹⁷Esuwerŭ amŭ usenupato' iwŭ tau, Esuwerŭ amŭ miri awonsi'ki Esuwerŭ amŭ pen Papa namanin nan pokon pe usauro'ni pi' iyese'pŭ, miri

awonsi'ki kŭrŭpo'po pi' e'nito' yau ri niri, miri ya' tŭutip'i'san pokon pe wŭi kaisa ri. ¹⁸Tŭron kon enupanin nan, E'pi'kuriyan tato' ton ipi' miri awonsi'ki tŭron kon Si'towi' tato' kon esi'pŭ ipokon pe e'sei'pi' ni pi' inapurinŭ ton pi'. Tŭron kon pŭsamoro uya, "Ŧri si ta pŭse iya'kwarŭ pŭn ka'pon uya?" ta'pŭ to' uya.

Tŭron kon uya ta'pŭ, "Tŭron ni papa pi' ipŭreman nito' pe enupan ni iya, tŭron ni pata awon kon kasa," ta'pŭ to' uya. Seri ta'pŭ ka'pon amŭ uya, apŭne pŭra wakŭ Sises e'mŭ'sa'ka'pŭ ekareei ekama Paarŭ uya pi'. ¹⁹Miri tŭpo, Paarŭ nee'pŭ to' uya Areyo'pakas itese' pata'se' ya'. Miri yau, "Ina auro'ka' seri emenna' iyekareei ke," ta'pŭ to' uya ipi'. ²⁰"Iyekareei man ina netapitŭnŭ pe pŭra ri; miri wenai, i'ri kuru ta auya e'kwa pe iyese' tukai' ina pi' enpoikaki," ta'pŭ to' uya. ²¹(Tanporo A'tens miri tŭpo ka'kŭran amŭ miri yau tŭuko'mansan esi'pŭ tŭweyu kon enno'pitŭ pi' emenna' itekare pi' usauro'ni pi'.)

²²Miri tŭpo, Paarŭ e'mŭ'sa'ka'pŭ ka'pon amŭ amŭrasa' koro'tau, Areyo'pakas pata'se' yau, "A'tens pon kon ka'pon amŭ! Iyene uya 'nokon tanporo ri ipŭreman iya'kwarŭ pe me'atŭi', ²³apŭne pŭra tanporo pata yau upinimŭ koro'tau, iwipŭremato' kon yau ene pi' iuse'mato' kon apon eporo'pŭ uya. Miri pi' iye'menukasa' ensa' uya man, "Ti'tusen pen ni Papa ena', tawon. Seri pe si ini'tunŭ kon



*Ini'tunu kon pen ni ipureman nito'
ipi' ekareei ekama uya. (17:23)*

pen ni ipureman nito' ipi' ekareei ekama uya seri ipi'nokon.

²⁴“Papa, non konekanin nu'pu, tanporon Epun miri awonsi'ki non esi itiwano' pe, miripan uko'mamu pen ka'pon nami'pu temiyatu ke iuti tau. ²⁵Papa esi miri ka'pon uya tarepa enupikiron pen, apune para tanporon ni i'se iye'to' esi ipiyau, apune para Papa kari ri tanporon kon ni repanin uko'man ni a'kwaru ke. ²⁶Tikin nan Papa nukaa'pu ka'pon wini, tu'ke ka'pon amu' epamu'pu seri non po, seri non emu' poro'ne to' uko'manto' pe. Pata weyu ton koneka'pu iya iye'to' awiri'ne. Pata ton niri iye'to' airi'ne ka'pon uko'manto' yau pe'ne. ²⁷Seri kupu'pu iya, to' uya tawarinpatu' pe, to' uya ri iwarinpa tauya'nokon koro'tau epoto' pe, inni para ri Papa e'tane upiyapai'nokon. ²⁸‘Kari ri uriya'

uko'man ni, upinin ni, nurine e'ni.' Imenukanin, itonpa kon pe te'sen uya, ‘Uri'nokon kamoro ipayan nu'san,’ tasa' na'ne' kasa ri.

²⁹“Papa nukoneka'san pe e'ni wenai, usenuminkan poken para iyesi ika'sa' pe iyesi tukai'; koru, ti', miri pe para sirupa, ka'pon nukoneka'pu ipureman nito' pe e'tane nurine para iyesi. ³⁰Pena a'tai, ka'pon amu' uya titu para iyesi pi', Papa uya to' enpitu'pu, i'ri pe to' tuku'se para ri. E'tane si seri pe, mi yawiron kon ni ka'pon amu' pi', ‘Amakooi kon apai era'tika'ti!’ ta iya. ³¹Apune para tikin ni wui taweyu ku'sa' iya ka'pon amu' eseru aimenkato' tauya weyu pe, seri ku'ton ka'pon epoka'sa' Papa uya tiwano' pe ka'pon amu' uya apurito' pe. Papa uya tunanumu'pu enpoikasa' to' enu ya', i'mu'sa'ka tauya wini iyeriku'pu apai,” ta'pu Paarua uya.

³²Ka'pon amu' uya iyeri'sa' kon e'mu'sa'ka'pu ta iya eta a'tai, isapema pe to' uta'kiri'pu, e'tane taron kon uya, “Seri ekareei pari inetapai ina man,” ta'pu. ³³Miri tupo, Paarua epa'ka'pu usauro'nito' pata apai. ³⁴Tu'kan kon pen ni ka'pon amu' ena'pu Paarua pikiron kon pe, miripan kon uya niri Sises apuri'pu. To' koro'tau Sises apurinin pe iyenasa' ese' esi Tayano'siyas, Areyo'pakas itese' konsuru amu' tonpa pe te'sen,

17:23 Ipu'ketu 13:1

17:25 1 Kin Amu' 8:27; Aisaya 42:5; 2 Ma'kapis 14:35; Inkupu'pu 7:48

17:26 2 Ma'kapis 7:23 17:27 Ipu'ketu 13:6-9

Tamares itese' niri uri'san, miri tupo taron kon uya ri niri Sises apuri'pu.

Paaru Esi'pu Koren Po

18 ¹Seri tupo, Paaru uya A'tens nimi'pu, miripan tupo Koren pata pona iti'pu. ²Miri yau, A'kira itese', Esuweru eporo'pu iya, Pontas pon, pena pura iye'sa' kon I'tari pata winipai tano'pu Püre'sira a'kiri, apune pura Roman pata epuru Kurauiyas itese' uya tanporo Esuweru amü epa'kato' pe tasa' pi'. Paaru uti'pu A'kira miri awonsi'ki Püre'sira ense'na. ³Tukasa ta'porin ton ka'pi'nin pe to' esi wenai, to' piyau e'turawasoman pi' iko'mamu'pu. ⁴Tiwiri Sapa' kaisa ri'ne Esuweru amü miri awonsi'ki Kiri' amü pokon pe itekare pi' usauro'ni pi' iyesi'pu, Sises esi pika'tinin pe enno'sa' tukai' to' enu ya' enpoika i'se tesi wenai.

⁵Sairas miri awonsi'ki Temu'ti uye'sa' a'tai Paaru piya' Ma'sitoniya pata apai, Paaru uya taweyu ennoko'pu itekare riken ekama pi' Esuweru amü pi', Sises, kuri ri Kurai,^s tukai' enpoika'pu iya. ⁶E'tane Esuweru amü e'sara'ti a'tai iri pe, ipa'nuku pe Paaru pi' usauro'ni pi', Paaru uya tapon tiuti'pu, Papa uya to' nonkasa' ekamanin pe. "fiwano' kon pe ri aumakoita kon imunu kon uti emapu'ti auya'nokon ke, uri iwano' pe pura iye'to' oton Papa



Tukasa ta'porin ka'pi'nin pe to' esi pi', to' piyau iye'turawasoma'pu. (18:3)

uya iponi'sima kon a'tai. Seri apai utito' oton Esuweru amü pen piya' ta'pu iya. ⁷Miri tupo, Paaru uti'pu Ti'tiyas Isa'su'tas, Esuweru pen iwü' ta' itekare ekamai. Ti'tiyas Isa'su'tas esi'pu Papa pi' tawipuremasen pe, Esuweru amü usenupato' iwü' piyawon itiwü'. ⁸Kiri'pas, Esuweru amü usenupato' iwü' epuru, miri awonsi'ki itiwü' tau te'san uya Sises apuri'pu. Tu'ke itekare etanin nu'san Koren pon kon uya apuri'pu, miripan kon epa'taisima'pu.

⁹Taron ni a'tai ewarupi nau, Itepuru Sises uya Paaru auro'ka'pu itenu uta'kwakasa' yau, "Enari'ke' kesii. Asauro'ki ri. E'pana kesii, ¹⁰apune pura aya'kiri e'ai' inü' uya ri iwini pen miri, apune pura tu'ke ka'pon amü' man seri pata yau uyapurinin nan," tukai'. ¹¹Miri a'tai, Paaru uko'mamu'pu tikin ni wuipiya miri awonsi'ki 6 kaisa ri kapui ipona Papa maimu ke to' enupa pi'.

¹²Kariyo esi a'tai Roman amü korunaai pe, A'kaya pata epuru

^s 18:5 Kurai; miri pe pura, Me'saya; Papa Nanutu'pu ta e'kwa pe; v. 28 yau niri.

pe a'samutu ya' tūwenai, Esuweru amu' uya Paarū a'si'pū, miripan kon uya inee'pū ko'tū pi' e'ni iwū' ta'. ¹³“Pūse ri ka'pon uya ka'pon amū' auro'ka Papa pi' to' ipūremato' pe Main uya miri kasa tasa' pūra ri iye'tane,” ta'pū to' uya.

¹⁴Paarū e'sara'ti rawiri usauro'ni pi', Kariyo uya ta'pū Esuweru amū' pi', “Iri kuru ri, ipokena' pen kuru ri ku'sa' Paarū uya wenai, ausaurokū kon a'tai amaimu kon setai'no. ¹⁵E'tane se pe ri usekama'popi' ni main ton pi' miri tūpo iiwano' kon iyaseru kon, iiwano' kon pe ri inkoneka'pū kon pi' ri iwesi kon wenai, iiwano' kon pe ikonekati'. Seri waraino iyaseru kon aimenka uya pūra man,” ta'pū iya. ¹⁶Miri tūpo, Kariyo uya to' enpa'ka'pū. ¹⁷Miripan kon era'ti'pū, Esuweru amū' usenupato' iwū' epuru a'sise'na, Sostenes itese', miripan ari'pū to' uya ko'tū pi' e'nito' iwū' tapai, miripan ari'po'pitu'pū to' uya ko'tū pi' e'nito' iwū' pūrorooi po. Miri pi' Kariyo usewankama'pū pen ni.

**Paarū Utipitu'pū
Tu'kan Pata Ya'ne**

¹⁸Paarū uko'mamū'pū inke ru'kwi ri Koren pata po. Miri yau, tūtonpa ton tūninse iti'pū kanau epotorū'pū yau Siriya pona. Tūuti rawiri, ti'pai kiriri'ka'pū iya, Papa auro'kasa' tūuya pi', miripan a'kiri Pūre'sira miri awonsi'ki A'kira e'sara'ti'pū itonpa pe. ¹⁹To' uya

E'pe'sas eporo'pū. Miri yau, Paarū uya Pūre'sira miri awonsi'ki A'kira nimi'pū. Miri yau, iti'pū Esuweru amū' usenupato' iwū' ta', itekare pi' asauro'se'na Esuweru amū' pokon pe. ²⁰Inke pari iko'manto' pe to' uya ekama'po tane, e'pai pūra iyesi'pū. ²¹E'tane tūutikapū a'tai, “Papa eseru pe iyesei yau, uyepū kanan miri ipi'ya'nokon,” ta'pū iya to' pi'. Miri tūpo, iyekanwa'ti'pū kanau ya', miripan uti'pū E'pe'sas poi.

²²Paarū uya Sisariya eposa' a'tai, iyekanwaka'pū, “Miyari!” ka'se'na Sises apurinin nan pi' Surusiran pona, miri awonsi'ki iu'ti'pū Antiyo' pona. ²³Antiyo' po inke ru'kwi ri kanan tesi tūpo, iti'pū kanan miri apai. Miripan uti'pū Kare'siya miri awonsi'ki Pūresiya nono awiri'ne, miripan uya Sises apurinin nan meruntitanūku'pū.

**Pūre'sira Miri Awonsi'ki
A'kira Uya A'poros Auro'ka'pū**

²⁴Miri koro'tau, A'poros, Esuweru pe te'sen, Arisantiriya pon uyee'pū E'pe'sas pona. Wakū pe kuru tūsauro'sen ye', iye'menukasa' itekare i'tunin pe iyesei'pū. ²⁵Papa eseru awiri kuru enupasa' pe iyesei'pū. Pana' pe kuru niri tūsauro'sen pe iyesei'pū, iye'to' poro kuru Itepuu Sises eseru pi' enupanin pe kuru niri iyesei'pū. Isaan Pa'tes ekareei epa'taisiman tawon niken i'tunin pe iyesei'pū. ²⁶A'poros e'sara'ti'pū enari'mūra Sises ekareei ekama pi' Esuweru

amū' usenupato' iwū' tau. Pūre'sira miri awonsi'ki A'kira uya etasa' a'tai, to' uya iki'ma'pū tiwū' kon ta'. Miri pata yau, wakū pe pari Papa eseru enpoika'pū to' uya ipana ya'.

²⁷A'poros esi a'tai itipai A'kaya pata pona, E'pe'sas awon kon to' tonpa ton uya ipori'ma'pū miyari pari itito' pe. To' uya kareta menuka'pū, miri yau te'san Sises apurinin nan ena' to' uya ereutanū'to' pe. Ipan pe kuru pata eporo iya a'tai, kamoro wakū nonkasa' wini apurinin pe iyenasa' kon pika'tinin pe iyesi'pū, ²⁸apūne pūra pana' pe tūsaurokū wini Esuwerū amū' a'kiri ipoken pūra to' e'sa' tukai'. Iye'menukasa' itekare winipai enpoika'pū iya Sises esi Kūrai pe tukai'.

E'pe'sas Po Paarū Esi'pū

19 ¹A'poros esi koro'tau Koren po, Paarū uya makui' tūtisen asanta anūmū'pū, miripan epa'ka'pū E'pe'sas pona. Miri yau, Sises apurinin nan eporo'pū iya, ²miripan uya to' ekama'po'pū, “Wakū A'kwarū pe' mepotantū Sises apurisa' auya'nokon a'tai?” tukai'.

“Kane, Wakū A'kwarū esi moro tukai' ina uya it'usa' pūra ri man,” tukai' to' uya imaimu eikū'pū.

³Paarū uya to' ekama'po'pū, “Fri waraino epa'taisiman nito' ke iyepa'taisima'pū kon?” tukai'.

“Isaan Pa'tes uya epa'taisiman nito' ke ka'pon amū' enupa'pū poro

ina epa'taisimasa',” tukai' to' uya imaimu eikū'pū.

⁴Paarū uya to' maimu eikū'pū, “Isaan uya pa'taisiman nito' esi'pū miri makoi yapai ka'pon amū' era'tito' pe, to' auro'ka'pū iya te'ma'pū pe tūyue'sen Sises tapurii' to' e'to' pe,” ta'pū iya to' pi'.

⁵Seri etasa' to' uya a'tai, to' epa'taisima'pū Sises ese' yau. ⁶Paarū uya temiyatū ton nonka'pū a'tai to' pona, Wakū A'kwarū uyee'pū to' pona'ne. Miri a'tai, to' usaurokū'pū tūron ni ton main' yai'ne, miripan kon uya Papa Maimu ekama'pū. ⁷12 kaisa ri iye'to' airi ri to' esi'pū.

⁸Paarū uti'pū Esuwerū amū' usenupato' iwū' ta' E'pe'sas po, miripan usaurokū'pū enari'mūra osorūwau kapūi kaisa ri. To' pi' ipatakapi'tū'pū iya, to' uya ito'ka'nūkū i'se tesi wenai, Papa e'to' esa' wanni pe pi'. ⁹E'tane tūron kon ka'pon amū' ena'pū main inetapai pūra. To' uya tewan kon sa'mantanūkū'pū, miripan kon usaurokū'pū iri pe Ite'ma awiron kon pi' tu'kan kon ka'pon amū' koro'tau. Miri pi' si Paarū uya to' nimi'pū, miripan uya Sises pi' enupasa' kon ari'pū ta'kiri, miripan kon esi'pū tūsenupa kon pe usauro'pi' ni pi' tiwiri wai kaisa ri Tiranas sikuruui tau. ¹⁰Seri kupū'pū Paarū uya miri asa'ri wūpiya kaisa ri. Miri a'tai, tu'kan kon nū'kwī ri

¹19:6 *main*, miri pe pūra *ani* Kiri' maimu yau.

19:4 Ma'siu 3:11; Ma' 1:4, 7-8; Ūru' 3:4, 16; Isaan 1:26-27

Esuweru amu' miri awonsi'ki Kiri' amu', eke Eisa awiri tũuko'mansan uya Itepuru ekareei eta'pu.

¹¹E'pe'sas po Paarũ esi a'tai, eke tũrawaso e'kupũ emapu'ti'pu Papa uya iporo. ¹²Enki'sa amu' miri awonsi'ki pon ton ni Paarũ napuripitũ'pu ri apitũ'pu to' uya e'ne' ton piya' to' epi'tipi'nin pe. Miri a'tai, to' eparan apai to' usepi'tipitũ'pu, makoi a'kwarũ uya to' nonkapitũ'pu.

7 Kaisaron Kon Sũ'kepa Munki Amu'

¹³Miri yau niri, Esuweru amu' esi'pu pata kaisa ri makoi a'kwarũ pa'kapitũ pi', Itepuru ese' tesa'pi'se makoi a'kwarũ pa'ka i'se usi'tupi' ni pi' to' esi'pu. Ta to' uya, "Itepuru Sises ese' yau, Paarũ itekareei nekamanũ pe na'ne', kũri ri ese' yau epa'ka'," ta'pu to' uya. ¹⁴7 kaisaron kon Sũ'kepa, use'man nito' Papa ena' tũrawasomanin nan epuru pe te'sen munki amu' uya seri ku'pitũ'pu.

¹⁵E'tane, makoi a'kwarũ uya to' maimu eiku'pu, "Sises si'tuyai', Paarũ niri si'tuyai', e'tane inũ' yan ken imiri'nokon?" tukai'.

¹⁶Miri a'tai, ka'pon makoi a'kwarũ yen pe te'sen e'sanũmu'pu 7 kaisaron kon ka'pon amu' pona to' entai tenai', isi pe kuru ri to' wipitũ'pu iya to' pon ton tũkarapi'se, miripan kon ainũmu'pu itiwu' tapai, mũn ennokoi'ma. ¹⁷Seri etasa' Esuweru

amu' miri awonsi'ki Kiri' amu' tũuko'mansan E'pe'sas po uya a'tai, ipan pe enari'ke' to' ena'pu. Miri a'tai, ipan pe kuru Itepuru Sises ese' nama'pu to' uya imeruntirũ wenai. ¹⁸Tu'kan kon Sises apurinin nan pe iyenasa' kon e'sara'ti'pu uye'ni pi', miripan kon uya tũmakooi kon ekama'pu tũron kon apurinin nan pana ya'. ¹⁹Tu'kan kon piyai'san amu' eseru kupũ pi' iko'mansa' kon uya tu'kan ni iri ekareei apon kareta amũranũku'pu, miripan po'tipitũ'pu to' uya annau. Pũrata pe kareta ton epe' i'tu'pu to' uya a'tai, 50,000 kaisa ri sirũpa pun^u pe iyepa'ka'pu. ²⁰Seri wini Itepuru Sises ekareei uti'pu miyari ri pata yau, miripan niri usemo'ka'pu merunti pe kuru.

Paarũ E'kupũ'pu Utin Pi' Surusiran Pona

²¹Seri ton e'kupũ'pu tũpo, Paarũ e'kama'pu utin pi' Surusiran pona, Ma'sitoniya miri awonsi'ki A'kaya poro, "Surusiran pona tũuti'pu tũpo, uti kuru miri Ron pata pona," ta'pu iya. ²²Asa'ron kon, Temu'ti miri awonsi'ki Erastas, tũpika'tinin nan ennoko'pu iya tũwapiya Ma'sitoniya pona inke rũ'kwi pari iko'mamũi'ma Eisa nono pata yau.

Usewa'noman E'pe'sas Po

²³Miri a'tai, ipan ni anpokũmanin e'sara'ti'pu Ite'ma awiron kon pi'. ²⁴E'pe'sas po iyesi'pu ka'pon,

^u 19:19 *sirupa pun*—*tũra'kuma*, Kiri' maimu yau. Seri pũrata pun esi tikin ni wũi e'tũrawasoman nũ'pu epe'pu ta e'kwa pe iyesi'pu. Apũne Ma'siu 20:2 enki.

Temi'turiyas itese', ipureman Aru'times pi' iwu' ka'pi'nin sirupa ke, miripan tonpa ton uya eke pe kuru purata epopitu'pu. ²⁵Temi'turiyas uya tutonpa ton ki'ma'pu, miri waraino ri mari iturawasooi ton to' pokon pe tausauro'to' pe. Ta'pu iya, "Mi'tuyatu pe' utonpa ton, seri uturawasooi kon ikupu na'ne' wini eke pe purata eporo uya'nokon? ²⁶Miyari ri ensa', etasa' auya'nokon E'pe'sas po riken pen, e'tane siya ri Eisa pata awiri, tu'kan kon ka'pon amu' uya apurito' pe Paarū uya iku'sa' ka'pon nukoneka'pu ipureman nito' ipi' pe esi papa pe pura ri ta iya. ²⁷Isi esi miri yau, miyari ri Paarū uya tato' apuri pi' ka'pon amu' esi a'tai, uri'nokon nukupunū enato' oton tunamasen pe pura ri. Eke kuru uri'san papa tukai' tuku'sen Aru'times iwu' enato' oton ka'pon amu' enu yau pura ri. Kamo ri niri ika'sa' pi' tawipuremasan Eisa pata awiri'ne, miri awonsi'ki non emu' kaisa ri niri inamoto' pura ri iyenato' oton," ta'pu iya.

²⁸Seri ta Temi'turiyas uya eta tauya'nokon a'tai, to' ena'pu sakoro' pe. Uki'pi'nunpi' ni pi' to' e'sara'ti'pu, "Eke kuri ri papa tato' ipi' pe ika'sa', Aru'times, ipureman nito' kon ipi' E'pe'sas po!" tukai'. ²⁹Miri pe ri, eke utanpokuman esi'pu miri pata yau. Ka'pon amu' uya Kayas miri awonsi'ki Aresta'kos a'si'pu, Paarū upinimu tonpa pe te'san. Miri a'tai, anpisin ka'pon amu' enasa' tikin ni uya

Kayas miri awonsi'ki Aresta'kos pi'siku'pu amuran nito' iwu' ta'. ³⁰Miri a'tai, Paarū esi'pu ka'pon amu' anauro'kapai e'tane, Sises apurinin nan esi'pu iti i'se pura. ³¹Kamoro niri eke pata epuru ton, Paarū mai'pureauu ton uya main ennoko'pu iti namai'.

³²Iyamurasa' kon esi'pu isi pe uki'pi'nunpi' ni pi'; taron kon esi'pu taron ni pe uki'pi'nunpi' ni pi'; taron kon niri, taron ni pe ri. Miri yawon kon tu'kan kon ka'pon amu' uya i'ri pe iyese pi' to' amurasa' miri yau tukai' i'tu pura ri iyese'pu. ³³Taron kon Esuweru amu' uya Arisanta itese' ka'pon a'tu'ma'pu amuran nito' iwu' tau, ka'pon amu' rau iye'mu'sa'kato' pe. Taron kon ka'pon amu' anpisin koro'tau te'san uki'pi'nunmu'pu Arisanta auro'ka pe. Arisanta uya temiyatu anunmu'pu, e'pana e'ti' ta tauya e'kwa pe, tiwano' pe ri tausauroku wenai. ³⁴E'tane Esuweru pe to' uya ito'ka'na'sa' a'tai, isauroku i'se pura to' esi'pu. Tikin ni te'sepose to' uki'pi'nunmu'pu asa' ite'kwa kura' emiya era'tito' e'to' poro, "Eke kuri ri Aru'times E'pe'sas pon kon iwano'!" tai'ma.

³⁵Pata karetaai menukapi'nin uya anpisin e'paka'nuku'pu. "E'pe'sas pon kon ka'pon amu'! I'tu auya'nokon pura pe' nai tanporo mi awiron pata uya i'tu E'pe'sas esi eke Aru'times pi' ipureman nito' iwu' erasu pe te'san pe tukai'? Miri niri ipe ika'sa' Epun wini ita'mo'kasa' erasuntinin pe e'ni'nokon tukai'. ³⁶Miri wenai, seri ton esi ke

onamū poken pūra, e'pana iwe'to' kon pe iyese, tūsenuminkai' pūra i'ri ri tuku'se pūra. ³⁷Seri uya ri pūsamoro asa'ron kon ka'pon amū ne'to' auya'nokon wenai pe pūra iyese'pū man. Ipūreman nito' yawon ama'masa' miri awonsi'ki ika'sa' itese' pi' e'nito' pe pa'nū'sa' to' uya pūra iyese niri. ³⁸E'tane Temi'tariyas miri awonsi'ki ipūreman nito' ku'pi'nin nan uya pata eseru main i'kwī'sa' pe iyese yau, seri rupi konekato' esi moro ri. Miri yau, konekanin nan eke ton esi. Miri yau, to' utito' pe iyese teseru kon konekai'. ³⁹E'tane miyari ri iri i'se iwesi kon yau, ikonekato' pe iyese pata eseru uya tasa' awiri. ⁴⁰Isi yau e'ni'nokon man, apūne pūra Roman amū' uya uyekama'popitū kon miri seri pe ne'kupūine' pi'. I'ri wenai isi pe uki'pi'nūnpi' ni esi'pū tukai', ekama ton pūra iye'tane miri wenai tukai'," ta'pū iya. ⁴¹Seri ta'pū iya tūpo, iyamūrasa' kon nin si ka'pon amū' ennoko'pū iya miri, miri apai.

**Paarū Uti'pū Ma'sitoniya
Miri Awonsi'ki Kiris Poro**

20 ¹Isi pe uki'pi'nūnpi' ni ereutasa' tūpo, Paarū uya tūtonpa ton ki'ma'pū, miripan kon pori'mapitū tūpo, Paarū uya, "Iisiri utiyai'," ta'pū to' pi', miripan uti'pū Ma'sitoniya pona, to' tūninse E'pe'sas po. ²Miri awiri ri, iti'pū. Eke pe ri ka'pon amū' pori'ma'pū iya, tu'kan pi' ri, miripan uyee'pū Kiris' pona.

³Miri yau, iko'mamū'pū osorūwau kapūi. Iye'kama koro'tau kanau epotorū'pū yau utin pi' Siriya pona, Esuwerū amū' ekonekasa' eta'pū iya ipi' te'to' kon pe. Miri pe iyese pi', iyekoneka'pū tenna'poto' pe Ma'sitoniya poro. ⁴Iya'kiron kon esi'pū So'pa'tarū, Piros mu, Pereya winon; Aresta'kos, Sekuntos, Tesaroni'ka winon kon; Kayas, Terūpi winon; Tai'ki'kas, Tūro'pimas, Eisa winon kon; Temu'ti niri. ⁵Pūsamoro warawo' amū' uti'pū ina rawiri to' esi'pū ina enupikiri Tūrowas po. ⁶E'tane ina uti'pū kanau yau Piri'pai yapai A'sarutanū'sa' Pen Pūreti Pi' Enta'nān Weyu tūpo. 5 kaisa ri wūi tūpo, ina e'seporo'pū tūron kon a'kiri Tūrowas po. Miri yau, ina uko'mamū'pū 7 kaisa ri wūi.

**Moine Eri'sa' I'mū'sa'ka'pū
Paarū Uya**

⁷Suntaaka e'sara'ti pe, ina amūra'pū pūreti pi' enta'nai'. Paarū uya ka'pon amū' auro'ka'pū. Awanapai ri tūutito' esi pi' isauroku'pū anomūra' pona ri. ⁸Miri yau, tu'ke raan'pu amū' esi'pū ka'tawon tau ina amūrato' yau. ⁹Moine ka'pon ereutasa' esi'pū winto po, Iu'tai'kos itese'. Kūri ri e'nūnpi'tū'pū, miyari ri Paarū usauroku koro'tau, miripan e'nūnkaa'pū ipan pe, nūta'mo'kai osorūwawon ikawono iuti apai. Miripan uma'tasa' anūmū'pū to' uya eke' pe. ¹⁰Paarū u'ti'pū, miripan

^v 20:2 Kiris, miri pe pūra A'kaya

ena'pŭ ipuro'pona, temiyatu tŭru'pŭ iya iwoi, "Ipan pe kuru kisewankamatŭ! Nurine ri man!" ta'pŭ iya. ¹¹Miri tŭpo kanan, ka'ta iyenuku'pŭ pŕeti pi' enta'nai'. Pata tema'kwai' tŭsauroku tŭpo, iti'pŭ. ¹²Ka'pon amŭ' uya moine ari'pŭ nurine. Ipan pe kuru pori' pe to' epori'masa' esi'pŭ.

**E'pe'sas Epuru Ton
Panama'pŭ Paarŭ Uya**

¹³Ina uti'pŭ kanau yau A'sos pona. Miri yau, Paarŭ anŭnse'na ina uti'pŭ. "Miri yau uyepotŭi'," ta'pŭ iya a'mun po tŭuti pi'. ¹⁴Ina eposa' iya a'tai A'sos po, ina uya ari'pŭ Me'tirin pona. ¹⁵Miri ema'sa' yau, ina uti'pŭ miri apai Kiyos pona. Miri tŭpo, ina e'kwiritŭ'pŭ Samos pona; miri ema'sa' yau, Mairi'tos eporo'pŭ ina uya. ¹⁶Paarŭ e'ku'sa' esi'pŭ E'pe'sas entakato' pe tŭuya kanau yau, inke iko'manpai pŕa iyesi'pŭ Eisa po. Surusiran inepopai isenuti'pŭ Penti'kas weyu a'tai.

¹⁷Mairi'tos ponsi'ki, E'pe'sas so'sii epuru ton ki'ma'pŭ Paarŭ uya. ¹⁸To' uya teposa' a'tai, ta'pŭ iya to' pi'; "Uko'mamŭ'pŭ eseru i'tu auya'nokon miri ipiyau'nokon Eisa po esi a'tai. ¹⁹Itepuru apiyo' pe esi'pŭ se pe ri tenai', tŭukaranpi'se niri, sa'man pe ri Esuwerŭ amŭ' uya ukota'ma tane. ²⁰I'tu auya'nokon miri, tanporo unekamanŭ

ekama'pŭ uya ipika'tinin kon pe te'sen, iyenupa'pŭ uya 'nokon annau'ne ri, iiwŭ' kon tau'ne niri. ²¹Enpoika'pŭ uya Esuwerŭ amŭ', Kiri' amŭ' pi' niri tŭmakooi kon pi' to' usewankama era'tito' pe Papa winikŭi', Sises yau apurito' esa' pe to' enato' pe.

²²"Seri si Papa A'kwarŭ uya tapiyo'mai', uti si seri Surusiran pona, i'ri e'kupŭ upi' miri yau tukai' i'tui'ma pŕa. ²³Se riken i'tu uya tanporo pata yau'ne Wakŭ A'kwarŭ uya upana'ti. Miri yau, pariki'si ta' uya'sito', miri awonsi'ki sa'man ni e'ku'to' esi upi'. ²⁴E'tane usewankama pŕa ri iyesi uwinin nan pi', utŭrawasooi inkupai esi Itepuru Sises nŭtŭru'pŭ iku'to' pe uya utŭrawasooi, tanporon kon pi' Papa uya wakŭ nonkasa' ekareei ekamato' uya.

²⁵"Si'tuyai' imiri'nokon seri itekare, Papa e'to' esa' wanni pe ekama'pŭ uya ipana ya' ton uya uyento' oton pen seri enta'. ²⁶Miri pe iyesi pi', ekama uya ipi'nokon seri pe; makoi pŕa esi tanporon kon ka'pon amŭ' mŭnŭ piyapai. ²⁷Tanporon ni Papa e'to' i'tu auya'nokon i'se ekamasa' uya man. I'ri ri Papa Maimu nonkasa' uya pŕa iyesi. ²⁸Wakŭ pe epa'simati', tanporo itonpa kon amŭ' ri pokon pe, Wakŭ A'kwarŭ uya iku'sa' kon na'ne' to' ennin pe. Papa apurinin nan^w ennin pe e'ti', Sises ne'ma'pŭ tŭmŭnŭ

^w20:28 *Papa apurinin nan—Papa so'sii.* Tŭron ni imenukasa' ton, *Itepuru Sises so'sii,* tawon esi.

ke. ²⁹Si'tuyai', kasi ton enupanin nan uye'to' oton isi ton ene amu' kasa i'koro'ta'nokon. Kurai apurito' apai to' ereutanu'to' oton to' uya. ³⁰I'koro'tapai'nokon ni to' e'mu'sa'kato' oton, itekare ensimato' oton to' uya, Sises apurinin nan era'tito' oton to' pikiri. ³¹Miri pe iyese pi', ti'tui' e'ti'. Mi'tuyatuu pe' osorawau wuipiya tereutapi'se para ayauro'ka kon pi' uko'mamu'pu ewarupi nau, wui nai niri tukaranpi'se.

³²“Seri pe inonka uya 'nokon Papa ena', waku nonkasa' iya maimu ya', imiri'nokon ku'nin apurinin pe ya'. Miri a'tai, iwe'to' oton kon Papa na'ne' yau tu'kan ni waku ton epoto' auya'nokon, Papa nekama'pu tumunki amu' pi'. ³³Inu' ri sirapaai, koruu ri, pon ni enkuui pe esi pun. ³⁴I'tu auya'nokon ni miri uiwano' pe ri e'turawasomapi'sa' parata eporo pi' i'se e'to' eporo pi', utonpa ton e'to' i'se niri. ³⁵Tanporo unkuwunu wini, sa'man turawaso kupu'pu uya wini, iyenu'pasa' uya 'nokon ipurataai punon kon pika'tinin pe e'nito' pe. Sises uya se kasa ta'pu iku'ti' iyenu kon yau, 'Waku pe kuru iyese te'repasan pe e'ni a'tai, turepasan pe e'ni entai,' ta'pu Paaruu uya to' pi'.

³⁶Seri ta tu'po, iye'sekunka'pu tanporon kon pokon pe iyipurema'pu. ³⁷Tanporo to' ukaramu'pu ipi' tuta'sii', to' uya a'su'ka'pu niri. ³⁸“Seri enta' uyene auya'nokon pen,”

ta iya pi', to' upokoita'pu. Eke kanau ya' ipikiri to' uti'pu.

Paaru Uti'pu Surusiran Pona

21 ¹To' piyapai ina emo'ka'pu tu'po, ina uta'tu'ma'pu parau po. To'sa ri ina uti'pu Kos pona. Iyema'sa' yau, ina uti'pu Rotes pona; miri apai, ina uti'pu Pa'tara pona. ²Kanau epotoru'pu ti'kwiri'sen eporo'pu ina uya Pini'siya po. Miri ya', tekanwa'tii' ina uti'pu. ³Sai'puras ene tuuya'nokon tu'po, ina uya entaka'pu wui enu enuku kamisi winikui'. Ina uti'pu Siriya pona. Ina ekanwaka'pu Taya pona, apuru kanwaka to' uya koro'tau. ⁴Sises apurinin nan eporo'pu ina uya. ⁷kaisa ri wui ina uko'mamu'pu to' piyau. Iya'kwaru uya to' pana'ti'pu Paaruu auro'kato' pe to' uya iti namai' Surusiran pona. ⁵Ina weyu u'ma'sa' a'tai to' piyau ina e'to', ina uya to' nimi'pu, tanporo Sises apurinin nan, to' no'pu ton, to' munki amu' niri uti'pu ina a'kiri eke pata apai. Miri yau, tuna e'pi po ina e'sekunka'pu ipureman pi'. ⁶“Iisiri'nokon,” ta tu'po tutonpa kon amu' pi', ina ekanwa'ti'pu kanau epotoru'pu ya'. Taron kon enna'po'pu tapata kon ya'.

⁷Miyari ri utin pi' ina esi'pu Taya apai. Ina ekanwaka'pu Toremes pona. Miri yau te'san ina tonpa ton pi', “Miyari,” ta'pu ina uya. To' piyau ina uko'mamu'pu tikin ni wui. ⁸Iyema'sa' yau, ina uti'pu Sisariya tepose. Miri yau, ina uti'pu Piri' itekare ekamanin

iwu' ta' ipiyau e'se'na, Surusiran po 7 pe to' nanumu'san tonpa pe te'sen. ⁹Asakiri'nan kon a'pi'punon itensi ton esi'pu pu'kena' pe itekare ekamanin nan.

¹⁰Miri yau inke kuru para ri ina esi'pu tupo, pu'kena' Akapas itese' uyee'pu Isutiya wini. ¹¹Iyee'pu ina piya', Paarū pokuruūi anumu'pu iya, temiyatū miri awonsi'ki ti'ta auromu'pu iya, se tai'ma: "Waku A'kwarū man se kasa ta pi', 'Seri pokuru esa' auronpi'to' oton Esuwerū amū' uya Surusiran po, miripan tūto' oton to' uya Esuwerū amū' pen ena',' " ta'pu iya.

¹²Seri etasa' ina uya a'tai, ina miri awonsi'ki ka'pon amū' miri awon kon uya Paarū temeku'pu iti namai' Surusiran pona. ¹³Miri a'tai, Paarū uya to' pi' ta'pu, "I'ri pe iyese pi' aukaramū kon uyewan ni tūpokoitanū'se? Ekonekasa' seri uya'sito' pe riken pen e'tane uma'tato' pe Surusiran po Itepuru Sises ese' wenai!" ta'pu iya.

¹⁴Ina uya tauro'ka eta iya para iyese wenai, ina uya inonka'pu. "Tiwi Itepuru e'to' i'se ne'kupūi i'se iye'to' awiri," ta'pu ina uya.

¹⁵Miri yau tesi kon tupo, tekonekai' ina uti'pu Surusiran pona. ¹⁶Sises apurinin nan Sisariya winon kon uti'pu ina a'kiri, miripan kon uya ina ari'pu Nasun itese' ka'pon iwu' ta'. Miri yau, ina uko'mamu'pu ipiyau. Sai'puras winon pe iyese'pu, pena si'kiri ri Sises apurinin pe iyese'pu.

**Paarū Epa'ka'pu
Surusiran Pona**

¹⁷Surusiran eposa' ina uya a'tai, ina tonpa ton uya ina ereuta-nuku'pu tepori'ma kon pe. ¹⁸Miri ema'sa' yau, Paarū a'kiri ina uti'pu Isens ense'na. Tanporo so'si epuru ton esi'pu miri yau. ¹⁹"Miyari," ta tupo to' pi', Paarū uya tanporon Papa nukupu'pu pi' Esuwerū amū' pen koro'tau te'turawasoma a'taino pi' to' auro'ka'pu.

²⁰Seri etasa' to' uya a'tai, Papa apuripitu'pu to' uya. Ta'pu to' uya Paarū pi', "Ina tonpa, tu'kan kon Esuwerū amū' man Itepuru Sises apuri pi'. Tanporon kon man ipan pe Main, Mosi' winon apuri pi'. ²¹Turon kon ka'pon amū' uya to' auro'kasa' esi'pu imiri pi' tanporo Esuwerū amū' enupasa' auya Esuwerū amū' pen koro'tau tūko'mansan to' ereutato' pe Main, Mosi' winon piyapai to' auro'ka'pu auya, tūmunki kon yun pi'pi puturaka to' uya namai', uri'nokon eseru awiri. ²²I'ri ken si kupū uya'nokon? To' uya kuru eta miri iuye'sa' tukai'. ²³Miri pe iyese pi', ayauro'kato' awiri e'ki. Miri yau man asakiri'nan kon ka'pon amū' Papa auro'kanin nū'san tūnku'ton kon pi'. ²⁴Pūsamoro ka'pon amū' aki to' ekorukato' pe to' pokon pe mekorukai'. To' i'pai kiriri'pi'nin nan, to' ekorukasa' ekamanin pe, me'mai'. Miri a'tai, tanporon kon uya i'tuto' pe i'napai ri para ri ipi'

usauro'nisa' na'ne' esi tukai', e'tane main pūreme'nin pe pūra ri iwesi tukai'. ²⁵Ina uya nin Esuweru amū' pen enasa' Sises apurinin pe ena' imenukasa' man. Ina e'ku'sa' man ika'sa' ena' itusa' pi' to' enta'na namai', to' enta'na namai' mənū'pan ni o' pi' miri pe pūra erupatu'kasa' pi' ri, miri awonsi'ki tekumasan pe to' esi namai'," ta'pū to' uya.

²⁶Miri ema'sa' yau, Paarū uya ka'pon amū' ari'pū to' pokon pe iyekorūka'pū. Miri tūpo, iti'pū Papa ena' Esuweru amū' use'mato', ipūremato' iwū' ta' to' auro'kase'na, ekorūkan nū'pū weyu u'ma'to' pi', tanporon kon use'mato' ike ekonekato' oton pi' to' kaisa ri.

To' Uya Paarū A'si'pū

²⁷⁷kaisaron wūi u'matū iwa koro'tau, Eisa winon kon Esuweru amū' uya Paarū ene'pū Papa ena' Esuweru amū' use'mato', ipūremato' iwū' tau. Anpisin tūturūnkai' Paarū a'sito' pe to' uya ikuu'pū. ²⁸To' uki'pi'nūnpitū'pū, "Esuweru amū', ina ipika'titi'! Pūse ri si ka'pon mi yawiron kon tanporo ka'pon amū' enupanin, uri'nokon Esuweru amū' use'mato', ipūremato' iwū', miri awonsi'ki Main, Mosi' winon ewa'nomanin. Miri pona, Kiri' amū' ne'sa' iya Papa ena' use'man nito', ipūreman nito' iwū' ta', wakū pata ma'tanū'se'na," ta'pū to' uya. ²⁹(Tūro'pimas ene'pū to' uya

E'pe'sas pata winon Paarū a'kiri, to' usenuminka'pū Paarū uya ine'sa' use'man nito', ipūreman nito' iwū' ta' tukai'.)

³⁰Tanporo pata pon kon utai'pū. Tanporo pata kaisaron kon eka'tunsa' uyee'pū. Paarū pi'siku'pū to' uya use'man nito', ipūreman nito' iwū' tapai. Miri pe ri, mūra'ta a'koro'pū to' uya.

³¹Iwini i'se to' esi koro'tau, main uya Roman amū' soisaai epuru eporo'pū eke pe Surusiran pata pon kon utai'pon pi' man tukai'.

³²Inke pūra soisa amū' anūmū'pū iya. To' eka'tumū'pū tu'kan kon koro'ta'. Roman amū' soisaai epuru miri awonsi'ki soisa amū' ensa' to' uya a'tai, iwipitū tūuya'nokon ereutanūka'pū to' uya.

³³Eke soisa amū' epuru uya a'si'pū. "Asa'ri i'sen ke auronti'," ta'pū iya. Miri a'tai, to' ekama'po'pū iya, "Inū' pe iyesi? I'ri ku'sa' iya?" ta'pū iya.

³⁴Tu'kan kon uki'pi'nūnpitū'pū tūron ni pe'ne, wakū pe i'napairon eporo iya pūra eke soisa amū' epuru esi'pū, eke pe to' uki'pi'nūnpitū' wenai. "Soisa amū' iwū' ta' Paarū ati'," ta'pū iya. ³⁵Paarū uya miye' eposa' a'tai, tu'kan kon e'sakoropasa' esi'pū ipan pe. Miri pe iyesi pi', soisa amū' uya ari'pū tūra'runpai'. ³⁶Anpisin ipikiri te'san uki'pi'nūnpitū'pū, "Iwiti' ri!" ta'pū to' uya.

Paarū Uya Anpisin Auro'ka'pū

³⁷Paarū ari to' uya koro'tau soisa amū' iwū' ta', eke soisa amū'



Miri pe ri, mura'ta a'koro'pū to' uya. (21:30)

epuru ekama'po'pū iya, “Arūne, kanyau'ro'ka'i'ya,” ta'pū iya.

“Kiri' pe pe' tūsauro'sen imiri?” ta'pū soisa amū' epuru uya ipi'.
 38 “Isi' pon pen pe' imiri manepa- nin sara'tinin nū'pū, 4,000 kaisaron kon winin nan anin nū'pū rimono' ta' pena?” ta'pū iya.

39 Paaru uya eiku'pū, “Esuwerū uri, Tarūsas, Siri'siya yawon yau iyentusa' rū'pū, patawon kanan uri ti ekasiman pen yawon. Arūne, ka'pon amū' sauro'ka'i'ya,” ta'pū iya.

40 Eke soisa amū' epuru uya, “Ewai',” ta'pū tūpo, Paaru

e'mū'sa'ka'pū miye' pona, “E'pana e'ti'!” ta'pū iya temiyatū ke. Tanporo to' e'paka'sa' a'tai, ta'pū iya to' pi' Esuwerū amū' maimu yai.^x

Paaru Usaurokū'pū
Sises Pikiron Pe Tena'pū Pi'
(Inkupū'pū 9:1-19; 26:12-18)

22 ¹“Utonpa ton, ukūipūnū ton, arūne uyetati' usekama tane!” ta'pū iya. ²Arami' pe isaurokū eta to' uya a'tai, e'pana pari to' ena'pū. Paaru uya ta'pū miri a'tai,

³“Esuwerū uri, iyentusa' rū'pū Tarūsas, Siri'siya yawon yau, e'tane

^x 21:40 *Esuwerū amū' maimu yai, miri pe pūra Arami' pe; Ma'siu 22:2 yau niri.*

seri yau usemo'ka'pu. Kamariyeru piyau usenupa'pu ukupunu kon nukoneka'pu Main pi'. Ipan pe Papa apuri pi' seri pe iwesi kon na'ne' kasa. ⁴Seri wenai, Ite'ma awiron kon kota'mapitu'pu uya to' wito' pe to' ne'pitu'pu uya. Warawo' amu', uri'sami'si amu' niri a'sipitu'pu uya pariki'si ta'. ⁵Miri kasa ri niri, Papa ena' use'man nito' tarawasomanin nan miri awonsi'ki Konsuru amu' uya ta miri, kareta ri sepopi'tai to' wini Tamaskas awon kon to' tonpa ton ena' tautisen. Miri ya' ri, utipitu'pu ka'pon amu' ne'se'na a'sisa' pe to' ari pi' Surusiran pona to' kota'mato' pe.

⁶“Wui nai pata esi koro'tau, a'ko pe Tamaskas eporo uya koro'tau, ite'kwanau para ri, Epun wini a'kwa e'wei'ti uya uyenkasi'panuku'pu. ⁷Uta'mo'ka'pu non pona, main eta'pu uya, ‘Saaru, Saaru, i'rito' pe ukota'ma auya?’ tawon.

⁸“‘Inu' imiri, Uyepuru?’ tukai ekama'po'pu uya.

“‘Sises uri, Nasare' winon, mukota'mayai'ne',’ ta'pu iya. ⁹Uya'kiron kon uya a'kwa ene'pu e'tane, uyauro'kanin eta to' uya para iyese'pu.

¹⁰“‘Iri kupu uya seri, uyepuru?’ tukai ekama'po'pu uya.

“‘E'mu'sa'ka', enta Tamaskas pona. Miri yau, tanporo inkupunu ke ayauro'kato' pe,’ ta'pu Itepu uya. ¹¹Uya'kiron kon uya uyari'pu uyemiyatu pi' Tamaskas

pona, apune para a'kwa uya uyenkasi'panu'sa' pi' itenu para uri tuku'se.

¹²“Ananayas itese' ka'pon uyee'pu uyense'na, miri yawon kon Esuweru amu' nunamanu pe kuru iyese'pu, ipan pe Main, Mosi' winon ikonekasa' awiron pe iyese'pu. ¹³Iye'mu'sa'kasa' esi'pu upiyau, ‘Utonpa, Saaru, ennin pe kanan enaki!’ ta'pu iya upi'. Miri pe ri, ennin pe ena'pu. ¹⁴Miri a'tai, ta'pu iya, ‘Papa, ukupunu kon esi'pu itese' pi' uya ayanansa' man, teseru i'tunin pe iwesi pa, Ipokena' Pe Te'sen inanumu'pu ene pa, inta winon imaimu etanin pe iwesi pa. ¹⁵Tanporon kon ka'pon amu' pi' inene'pu miri awonsi'ki ineta'pu ekamanin pe iwesi pa. ¹⁶Iri enupikiri iwesi? E'mu'sa'ka', epa'taisima', amakooi ekorukato' pe ipuremaki Sises pi',’ ta'pu Ananayas uya upi'.

¹⁷“Surusiran pona enna'posa' a'tai, ipurema koro'tau use'man nito', ipureman nito' iwu' tau, uyenu uta'kwakasa' uya ene'pu. ¹⁸Itepu uya uyauro'ka, ‘Inke para enta Surusiran apai, apune para to' uya upi' ausauro'to' apuri para iyese' miri,’ ta'pu iya upi'.

¹⁹“‘Uyepuru, pasamoro uya uitu miri usenupan nito' iwu' kaisa ri utipi'sa', to' a'sipitu pi' pariki'si ta', to' wipitu pi' kamoro ayapurinin nan. ²⁰To' uya niri i'tu Si'tipan, itekare ekamanin pe te'sen manu uti a'tai, e'mu'sa'kasa' esi'pu miri

yau iwiti' ri ta pe iwinin nan pon esa' pe esi'pŭ, ta'pŭ uya Iteperu pi'.

21 "Miri a'tai, Iteperu uya ta'pŭ upi', 'Enta, iyennoko uya inni Esuwerŭ amŭ' pen koro'ta,' ta'pŭ iya," ta'pŭ Paarŭ uya to' pi'.

Roman Pe Paarŭ Esi

22 Anpisin uya Paarŭ maimu eta'pŭ miri ta iya pŭ'kŭ pona ri. Miri a'tai, to' uki'pi'nŭnpitu'pŭ, "Iwika'ti' kuru ri! Iko'manto' pŭra ri iyese miri!" ta'pŭ to' uya. 23 To' uki'pi'nŭnpitu'pŭ ri kanan, tŭpon kon mo'kapitu'pŭ to' uya, non ma'kiri'pŭ to' uya ka'ta'. 24 Eke soisa amŭ' epuru uya, "Paarŭ ati' soisa amŭ' iwŭ' ta'," ta'pŭ tŭpoitorŭ ton pi'. To' auro'ka'pŭ iya to' uya ari'po'pi'to' pe, isekamato' pe i'ri wenai to' uki'pi'nŭnpitu' ewa'noma pe, tukai'. 25 Itemekon a'sipi'sa' to' uya esi'pŭ ari'po'pi'tane, Paarŭ uya ta'pŭ iteperu e'mŭ'sa'kasa' pi' miri yau, "Iye'to' pe ri pe' iyese Roman pe te'sen ari'po'pitu' a'tai inŭ' uya ri iri iteseru eposa' pŭra iye'tane?" ta'pŭ iya.

26 Soisa amŭ' epuru uya seri etasa' a'tai, iti'pŭ eke soisa amŭ' epuru piya' ekamase'na, "I'ri kupŭ auya? Roman pe sa'ne man ko!" ta'pŭ iya.

27 Eke soisa amŭ' epuru uti'pŭ Paarŭ ekama'pose'na, "Uyauro'kaki, Roman amŭ' karetaai esa' pe' imiri?" ta'pŭ iya.

"Ewai," ta'pŭ Paarŭ uya.

28 Miri a'tai, eke soisa amŭ' epuru uya ta'pŭ, "Eke pe pŭrata ke

tŭuse'mai' iyenasa' rŭ'pŭ uri kamoro Roman amŭ' tonpa pe," ta'pŭ iya.

"E'tane, entu'pŭ si'kiri nin usanon uya ukaretai'ti'pŭ to' tonpa pe e'to' pe," ta'pŭ Paarŭ uya.

29 Kamoro ekama'popitu' pi' te'san utama'pŭ ipiyapai miri a'tai ri. Soisa amŭ' epuru enari'nŭmŭ'pŭ, Paarŭ, Roman pe te'sen auronpi'sa' tŭuya pi' i'sen ke.

Paarŭ E'wa'kŭtu'pŭ Esuwerŭ Amŭ' Konsŭruŭi Ton Rau

30 Soisa amŭ' epuru esi'pŭ ini'tupai i'ri pi' Esuwerŭ amŭ' uya, iri ku'sa' Paarŭ uya ta, tukai'. Miri pi', iteperu uya soisa amŭ' apiyo'ma'pŭ Paarŭ auronpi'sa' ara'ka pi', miri awonsi'ki use'man nito' tŭrawasomanin nan epuru ton eke ton kuru miri awonsi'ki tanporo Esuwerŭ amŭ' Konsŭruŭi ton kanan amŭ'ato' pe amŭ'ran iwŭ' ta' ekama'pŭ iya, miripan kon amŭ'ra'pŭ. Miripan iteperu uya Paarŭ nee'pŭ to' amŭ'rasa' koro'ta', miripan uya iye'mŭ'sa'kato' pe ikupŭ'pŭ to' rau.

23 1 Paarŭ uya to'sa ri Esuwerŭ amŭ' Konsŭruŭi ton enpitu'pŭ, miripan uya ta'pŭ, "Utonpa ton Esuwerŭ amŭ', uko'mamŭ koro'tau, Papa nama pi' e'sa' man, miri awonsi'ki si'tuyai' i'ri ri iri ku'sa' uya pŭra ri iyese, seri pŭ'kŭ pona ri," ta'pŭ iya. 2 Use'man nito' tŭrawasomanin nan epuru, Ananayas uya etasa' a'tai, ipiyau iye'mŭ'sa'kasa' kon apiyo'ma'pŭ iya, to' uya Paarŭ



*To' uki'pi'nunpitu'pū ri kanan, tūpon kon mo'kapitu'pū to' uya,
non ma'kiri'pū to' uya ka'ta'. (22:23)*

inta'moto' pe. ³Miri tūpo, Paarū uya ta'pū Ananayas pi', "Papa uya ikota'ma miri, wakū pe tūusensen, miri ku'sa' auya pi'. Main, Mosi' winon awiri miri airi iyereutasa' uya uyekama'popitū, e'tane iyawiri pūra iwesi, ka'pon amū' mapiyo'mayai'ne' to' uya unta'mopi'to' pe," ta'pū iya.

⁴Paarū piyau iye'mūsa'kasa' kon uya, "Miri kasa iri pe ri Papa ena' use'man nito' tūrawasomanin nan epuru pi' ta auya pūra iyesi miri," ta'pū.

⁵Paarū uya to' maimu eikū'pū, "Use'man nito' tūrawasomanin nan epuru tukai' i'tusa' uya pūra man, utonpa ton. Mosi' nūmenuka'pū yau, 'Iri pe kasaurokūi ka'pon amū' esa' pe te'sen pi' tawon ni,'y i'tunin uri e'tane," ta'pū iya to' pi'. ⁶Paarū uya to' Konsūruūi amū' ene'pū Satu'si amū' pe miri awonsi'ki Pari'si amū' pe, eke pe isaurokū'pū konsūru amū' koro'tau, "Utonpa ton, Pari'si amū' tonpa sa'ne uri ko, Pari'si mu ri. Seri ekota'mato' yau esi

∴ 23:5 E'sotas 22:28

23:3 Ma'siu 23:27-28

iyeri'sa' kon e'mu'sa'kato' oton tukai' i'tu uya wenai!" ta'pŭ iya.

7Seri tasa' iya a'tai, Pari'si amŭ' miri awonsi'ki Satu'si amŭ' e'sei'pitu'pŭ tŭtonpa kon pokon pe. 8(Satu'si amŭ' uya, iyeri'sa' kon e'mu'sa'ka pŭra ri iyese, inseru amŭ' pŭra ri iyese, a'kwaru'san pŭra ri iyese ta, e'tane Pari'si amŭ' uya moro ri iyese, to' ri esi ta.) 9Pari'si amŭ' miri awonsi'ki Satu'si amŭ' ena'pŭ isi pe to' e'sei'pitu'pŭ. Main pi' enupanin nan esi'pŭ Pari'si amŭ' pe, miripan kon uya Satu'si amŭ' ei'pitu'pŭ ipan pe, "Ŧri ri iri ku'sa' pŭse ka'pon uya eposa' ina uya pŭra man! A'tai pŭra inseru miri pe pŭra a'kwaru ri uya auro'kasa', miri kasa ri Papa ekareei ekamato' pe iya!" ta'pŭ Pari'si amŭ' uya.

10To' e'sei'pi'to' ena'pŭ isi pe, miripan pi' eke soisa amŭ' epuru enari'nŭmŭ'pŭ Paarŭ ri na'ki karapitu to' uya ko tukai'. Miripan uya soisa amŭ' apiyo'ma'pŭ Paarŭ enpa'kato' pe to' uya to' piyapai soisa amŭ' iwŭ' ta'.

11Miri ewarupi'i tau, Itepuru Sises uyee'pŭ Paarŭ piya', miripan uya ta'pŭ, "Kenari'nŭmŭi! Seri yau, Surusiran po uyekareei ekamasa' auya man, miri na'ne' kasa ri mari Ron po uyekareei mekamai'," ta'pŭ iya.

**Esuweru Amŭ' E'kama'pŭ
Paarŭ Wini Pi'**

12Miri ema'sa' yau, Esuweru amŭ' usauroku'pŭ i'ri kasa Paarŭ

wito' pe tukai', miripan kon e'kama'pŭ, "Ŧri ri ensi pen miri awonsi'ki uta're'tin pen iwini pŭ'ku pona," ta'pŭ to' uya. 1340 entaino kon ni e'kama'pŭ seri kupŭ pi', 14miripan kon uti'pŭ use'man nito' tŭrawasomanin nan epuru ton eke ton kuru miri awonsi'ki Esuweru amŭ' epuru ton piya', "Ina e'kamasa' man, i'ri ri pi' uta're'tin nito' pe pŭra Paarŭ wini pŭ'ku pona ri tukai'. 15Miri pi', imiri miri awonsi'ki Konsuru amŭ' uya main ennoko i'se ina esi, eke soisa amŭ' epuru ena' Paarŭ enpa'kato' pe iya, ipokon pe asauro'pai kanan ina esi tukai', apŭne pŭra ina uya Paarŭ ekama'popi'to' esi tukai', itepuru mauro'katui'. Ina e'kama tane iwini pi' iyepŭ koro'tau," ta'pŭ to' uya.

16E'tane Paarŭ parusi mŭre uya etasa' a'tai, iti'pŭ soisa amŭ' iwŭ' ta' Paarŭ piya', ipana'tise'na iwini pi' to' e'kamasa' ekamai'. 17Paarŭ uya etasa' a'tai, tikin ni soisa amŭ' epuru tonpa ki'ma'pŭ iya. "Pŭse ri warawo' mŭre aki soisa amŭ' epuru piya', apŭne pŭra inekamanŭ esi moro," ta'pŭ iya. 18Miripan uya Paarŭ poitoru ari'pŭ soisa amŭ' epuru piya'.

"Paarŭ uya uyenko'sa' ipiya', pŭse ri moineri'pi nekamanŭ esi pi'," ta'pŭ iya.

19Miripan soisa amŭ' epuru uya ari'pŭ tŭpiya' miri awonsi'ki, "Ŧri na'ki esi inekamanŭ upi'?" ta'pŭ iya.

20"Ewai', Esuweru amŭ' epuru ton e'kamasa' iyekama'po pi'

Paarū enpa'ka pa, Esuwerū amū' Konsurūi ton ena'. Miripan kon uya tato' oton ina esi wakū iwa pe inekama'popi'pai tukai', e'tane i'napai ri pūra miri esi. ²¹Miri pi' to' uya iyekama'posa' a'tai, to' maimu kusetai, apūne pūra 40 entai ri Esuwerū amū' esi, miripan kon e'so'nansa' enuri'to' oton Paarū enu-pikiri. 'Ūri ri pi' uta're'tin pen miri awonsi'ki ensi pen, Paarū wini pū'kū pona ri, tasa' to' uya. Miripan kon nin si enurikū i'ri ri tukai' tūmaimu kon eikū auya i'se," ta'pū Paarū poitorū uya soisa amū' epuru pi'.

²²Soisa amū' epuru uya, "Seri upana'tisa' auya na'ne' kusekamai inū' pi' ri," ta'pū, miripan ennoko'pū iya tūpiyapai.

Paarū Ennoko'pū To' Uya Kopūna Piya'

²³Miripan soisa amū' epuru uya asa'ri tūpoitorū ton auro'ka'pū, "200 kaisa ri soisa amū' epoti' Paarū a'kiri to' utito' pe, miri awonsi'ki 70 kaisa ri kaware pon kon miri awonsi'ki 200 kaisa ri piriū tawon kon Sisariya pona to' utito' pe 9 a'kūra' ewarūpi nau. ²⁴Wakū pe kopūna Piri'kū epoto' pe Paarū uya, itikūn non ipo itito' ton kaware amū' minepotūi," ta'pū soisa amū' epuru uya tūpoitorū ton pi'.

²⁵Soisa amū' epuru uya kareta menuka'pū se kasa:

²⁶"Ina kopūnaai, ina nūnamanū, Piri'kū, miyari ta uya ipi'.

"Uri, Kūrautiyas Raisayas uya imenuka.

²⁷"Pūse ri ka'pon enno'sa' uya man ipiya', Esuwerū

amū' na'si'pū, miripan kon esi inwipai, e'tane usoisaa'i amū' uya imo'kasa' Roman amū' tonpa pe ri iyesi tukai' ito'ka'nū'sa' uya pi'. ²⁸Into'ka'nū'pai esi i'ri pi' Esuwerū amū' uya iri ku'sa' iya ta tukai'. Miri pi', Esuwerū amū' Konsurūi ton ena' ari'pū uya to' uya ekama'popi'to' pe. ²⁹E'tane i'ri ri eposa' uya pūra iyesi iwito' iwenai, miri awonsi'ki a'sito' pariki'si ta', miri awonsi'ki main tūsenupato' kon pi' ri nin to' uya eseru'ti. ³⁰Esuwerū amū' e'kamasa' Paarū wini pi' ke upana'tisa' ka'pon uya a'tai, ennoko pi' e'kama'pū ipiya'. Esuwerū amū' kanan auro'kasa' uya man to' utito' pe Sisariya pona inkuu'pū ekamato' pe to' uya ipi'. Seri seri kareta, uri itepuru," ta'pū iya.

³¹Soisa amū' uti'pū itepuru uya tauro'kato' kon awiri ri, miri awonsi'ki kareta ari'pū to' uya ta'kiri'nokon. Paarū ari'pū to' uya ta'kiri'nokon ewarūpi nau pata Antipateres pū'kū pona ri. ³²Miri ema'sa' yau, til'ta kon po tūutisan soisa amū' enna'po'pū Surusiran pona tūron kon kaware pon kon soisa amū' uti tane Paarū a'kiri Sisariya pata ya'. ³³Kaware pon kon soisa amū' uya Sisariya pata eposa' a'tai, kareta miri awonsi'ki Paarū tūrū'pū kopūna ena', miripan kon enna'po'pū Surusiran pona.

³⁴Korŋna uya kareta ene tŋpo, Paarŋ ekama'po'pŋ iya, "I'ri eke Roman amŋ' pata winon imiri?" tukai'.

"Siri'siya winon uri," ta'pŋ Paarŋ uya.

³⁵"Iyekareei ri eta uya miri iri ku'sa' auya tawon nan uye'sa' a'tai," ta'pŋ korŋna uya. Korŋna uya soisa amŋ' auro'ka'pŋ Paarŋ ato' pe to' uya Era' iwŋ' ta', miri awonsi'ki soisa amŋ' e'to' pe iterasu pe.

I'tuto' Piri'kus Piyau

24 ¹⁵kaisaron wŋi tŋpo, use'man nito' tŋrawasomnin epuru, Ananayas uti'pŋ Sisariya pona Esuwerŋ amŋ' epuru ton miri awonsi'ki raya Ti'turas itese' pokon pe. Miripan kon uya Paarŋ eseru'tito' tŋuya'nokon nerŋ'pŋ korŋna piya'.

²Paarŋ ki'masa' a'tai si, Ti'turas uya si Paarŋ eseru'tito' tŋuya'nokon ekama'pŋ miri Piri'kus pi'. Ta'pŋ iya, "Korŋna Piri'kus, wakŋ pe ri, tŋusewankamai' pŋra, inke ri ina ko'manŋ'sa' auya man. Pata eseru ri koneka'pŋ auya wakŋ pe uko'man nito' yau pe, wakŋ i'tu auya wenai ina epuru pe iwesi koro'tau. ³Siya ri, mi awiri ri, eke ri wakŋ ri Piri'kus, tewan kon yapai kuru ina uya ekama seri, pori' pe ina man inkupŋ'pŋ ina

iwano' pe pi'. ⁴Okoro' pen ni ina nekamanŋ eta pa wakŋ pe iyewan tuku'se, ina uya iyekama'po.

⁵"Pŋse ri ka'pon to'ka'nŋ'sa' ina uya man, wakŋ pe pŋra ri uko'man ni emapu'tinin pe, tŋtonpa ton Esuwerŋ amŋ' epanta'mato' pe to' tŋrŋkapi'nin pe siya ri pata kaisari ri. Pŋse ri ka'pon esi Nasare'pon eseru rŋ'pŋ pi' te'san epuru, ⁶miri awonsi'ki ina, Esuwerŋ amŋ' use'mato', ipŋremato' iwŋ' ri ma'tanŋku iya tukai' ri isauroku. Miri pe iyese pi', ina uya erentanŋ'sa' ikupŋ iya namai'.^z ⁸I'miri pe ri i'tu auya miri iwinipai i'napairon pe ipi' ina usauro'sa' tukai'," ta'pŋ iya.

⁹Esuwerŋ amŋ' pokon pe te'sepose, "I'napairi ri seri ton esi," ta'pŋ to' uya.

**Piri'kus Uya Paarŋ
Ekama'popi'to'
Ereutanuku'pŋ**

¹⁰Korŋna uya si isauro'to' pe iku'sa' a'tai, Paarŋ uya eiku'pŋ, "Si'tuyai' pena ri seri pata yawon kon eseru aimenka pi' iuko'mamŋ'pŋ tukai'. Miri pi', pori' pe kuru esi'l'ma usekama seri. ¹¹Sa'man pe pŋra ri uyekama'poto' auya ipi' to'ka'nŋku auya miri. Pena kuru pŋra ri ¹²kaisari ri wŋi Surusiran pona ipŋremai' uti'pŋ yapai. ¹²Esuwerŋ amŋ' uya uyeposa' pŋra ri iyese e'sei'pi' ni pi'

^z 24:6 Tŋron ni imenukasa' ton uya v. 6b-8a ke iponantisa' se kasa: *Seri tŋpo, usenupan nito' main uya ekamasa' na'ne' yawiri,* ⁷ e'tane eke soisa amŋ' epuru Raisayas uyee'pŋ. *I'se'ne' pe Paarŋ mo'ka'pŋ iya ina enapai.* ⁸ *Tiwi si ipi' tŋusauro'san nŋyerŋi ipiya'.*

inü' ya' ri ina use'mato', ipüremato' iwü' tau. Miri pe püra, ka'pon amü' ri tärunkasa' uya püra iyese' iri ku'to' pe to' uya ina usenupato' tau, miri pe püra mairi ri pata yau. ¹³To' nekama ton püra ri iyese' to' uya uya'sito' ipikiri. ¹⁴E'tane püra ri ta uya: tanporon kon ina tamokori ton e'to' itese' pi' Papa riken apuripi'nin uri, i'napairon pen nikayai'ne' to' Ite'ma yawiri te'sen uri, tanporon ni sapuriyai' main, Mosi' winon miri awonsi'ki pu'kena' amü' nümenuka'pü. ¹⁵Kamoro esi'pü kasa Papa sapuriyai' Papa uya i'mü'sa'kan nito' oton uruwai' yapai, ipokena' ton miri awonsi'ki iri ton. ¹⁶Miri pe iyese' pi', wakü pe uyewan kupü i'se te'sen uri Papa winikui' miri awonsi'ki ka'pon amü' winikui' niri.

¹⁷“Emennü'pü ri Surusiran pona uye'sa', utonpa ton entu'manin nan pürataai oton tuse'na, miri awonsi'ki ise'mase'na ina use'mato', ipüremato' iwü' ta'. ¹⁸⁻¹⁹F'ri püra ri iyekorukasa' pe esii'ma unkupüny kupü uya koro'tau Esuwerü amü' Eisa nono winon kon uya uyeporo'pü. To' uya uyeporo'pü Esuwerü amü' use'mato', ipüremato' iwü' tau, anpisin püra ri uya'kiri, iri pe ri e'nito' ku'sa' uya püra ri iyese'. To' uye'sa' nin si ipiya' nesii'no uri nukupü'pü ekamase'na ipi'. ²⁰Miri pe püra, püsamoro uya ri niri ta e'pai man iri unkupü'pü pi'

Esuwerü amü' Konsurüü ton piyau esi a'tai. ²¹E'tane püra ri, e'se'ne' pe riken umaimu tärü'pü uya to' koro'tau: Eri'ni tupo e'mü'sa'kan nito' apuri uya pi'. Miri pikiri riken uyekama'popi'to' pe auya esi seri, seri pe,” ta'pü Paarü uya.

²²Piri'kus, Ite'ma to'ka'nü'nin nü'pü uya Paarü ekama'popi'to' ereutanükü'pü. “Eke soisa amü' epuru uye'sa' a'tai, Raisayas itese', seri iko'tüü konekato' pe uya nesii,” ta'pü iya. ²³Soisa amü' esa' apiyo'ma'pü iya, “Paarü erasunpanin pe, tewa ke püra Paarü iku'ki, itonpa ton uya ri Paarü mainanpato' pe i'se iye'to' ri ne'to' pe to' uya iku'ki,” ta'pü iya.

Piri'kus Esi'pü

Paarü Usaurokü Eta Pi'

²⁴Emennü'pü po ri, Piri'kus miri awonsi'ki ino'pü Turu'sira, Esuwerü amü' pasi, uyee'pü, miripan uya Paarü ki'ma'pü, isaurokü etato' pe täuuya Sises Kürai apurito' eseru pi'. ²⁵Paarü usaurokü koro'tau, wakü pe ka'pon uko'manto' pi', ti'tui' ka'pon e'to' pi' tükupüny pi' tükü'mamü yau, miri awonsi'ki eseru aimenkato' weyu ri e'seporo pi', Piri'kus usenari'pa uya ta'pü, “Miri kasa riken ni nesii, enta. Iki'ma uya kanan miri iweyu eposa' uya a'tai,” ta'pü iya. ²⁶Miri a'tai, Paarü uya ri tärepa pürata ke tukai' iye'kupü'pü. Miri pi' nin si, iki'mapitü'pü iya, miri awonsi'ki auro'kapitü'pü iya.

27Asa'ron wūipiya pata'pū pe, Piri'kūs uya pata epuru pe te'to' nonka'pū. Miri pata'pū ya', Porū'siyas Pesū'tas ena'pū pata epuru pe. Esuwerū amū' epuru ton a'kwarū uye'to' pe, Paarū nimi'pū Piri'kūs uya pariki'si tau.

Paarū I'tuto' Pesū'tas Piyau

25 1Isutiya po itepuru pe Pesū'tas esi'pū. Miri a'tai, Sisariya pona iti'pū, miripan enna'po'pū Surusiran pona osorūwau wūi tūpo. 2Surusiran po, Pesū'tas piya' use'man nito' tūrawasomanin nan epuru ton miri awonsi'ki Esuwerū amū' epuru ton uti'pū Paarū eseru'tise'na, “Tu'kan ni iri ton ku'sa' iya,” ta'pū to' uya. 3Kamoro uya Pesū'tas apiyonti'pū Surusiran pona Paarū uye'to' pe ekamato' pe iya, miripan ekama'popi'to' pe. E'tane to' e'kama'pū asanta piyau tūron kon e'so'nanto' pe Surusiran pona iti a'tai iwinin nan pe. 4E'tane Pesū'tas uya to' eikū'pū, “Sisariya po a'sisa' pe Paarū esi miri. Seri pe'ne ri uti miri Sisariya pona. 5Iyepuru kon amū' enno'ti' uya'kiri to' utito' pe, iri ton kupū iya mukayati'ne' pi' Paarū patakase'na to' utito' pe, i'napai ri iyesei yau,” ta'pū iya to' pi'.

68 pe miri pe pūra 10 kaisari wūi Surusiran po tesi kon tūpo, Pesū'tas uti'pū Sisariya pona, miripan a'kiri Esuwerū amū' uti'pū. Iyema'sa' yau, Pesū'tas ereuta'pū aimenkan apon pona, miripan uya Paarū ne'to' pe to' uya ekama'po'pū ekama'popi'to' pe

tūya. 7Miri yau, soisa amū' epuru uya Paarū nee'pū. Esuwerū amū' epuru ton Surusiran poi iye'sa' kon esi'pū iwoi. “Tu'kan ni iri ku'sa' Paarū uya,” ta'pū Esuwerū amū' epuru ton uya Pesū'tas pi', e'tane i'napai ri iyesei tukai' to' uya i'tu pūra iyesei'pū. 8Miri yau, tiwano' pe Paarū e'wa'kutū'pū, “Iri pe ri ina, Esuwerū amū' iwano' main, Mosi' winon winikūi' usauro'sa' pūra man, miri awonsi'ki ina use'mato', ipūremato' iwū' eseru pūreme'sa' uya pūra ri man, miri awonsi'ki Sisa pi' ri niri iri ku'sa' uya pūra ri iyesei,” ta'pū iya.

9E'tane Esuwerū amū' a'kwarū inne'pai Pesū'tas esi'pū, miripan uya Paarū ekama'po'pū, “Surusiran pona pe' itipai me'an? Miri yau si, pūsamoro uya iyekama'popi'to' pe upiyau,” ta'pū iya.

10E'tane Paarū uya, “Kane, seri ipiyau e'mū'sa'kasa' na'ne' Sisa uya iku'sa' pi'. Seri yau kuru uyekama'popi'to' auya pe iyesei. I'tu auya iri pe ri Esuwerū amū' pi' e'sa' pūra iyesei. 11E'tane uwito' ipikiri ku'sa' uya yau, i'ri pe pūra man ukota'ma, to' uya uwini a'tai, e'tane iri ton ku'sa' uya pūra man. Miri pi', Esuwerū amū' epuru ton ena' inū' uya uturū pūra iyesei miri. Itepuru Sisa uya uyekama'popitū i'se esi!” ta'pū Paarū uya Pesū'tas pi'.

12Tūkonsurūi amū' pokon pe tūseta tūpo, eikū'pū iya, “Sisa uya iyekama'popitū i'se iwesi, miri pi' iūtito' pe iyesei Sisa piya!” ta'pū Pesū'tas uya ipi'.

**Pesut'as Uya Teseru Oton
Warinpa'pu Kin Akuri'pa Pi'**

¹³Emennu'pu tupo ri, kin Akuri'pa miri awonsi'ki ino'pu Pones uti'pu Sisariya pona. Pesut'as apuripi'se'na to' uti'pu. ¹⁴Inke ri kin Akuri'pa miri awonsi'ki Pones uko'manpitu'pu; miripan koro'tau, Pesut'as uya Paarü ekareei ekama'pu Akuri'pa pi'. "Moro ka'pon man a'sisa', Paarü itese', itepuru Piri'kus na'si'pu. ¹⁵Surusiran pona utisa' a'tai, use'man nito' turawasomanin nan epuru ton eke ton kuru miri awonsi'ki turon kon Esuweru amü' epuru ton uya uyeseru kon i'se püra iyese, iri ku'sa' iya ta uya i'se to' esi'pu.

¹⁶"To' auro'ka'pu uya Roman amü' eseru esi inke püra ka'pon nonkanin nan pen iteyaton non ena'. Wapiya kuru a'sisa' miri awonsi'ki iteyaton non utito' pe iyese ekama'popi'nin piya'. Miri yau, teyaton non pokon pe te'sepose isauro'to' pe, te'wa'kutu pe. ¹⁷Miri yau, Esuweru amü' uyee'pu Sisariya pona, Paarü eseru aimenkato' a'tai. Ina uyee'pu ema'sa' yau, Paarü ne'to' pe to' uya ekama'pu uya. ¹⁸Iri kuru ri na'ki wenai to' uya ikupu ta'pu uya e'tane, miri pe püra iyese'pu. ¹⁹E'tane to' e'manenpato' Paarü pi' esi'pu Papa apurito' tuya'nokon pi'. To' e'manenpato' kanan esi'pu ka'pon, Sises itese' pikiri. Iyeri'sa' ru'pu e'tane si, Paarü uya, 'Moro iyese,' ta. ²⁰Miri enta'

to' ekama'popi'to' ike i'tu uya püra iyese'pu, miripan to' eseru koneka i'tu uya püra iyese'pu. Miri pi', Paarü ekama'po'pu uya Surusiran pona itito' pe miri yau ekama'popi'to' pe, ²¹e'tane Paarü esi'pu i'se püra. Roman amü' epuru Sisa uya kuru tekama'popitu' i'se iyese'pu, e'tane a'sisa' pe ri iye'to' pe ennoko uya pona ri Sisa piya,'" ta'pu Pesut'as uya kin Akuri'pa pi'.

²²"Uri pe kuru imaimu inetapai e'ai,'" ta'pu Akuri'pa uya Pesut'as pi'.

"Awanapai ri etato' pe ikupu uya miri. Isauroku etase'na misipui,'" ta'pu Pesut'as uya.

**Paarü E'wa'kutu'pu
Akuri'pa Piyau**

²³Iyema'sa' yau, Akuri'pa miri awonsi'ki Pones uti'pu amuran nito' iwu' ta' tawaai ke, tasoisaai amü' ke eke pe tesi kon ekamanin pe. Eke ton soisa amü' epuru pe te'san miri awonsi'ki turon kon ni eke ton pe te'san Sisariya po uyee'pu to' a'kiri. Pesut'as uya ta pi' Paarü nee'pu to' uya. ²⁴Miripan uya ta'pu, "Kin Akuri'pa miri awonsi'ki turon kon ni seri yau na'ne' nan, puse ri pe' menyatuu?" ta'pu Pesut'as uya to' pi'. "Tanporon kon Esuweru amü' seri yau Sisariya pon kon miri awonsi'ki Surusiran pon kon uya, ipikiri upi' tumaimu kon tupa'sa' man. To' uki'pi'nunpitu'pu, 'Miri enta' ku'ko'manin!' tukai'. ²⁵Iwito' ipikiri püra ri iyese tukai' i'tu'pu uya e'tane, Sisa uya kuru tekama'popitu' i'se iye'sa'.

Miripan Ron pona enno'to' pe uya e'kamasa'. ²⁶Itepuru ena' unmenukanu i'tu uya p̄ra iyese, miri pe iyese pi' p̄se ri senno'ai' tawon, ap̄ne p̄ra iri ku'sa' iya p̄ra iyese pi'. Miri pe iyese pi', ipiya'nokon ine'sa' uya, imiri kuru kin Akuri'pa piya'. Ekama'popitu uya'nokon tupo, itepuru Sisa ena' unmenukanu oton nin si i'tu uya miri. ²⁷Miri ton iri ku'sa' iya tawon kareta p̄ra iye'tane a'sisa' ennoko Ron pona p̄ra iyese," ta'p̄ Pesu'tas uya to' pi'.

**Kin Akuri'pa Piyau Paaru
Usauroku'p̄u Teseru Pi'**

26 ¹Miri tupo, kin Akuri'pa uya ta'p̄u Paaru pi', "Imiri pe ausauroku pa iku'sa' man," ta'p̄u iya. Miri a'tai, Paaru uya temiyatu anamu'p̄u tusauro'to' pe. Miri a'tai tumiri pe usauro'ni pi' iye'sara'ti'p̄u.

²"Kin Akuri'pa, waku pe seri esi uiwano' pe usekamato' pe, to' nusauro'ai'ne' upi' pi'. Ito'ka'naku uya tu'kan ni uri pi' kasi pe Esuweru amu' usauro'to' upi' ekama uya ipi', ³ap̄ne p̄ra kuru tanporon ni Esuweru amu' uko'manto' eseru miri awonsi'ki to' manenpanin ton eseru i'tu auya wenai niri iseseru yawon kon pe p̄ra to' esi. Miri wenai, uyeta auya i'se e'ai' waku pe.

⁴"Esuweru amu' uya waku pe uko'mamu'p̄u eseru i'tu miri, mare pe esi'p̄u si'kiri utiona ton

koro'tau Surusiran po. ⁵To' uya ui'tusa' wapiyaro' si'kiri, to' uya niri upataka e'paina upataka-pai tesi kon a'tai, miri sa'man ip̄reman nito' eseru pe te'sen yau uko'mamu'p̄u Pari'si pe. ⁶Seri pe si Papa uya ta'p̄u na'ne' penaro' kon ina tamokori ton pi' ri iya u'e'ku'to' pikiri, seri pe uyekama'popitu auya na'ne'. ⁷Seri ekamasa' ru'p̄u enupikiri 12 kaisaron kon Esuweru pon kon esi miri. Papa apuri pi' esii'ma wai nai miri awonsi'ki ewarupi nau, epoto' pe tuya'nokon. Kin, seri pi' e'ku'to' wenai Esuweru amu' uya uyewa'noma miri. ⁸Iri pe iyese pi' Papa uya iyeri'sa' i'mu'sa'ka'p̄u apuri auya'nokon p̄ra iyese?

⁹"Uri niri uya apuri'p̄u man waku pe na'ki iyese tukai' tanporon yau ri Nasare' pon Sises ewa'noma pi' esi'p̄u. ¹⁰Miri na'ne' kuru kupu pi' esi'p̄u miri Surusiran po. Esuweru amu' use'man nito' tarawasomanin nan epuru ton eke ton kuru uya iku'ki tasa' maimu awiri, tu'kan kon Sises apurininan emaika'p̄u uya pariki'si ta'. To' uma'tato' pe to' ku'sa' a'tai, miri kasa ri to' numa'tai tawon pe ri e'pitu'p̄u. ¹¹Inke ri, utipitu'p̄u Esuweru amu' usenupato' ton iwu' kaisa ri'ne to' kota'mapitu pi'. Miyari ri to' a'kwaruka pi' iri pe Papa pi' asauro'ti' tawon pe e'pitu'p̄u. Pana' pe usakorooi yau tautisen pe e'pi'tai inno'nan pata ton ya' to' poni'simato' pe uya.

26:5 Inkup̄u'p̄u 23:6; Piri'pai 3:5 26:8 2 Ma'kapis 7:9 26:11 Inkup̄u'p̄u 8:3; 22:4-5

**Paarū Uya Ekama'pū Sises
Apurinin Pe Tena'pū Rū'pū**
(*Inkupū'pū 9:1-19; 22:6-16*)

¹² “Miri ton a'tai'ne uti a'tai, use'mato' tūrawasomanin nan epuru ton eke ton kuru uya uyeno'sa' pi' tūmeruntirū ke utito' pe uku'sa' uti koro'tau Tamaskas pata e'ma tau. ¹³ Kin si, pūre'po'si a'tai, wūi enu esi koro'tau, asanta tau esi koro'tau, a'kwa ene'pū uya Epūn winipai. A'kwa pe kuru wūi enu entai iye'wei'ti'pū uwoi miri awonsi'ki utonpa pe te'san woi. ¹⁴ Tanporo ina uta'mo'ka'pū non pona. Miri yau, main eta'pū uya, Arami' pe,^a ‘Saarū, Saarū, i'ri pe iyese pi' uponi'sima auya? fiwano' pe ri e'ne' mūmoronkayai' tiwiri ri uri poni'sima auya kaisa ri, tesa' yūūi pona te'wipi'sen itikūn paka waraino kasa.’

¹⁵ “Miri tūpo, ekama'po'pū uya, ‘Inū' imiri, uyepuru?’ ta'pū uya.

“ ‘Uri kūrī ri Sises, mūponi'simayai'ne,’ tukai' Itepuru uya umaimu eiku'pū. ¹⁶ ‘Seri pe, e'mū'sa'ka', ipiya' usenpoikasa' seri upoitorū pe ikonekase'na. Seri iyenu ya' senpoikayai'ne', miri tūpo, seri pe kanyauro'kayai'ne' ekamanin pe iwesi pa. ¹⁷ Ipika'ti uya miri itonpa ton Esuwerū amū' miri awonsi'ki Esuwerū amū' pen namai'. Iyennoko

uya to' piya' ¹⁸ to' enu a'kokapi'se'na, to' era'tito' pe ewarupi apai a'kwa winikūi' miri awonsi'ki Se'tan^b meruntirū apai Papa winikūi'. Uyapurito' to' uya wini, tūmakooi kon pi' usentu'mato' epoto' pe to' uya, wakū ton ka'pon amū' pata'se' yau to' e'to' pe,' ta'pū iya upi'.

¹⁹ “Miri wenai, kin Akūri'pa, uyenu uta'kwakasa' a'tai, unene'pū Epūn winon maimu awiri esi'pū. ²⁰ Iyepiya'ti pe kuru, itekare ekama'pū uya Tamaskas pata awon kon pi', Surusiran pon kon miri awonsi'ki tanporo Isutiya pata pon kon pana ya' niri. Miri tūpo, itekare ekama'pū uya Esuwerū amū' pen pana ya' to' era'tito' pe tūmakooi kon apai Papa winikūi'. To' auro'ka'pū uya i'napai ri to' uko'manto' pe tūmakooi kon apai tera'tisa' kon ekamanin pe. ²¹ Miri wenai kuru, Esuwerū amū' uya uya'si'pū miri use'man nito', ipūreman nito' iwū' pū'ku tau. Miri tūpo, to' esi'pū uwini i'se. ²² E'tane Papa uya upika'tisa' seri pona ri. Miri wenai, seri pe e'mū'sa'kasa' seri ekamase'na inū' pe Sises esi tukai' eke ton miri awonsi'ki sepa' nan ni pana ya', tanporo Sises pi' ukayai'ne' esi miri itekare Mosi' miri awonsi'ki tūron kon pu'kena' ton nūmenuka'pū poro. ²³ Pu'kena' ton uya imenuka'pū Kūrai^c kota'mato' oton, miri tūpo,

^a 26:14 Arami' pe; miri pe pūra, Esuwerū amū' maimu, Ipuru tukai' tesa'san.

^b 26:18 Se'tan—Makoi ese' isakon, Papa eseru ewaruma'tinin ta e'kwa pe.

^c 26:23 Kūrai (Kiri' maimu yau); miri pe pūra, Me'saya (Ipuru maimu yau), asa'ri ri mari iyese, Papa Nanūmū'pū ta e'kwa pe.

iwito' oton, miripan te'mu'sa'ka ton teriku'pu apai iyeri'sa' kon e'mu'sa'ka tipiya pe Esuweru amu' miri awonsi'ki Esuweru amu' pen ni niri pika'tise'na to' weyu ekamai', tawon," ta'pu iya.

I'tupi'to' Si U'matu'pu

24Seri airi, Paarū wanu'tipa'pu kopuna Pesu'tas uya isekama koro'tau. Iki'pi'nūmu'pu, "Ta'kwaru ke pūra me'ai', Paarū!" tukai'. "Eke pe kuru iusenupasa' ayano'ma pi' man. Miri uya aya'kwaru pūra iku'sa' man," ta'pu iya.

25E'tane, "Uya'kwaru pūra esi pen seri, eke tūnamasen Pesu'tas," tukai' Paarū uya imaimu eiku'pu. "E'tane ukayai'ne' esi miri i'napairon pe kuru tūto'ka'nū'sen pe ri. 26Seri ton ukayai'ne' i'tu imiri, kin Akūri'pa uya miri; miri wenai, usauroku kuru ri, usauroku niri eta auya pe si'tuyai'. Sapuriyai' seri ton iye'ku'sa' Sises pi' i'tu auya tukai', apūne pūra tu'kan kon uya Sises pi' iye'ku'sa' etasa' pi'," ta'pu iya. 27Miri tūpo, Paarū uya kin Akūri'pa ekama'po'pu, "Pu'kena' ton nūmenuka'pu pe' mapuriyan? Apuri auya pe kuru ri si'tuyai'," ta'pu iya.

28"Inke pūra pe' Kūri'san pe enato' pe ukupu auya tukai' iusenuminka?" ta'pu Akūri'pa uya Paarū pi'.

29"Inke pūra ri, miri pe pūra inke ri, ipūrema seri Papa pi', imiri riken pen e'tane tanporo kamoro uyeta pi' na'ne' nan ni mari seri pe,

enato' pe uri na'ne' kasa apurinin pe, a'sisa' pe pūra riken," tukai' Paarū uya imaimu eiku'pu.

30Kin, kopuna, Pones, miri awonsi'ki tanporon kon to' a'kiri te'san e'mu'sa'ka'pu. 31Itau te'to' kon iuti nimi'pu to' uya, asaurokui'ma tūtonpa kon amu' pokon pe. "Pūse ri uya iri ri tawito' miri awonsi'ki ta'sito' iwenai ku'sa' pūra ri iyese," ta'pu to' uya.

32Akūri'pa uya ta'pu Pesu'tas pi', "Pūse ri uya Sisa uya tekama'popi'to' pe tasa' pūra iyese yau, inonka'pu nesii'no ri," ta'pu iya.

**Paarū Uti'pu Sisariya Apai
Opa'wu Kūri' Pona**

27 1Ina utito' pe I'tari pona tukai' iye'ku'sa' pe iyese'pu a'tai, Paarū miri awonsi'ki tūron kon a'sisa' kon nonka'pu to' uya soisa amu' epuru, Isuriyas itese' ena', "tamū' tawon kon Sisa Soisaai Amū'," tato' kon. 2Kanau epotorū'pu ya' ina ekanwa'ti'pu pata Atūrami'tiyan, Eisa awon apai. Kanau tūutisen pe te'sen ereutapitū'pu Eisa awo'nan tūron ni ton ni pata ton yau. Aresta'kos, Sises apurinin Tesaroni'ka winon esi'pu ina tonpa pe, Ma'sitoniya apaino.

3Miri ema'sa' yau, Saitan pata eporo'pu ina uya. Miri yau, Isuriyas uya Paarū auro'ka'pu manū' pe te'se, tūtonpa ton ense'na itito' pe inonka'pu iya, i'se ri iye'to' ke to' uya ipika'tito' pe. 4Miri apai, ina kanan uti'pu parau po Sai'pūras opa'wu pata winikui',

miri airi tutui pe iyese pi', apune p̄ra pana' pe kuru a'setun uyee'p̄u ina winikui'. ⁵Parau po Siri'siya miri awonsi'ki Panperiya poro iwa ri ina e'kwirit̄'p̄u. Ina uya Maira eporo'p̄u Iri'siya awon. ⁶Miri yau, soisa am̄' epuru uya Arisantiriya pata apai kanau uye'sa' eta'p̄u. Utin pi' iyese'p̄u I'tari winikui', miripan ya' ina kanwa'ti'p̄u iya.

⁷Inke ri w̄i tenno'pi'se tinin pi' kuru ina uti'p̄u. Miri a'tai, Kunitas eporo i'se ina usi'tu'p̄u, e'tane pana' pe kuru a'setun uyee'p̄u; miri wenai, to'sa ri kanau uti'p̄u pen ina utito' ya'. K̄ri' opa'w̄u winikui' ina uti'p̄u, apune p̄ra a'setun p̄ra miri poro iyese pi', Sarumone nono utisa' parau ka' woi. ⁸Miri apai, ina utama'p̄u sa'man yau, pana' pe ri a'setun esi koro'tau. Miri t̄po, ina uyee'p̄u Wak̄u Peya' tato' ya', a'ko pe pata Raseya piya' ri.

⁹Oko pe ina esi emapu'ti'p̄u isi' pe a'setun esi uya. Seri a'tai'ne ri Esuwer̄u am̄' useruma weyu pata'p̄u pe^d iyese'p̄u. Miri wenai, Paaru uya to' auro'ka'p̄u: ¹⁰“Utonpa ton, isi yau kuru e'ni tukai' senyai'. A'setun uya kanau, apuru, uri'nokon ni niri ma'tanuk̄u poken iyese,” ta'p̄u iya. ¹¹E'tane Paaru usauro'to' uya soisa am̄' epuru ewankama'p̄u pen. “Kanau anin miri awonsi'ki kanau esa' uya auro'kan nito' awiri, utinpai'nokon,” ta'p̄u iya. ¹²Kanau ereutato' pata esi'p̄u wak̄u pe iyau

e'ni poken p̄ra, komi' pe pata e'to' weyu e'seposa' a'tai, tu'kan kon uya, “Miyari ri utinpai'nokon ni,” ta'p̄u. Pini'kus itese' pata K̄ri' pon eporo t̄uya'nokon tukai' to' esi'p̄u, miri yau komi' pe pata e'to' weyu enno'to' pe t̄uya'nokon. Seri K̄ri' pata esi'p̄u miri asa'ron winipai isi'ratoi pe kanau ereutapi'to' pata'se' pe.

Isi Kuru A'setun Uya Kanau Ari'p̄u Ite'ma Tapai

¹³Mararon A'setun e'sara'tisa' a'tai uye'ni pi', i'se te'ton kon uya teposa' kon pe to' uya ekama'p̄u. Miri a'tai, wa'ka pun kanau ku'nin peten an̄m̄'p̄u to' uya, miripan uti'p̄u K̄ri' ka'ta poro. ¹⁴Inke kuru iye'sa' koro'tau p̄ra ri, pana'pan a'setun, kuranau warai uyee'p̄u opa'w̄u pata winipai kanau wise'na, W̄i Enu Enuku Enwo'net̄u Winon A'setun tukai' tesa'sen. ¹⁵Kanau wini'p̄u iya pana' pe, miyari ri itito' p̄ra ri iye'to' temapu'tii'. Miri pi', a'setun uya kanau epotor̄'p̄u ato' pe ina uya inonka'p̄u. ¹⁶Miri yau, w̄i enu enuku kamisi winikui' aiko Kauta opa'w̄u awiri ina uti'p̄u, a'setun p̄ra miri awiri iyese wenai. Epika'tin nito' kanwa kup̄u poken p̄ra iyese pi'. Miri wenai, ina uya an̄m̄'p̄u kanau epotor̄'p̄u ya'. ¹⁷Kanau an̄m̄'p̄u t̄po, to' uya si'na' ke ewa'ti'p̄u kanau epotor̄'p̄u pona. Enari'ke' to' esi'p̄u ta'muna kon Siritis wi'sipu

^d27:9 *Esuwer̄u am̄' useruma weyu pata'p̄u pe.* Miri esi'p̄u Esuwer̄u am̄' ekonekato' iri pe t̄si'p̄u kon apai weyu r̄'p̄u pata'p̄u pe (Yon Ki'poru), kanau epotor̄'p̄u yau utin esi'p̄u sa'man pe kuru ri.

pona tukai'. Kanau anin kareku nu'ti'pū to' uya, tinin pi' itito' pe. ¹⁸Miyari ri pana' pe a'setun esi'pū uye'ni pi'. Miri ema'sa' yau, kanau pūro'po te'sen ka'pon amū' apuruui ton ma'kiri'pū to' uya. ¹⁹Itosorūwano wūi a'tai, kanau apuruui amū' ma'kiri'pū to' uya kanau yapai asi'ono pe pari kanau e'to' pe. ²⁰Inke kuru ewarupi pe pata esi'pū; wūi enu e'wei'ti pūra, siriki amū' niri usene pūra, apūne pūra a'setun ni esi wenai uye'ni pi'. Inke rū'kwī ri wakū pi' te'ku'pitu kon tūpo, ina e'nonka'pū.

²¹Inke ina enta'nasa' pūra ina uko'mansa' koro'tau, Paarū e'mū'sa'ka'pū to' pi' tase'na, "Utonpa ton, kanyauro'katantūne' utinpai'nokon pūra Kūri' pata apai ukataine' tetai' pūra iwesi'pū kon. Epika'tin ni nesii'no, apuru ton ni uma'ta pūra nesii'no. ²²E'tane seri pe ipi'nokon ta uya pana' pe aya'kwarū kon nesii, apūne pūra inū' ri uma'ta pe pūra iyese. Kanau riken uma'tato' oton. ²³Nesiine' ewarupi nau, Papa, uri na'ne' itiwano' pe miri awonsi'ki ipoitorū pe e'tūrawasomayai'ne' inserūi e'mū'sa'ka'pū upiyau. ²⁴'Kenari'nūmūi Paarū! Me'mū'sa'kai' ri, iyekama'popi'to' Sisa uya yau. Papa uya niri tūsentu'ma wenai kamoro kanau yau iye'sa' kon aya'kiri pika'tisa' miri.' ²⁵Miri wenai utonpa ton, kenari'nūntū! Papa apurito' uya esi pi' iye'kupū ri inserū nekama'pū awiri. Miri kasa kuru inserū uya uyauro'ka'pū miri.

²⁶Miri e'tane ri, a'munan pe man opa'wū tonpa ton pona ri; kanau ri uta'morūka," ta'pū iya.

Paarū Uya

Tūtonpa Ton Pori'ma'pū

²⁷14 kaisaron wūi yau, parau Atūriyati' po utin pi' ina e'tane, anomūra' kanau anin nan uya a'mun pata eporo tukai' i'tu'pū. ²⁸Miri a'tai, i'tuto' si'na' ton ennasikapitū'pū to' uya. Miri a'tai, to' uya eporo'pū 120 pi' i'nau iyese tukai'. Emennū'pū iwa to' uya kanan i'tukaa'pū; 90 pi' i'nau iyese tukai' kanan to' uya eporo'pū. ²⁹Ti' pona sipa'sipa uya ina ari tukai' to' enari'nūmū'pū. 4 kaisaron ton wa'ka pun kanau ku'nin peten eno'ma'pū to' uya, miripan kon enurikū'pū pata emakū i'se. ³⁰Tapūgūnto' kon pe kanau anin nan uya epika'tin nito' kanwa nu'ti'pū tuna ka', kanau a'sinin ton nu'ti tūuya'nokon pe itese'. ³¹Miri a'tai, Paarū uya ta'pū soisa amū' epuru pi' miri awonsi'ki soisa amū' pi' ri, "Pūsamō kanau yau te'tūrawasomasan esi a'tai riken kanau yau, iyepika'tito' oton kon miri," ta'pū iya. ³²Miri pi', soisa amū' uya si'na' ton akū'pitū'pū tuna ka' epika'tin nito' kanwa uta'mo'kato' pe.

³³Pata emakū rawiri ri, tanporo to' enta'nato' pe ta'pū Paarū uya. "14 kaisa ri wūi iwe'sa' kon sa'man yau tenta'nai' pūra," ta'pū Paarū uya. ³⁴"Seri pe si enta'nati' ta uya ipi'nokon, nurine iwesi kon pa. Inū' uya ri tikin ni ri ti'pai i'po'

eno'mato' oton pen miri," ta'pū iya. ³⁵Seri ta'pū tūya tūpo, tūyu anūmū'pū iya, tenki ta'pū iya Papa pi', miripan pi' iyenta'na'pū tanporon kon enu airi. ³⁶Tanporon kon pori'ma'pū iya, miripan kon niri enta'na'pū. ³⁷Tanporo 276 kaisa ri^e ina esi'pū kanau yau. ³⁸Tanporo i'se te'to' kon pe tenta'na kon tūpo, to' uya a'nai', wi' tato' tūnarinū kon ma'kiri'pū parau ka' asi'ono pe kanau enato' pe.

Sipa'sipa Uya

Kanau Aure Ma'tanūku'pū

³⁹Pata ema'sa' a'tai, a'mun pata eposa' tūya'nokon to'ka'nūku to' uya pūra iyesi'pū, e'tane ikupai

yau ite'pi ene'pū to' uya. Miyari ri kanau ari pi' to' e'ku'sa' pe iyesi a'tai, iyereuta nesii'no a'mun pona. ⁴⁰Wa'ka pun kanau ku'nin peten ewa ton akū'pita'pū to' uya, miripan nonka'pū to' uya parau ka'. Miri a'tai'ne ri, kanau a'sito' ike ewa ton amū' eukapita'pū to' uya. Miri tūpo, iputu pon kanau anin kareku i'mū'sa'ka'pū to' uya, a'setun uya tato' kon pe parau ka'ta pona. ⁴¹E'tane kanau putu a'muna'pū. Miri apai, iye'wūruka'pū pen, pana' pe sipa'sipa e'wipita' uya iyaure i'kwita'pū ipūra.

⁴²Soisa amū' e'kupū'pū a'sisa' kon wini pi' tūpinūnse to' apūruū



*Seri ta itepuru uya awiri ina e'sa' wenai,
a'mun eporo'pū ina uya waku pe ri. (27:44)*

^e 27:37 Taron ni imenukasa' ton uya, 275 kaisa ri ta; taron kon uya, 76 kaisari ri nawon ta.

namai', ⁴³e'tane soisa amū' epuru esi'pū Paarū inpika'tipai, miripan niri esi'pū a'sisa' kon wini soisa amū' uya i'se pūra, miri pi' to' eretanūka'pū iya. Kamoro tūpinūnsan pi', "Ainānti' tuna ka' iūpinūmū kon pa a'mun pona," ta'pū soisa amū' epuru uya. ⁴⁴To' tonpa ton nin si utito' pe to' pikiri iye'kwi'pi'sa' ton paranka pi' tūta'sipi'se, seri ta itepuru uya awiri ina e'sa' wenai, a'mun eporo'pū ina uya wakū pe ri.

Marū'ta Itese' Opa'wū Po

28 ¹Wakū pe kuru ina uya pata eposa' a'tai, ina uya Marū'ta itese' miri opa'wū tukai' i'tu'pū. ²Patawon amū' uya wakū pe kuru ina eretanūka'pū. Apo' po'ti'pū to' uya, miripan kon uya ina ki'ma'pū a'nose'na, arūne pūra tuna pe, ikomi' pe niri pata esi pi'. ³Paarū uya apo' pe te'ton amūranū'sa' a'tai, isi kuru ikūi esi'pū i'koro'tau. A'ne'



Isi kuru ikūi uta'si'pū itemiyatū pi'. (28:3)

uya enpa'ka'pū, miripan uta'si'pū itemiyatū pi'. ⁴Patawon amū' uya ikūi e'sinkasa' ene a'tai itemiyatū pi', to' uya ta'pū tiwano' kon pe, "Pūse ri ka'pon esi pe man te'wisen pe, parau apai iyapūranūsa' e'tane, kūrī ri Papa miri waraino kon poni'simanin uya si ima'tanūka' pe man," ta'pū to' uya. ⁵E'tane Paarū uya ikūi eno'ma'pū apo' ya', miripan esi'pū e'ne' pe pūra ri. ⁶Ka'pon amū' esi'pū iya'mamū enupikiri, miri tūpo iyerikū tukai' itenupikiri to' esi'pū. E'tane inke ri itenupikiri tesi kon tūpo, i'ri ri e'kupū pūra iyesi pi' ipi', teseru kon ensima'pū to' uya. "Papa pe man," ta'pū to' uya.

⁷A'ko pe ri miri yau iyesi'pū umi, eke opa'wū pata epuru, Pa'piriyas itese' mainarū. Ina eretanūka'pū iya tiwū' ta' osorūwau wūi e'to' airi. ⁸Ikūipūnū esi'pū e'ne' pe e'kii'man pi', miri awonsi'ki mūnūimi pi', miripan piya' Paarū ewomū'pū ipūremai', miripan uya temiyatū nonka'pū ipona, miripan epi'ti'pū iya. ⁹Seri e'ku'sa' a'tai, tūron kon e'ne' ton uyee'pū ipiya', miripan kon usepi'tipitū'pū. ¹⁰Ina nama'pū to' uya tu'kan wini ri. Ina utito' e'seposa' a'tai, to' uya ina repapitū'pū tu'kan ke ri ina i'kiyari miri awonsi'ki i'se ina e'to' ton ni kanau yau.

Paarū Uti'pū Marū'ta Apai I'tari Pona

¹¹Osorūwau kapūi tūpo, kanau epotorū'pū yau parau po ina uti'pū iko'mansa' komi' weyu pe pata esi wenai. Arisantiriya winon pe kanau



Paarū ewomŭ'pŭ ipŭremai', temiyatŭ nonka'pŭ iya ipona. (28:8)

esi'pŭ. Kanau putu pi' Munui' Amŭ' Papa tato' ipi' pe yŭi ewa'pi'sa' ton esi'pŭ.^f ¹²Ina uya Sire'kiyus eporo'pŭ. Miri yau, osorŭwau wŭi ina uko'mamŭ'pŭ. ¹³Miri apai, ina kanan uti'pŭ, Resiyan tepose. Miri ema'sa' yau, wŭi enu enuku kamisi winon pese'ti yee'e'pŭ. Asa'ri wŭi pata'pŭ pe, Pu'tiyori eporo'pŭ ina uya. ¹⁴Miri yau, tŭtonpa kon amŭ' eporo'pŭ ina uya, miripan kon uya ina ki'ma'pŭ tikin ni suntaaka e'to' poro ina uko'manto' pe tŭpiyau'nokon. Miri kasa ina uya pata Ron eporo'pŭ. ¹⁵To' uya ina uye'pŭ Ron pona tukai' etasa' a'tai, to' uye'sa' esi'pŭ innon A'piyas tepose ri, tŭron kon niri uye'sa' esi'pŭ Osorŭwau Patatŭse' tepose'ne ri ina e'matai. Pŭsamoro eposa' tŭuya

a'tai, Paarŭ uya Papa pi' tenki ta'pŭ, miripan pori'ma'pŭ to' uya miri yau.

Paarŭ Epa'ka'pŭ Ron Pona

¹⁶Ina epa'kasa' a'tai Ron pona, tiwano' pe iko'manto' pe to' uya Paarŭ kupŭ'pŭ soisa tŭku'se erasuntinin pe.

¹⁷Osorŭwau wŭi tŭpo, Esuwerŭ amŭ' epuru ton ki'ma'pŭ Paarŭ uya. To' amŭrasa' a'tai, ta'pŭ iya to' pi', "Utonpa ton, i'ri ri ekamŭn miri pe pŭra i'ri ri penaro' kon ukŭipŭnŭ kon amŭ' nekama'pŭ pen ni ku'sa' uya pŭra iye'tane, a'sisa' pe e'ai'. A'sisa' rŭ'pŭ uri Surusiran po. Miri tŭpo, Ron pon kon ena' inonkasa' rŭ'pŭ uri. ¹⁸To' uya uyekama'popitŭ'pŭ tŭpo, unonkapai to' esi'pŭ, apŭne pŭra iri ku'sa' uya pŭra iyesi'pŭ uwito' ipikiri. ¹⁹Esuwerŭ amŭ' esi'pŭ unonka i'se pŭra, miri wenai enno'sa' uri Sisa uya uyeseru aimenkato' pe, i'ri ri ekamŭn tŭto' uya pŭra ri iye'tane utonpa ton, Esuwerŭ amŭ' pi'. ²⁰Miri wenai, iyento' kon pe uya, ayau'ro'kato' kon pe uya iki'masa' uya 'nokon miri. A'sisa' pe e'ai', apŭne pŭra Esuwerŭ amŭ' pika'tinin pe ekamasa' rŭ'pŭ ese' pi' esi pi'," ta'pŭ iya.

²¹To' uya imaimu eikŭ'pŭ, "Kareta ri eposa' ina uya pŭra man imiri ekamanin. Inŭ' yan ni uye'sa' miri apai uya iyaseru patakasa' pŭra ri man. ²²E'tane anapurinŭ inetapai ina man, apŭne pŭra seri

^f28:11 To' ese' ton esi Kastorŭ miri awonsi'ki Poros tukai', kanau yau tŭupininsan ewakiri ton kuru.

28:19 Inkupŭ'pŭ 25:11

emenna' iyamutu yau iwe'to' esi waku pe para tukai' tanporon kon usauroku pi,'" ta'pu to' uya.

23 To' uya taweyu kon koneka'pu taron ni wui a'tai kanan etato' pe tauya'nokon, miripan kon uyee'pu tu'ke pari Paarū pata'se' ya'. Awanakui' si'kiri iko'mamu pona ri, Papa e'to' esa' wanni pe enpoika pi' iyese'pu to' pana ya', i'ri tukai' miri ya' ewon nito' esi tukai' niri. Main, Mosil' winon apai miri awonsi'ki taron kon ni pu'kena' ton eseru apai'ne ri to' uya Sises apurito' pe ikupu i'se iyese'pu. 24 Taron kon uya inekamanu apuri'pu, e'tane taron kon uya apuri'pu pen. 25 I'si'kaisa ri to' ekoneka para iyese'pu, miripan kon e'sara'ti'pu inimi pi', iu'matu pe ri se tawon ekama iya tupo, "Waku A'kwaru usauroku'pu ri i'napairon pi' ukai'punu kon pi'. Ta'pu iya na'ne' Aisaya pu'kena' awiri:

26 " 'Enta kamoro ka'pon amu' piya' tase'na to' pi',
 "Tiwiri ri eta auya'nokon,
 miri e'tane
 ito'ka'nuku auya'nokon
 para ri iyese;
 tiwiri ri iyenu kon tui'pu
 auya'nokon,
 miri e'tane ene
 auya'nokon para iyese,'"

tawon.

27 Arune para pasamoro
 ka'pon amu' ewan enasa'
 sa'man pe,
 tapanana kon a'kopi'sa' to'
 uya,
 tenu kon ni a'kopi'sa' to'
 uya.

To' uya tenu kon ke ene
 nesii'no,
 to' uya eta tapanana kon ke
 nesii'no,
 to' uya tewan kon ke
 ito'ka'nuku nesii'no,
 miripan kon era'ti uwinikui'
 nesii'no to' epi'ti uya
 nesii'no,'s

tawon," ta'pu Paarū uya.

28 "Miri wenai i'tu auya'nokon i'se e'ai', seri epika'tin nito' ekareei esi miri Esuweru amu' pen iwano' pe, miripan anunto' oton to' uya," ta'pu iya. 29 (Seri etasa' Esuweru amu' uya a'tai, tumiri'nokon pe ri e'sei'pitui'ma to' enna'po'pu.)^h

30 Asa'ri wui'piya e'to' airi, Paarū uko'mamu'pu tane'manu iuti tau, tikin ni'ne tauye'san ereuta-nuku'pu iya to' auro'kato' pe tauya. 31 Te'namai' para, iwa'ku'pi'nin para Papa e'to' esa' wanni pe pi' itekare ekama'pu iya, miri awonsi'ki Itepuru Sises Kurai pi' enupan nu'pu iya.

^s 28:27 Aisaya 6:9-10 ^h 28:29 Taron ni imenukasa' ton v. 29 para iyesei.